


定丁詩存



君逸署

PL  
2830  
.Y8





2830  
·48

YORK UNIVERSITY  
JUL 03 2001  
EAST ASIAN STUDIES


定存

丁

詩


陳古送題





Digitized by the Internet Archive  
in 2010 with funding from  
York University Libraries





像小歲十六者著





定庵詩存自序

少年志科舉攻帖括於聲詩殊少措意惟嗜讀沈文愨古詩源  
孫臨西唐詩選謝疊山千家詩琅琅上口偶遇景物流連親朋  
離合時事興衰情之所觸亦不禁形諸歌詠願隨意抒寫未必  
盡合律度迨戊戌應經正書院課藝有擬陸魯望茶具十詠朱  
筱園先生評爲雋永曠逸勝處去唐人不遠自此遂頗激發思  
欲有以自見而促促從公屢膺事變絕少興會恆擱筆不爲爲  
之亦不能工也已未庚申之交遠涉重洋有漫游詩百餘首然  
第述所歷山川之奇偉人物之闐咽未嘗求工於字句也自退  
休以來日取藏書溜覽見古今作者如林大都平庸者多新警  
者少恐涉白陸范楊擊壤流派遺其精華而啜其糟粕必至靡  
俗不能自振乃注意於杜韓半山涪叟以及近代之鐸石經巢  
漸西海藏滄趣諸家時時點勘而誦習之春秋佳日山水登臨  
時復與三四知交唱和往復苦出筆殊少近似又足跡不出昆  
明附近頗乏佳題故石遺老人贈詩勸出遊以廣江山之助年  
事衰遲欲遊未果戊辰應采風社之徵與海內諸名士詩筒往  
還十餘年間所作遂夥得其攻錯之益亦較獲之集部者爲多  
也邇者親故至好如袁籛山周惺盦所作俱已先後刊行自顧

年逾六十料已無何等進境不揣固陋亦哀輯歷年詩稿約爲四卷付之排印以存半生鴻坭之迹嗟嗟少年熊熊之志安在東塗西抹一事無成竟垂垂老矣昔楊西巖有言人生幾何東牆之陰有寸移寸滅而已每感斯言懃懃自勵而綜計所爲期無負此寸陰者返諸心而不能無歉也然則詩存之印聊以誌吾碌碌之過非求見稱於人求見責於人以爲後之青年有志者鑑戒加勉焉爾遑敢誕名希譽也哉

民國二十六年歲次丁丑上巳 定庵由雲龍序於十二印齋



定庵詩存序

詩小道耳在中國文學中不過百川之一流在中國歷史中不過一時盛一時衰一人工一人拙盛衰工拙究何深論而愚特沾沾喜言詩是又何也一國之大詩人之衆浩乎吐吾心之血曠乎繪吾游之境淵乎發吾學之蘊詩乎詩乎其亦吾人畢生所由表見乎顧拘一體以求之挾寸衷以斷之鮮有不失之拘且隘或且失真者愚言而有可採乎乃得論定

定庵先生之詩矣先生滇西世家薊北遊學探中國四部之秘笈復參以東西鄰國之新理非惟文也習其言矣非惟言也遊其山川都鄙矣積億萬里之程覽北京垓壤之冊經數十年之精研蘊中今中外上下道器文武經緯之奇奇正正形形色色不必專工於詩而實已於詩宣之不必盡宣之於詩而實已於詩傳之愚辱附親交之末得讀先生詩或一篇或數篇或一冊或數冊今乃都合爲大集凡四卷名曰定庵詩存定庵者先生高曉別墅之名也風月林泉花鳥梵唄天然之境皆可以喻天然之詩愚乃一一深窺之僭評之述古諸作經經緯史叶於宮徵詠物諸作鏤雲裁月調高響逸家庭諸作天倫人倫和藹可親環游諸作模山範水詞美注美考訂諸作藻古字古鸞翔鳳

翦和韻諸作一彈再彈無窮清新至於先憂後樂手敏心靈睠懷大局墨妙筆精殷殷於斯世斯民志康濟而言微婉尤爲愚舌矯而心傾者隱君寄慨乎黃唐布衣許身於契稷令先生坐言起行古今人詎不相及惜未盡其用而僅僅寄之詩耳顧先生近年以來鄴架曹倉儒宗佛旨發爲文章其書滿家出版問世十數種家置一編聲光燭然將又以詩集付梓掃尊唐祧宋之習而歸本性情極上蟠下際之奇而自有真我良工示璞和聲鳴盛入世出世轉法華不爲法華轉先生唱之愚與諸同人和之追古哲振運會待後學質諸天下不得以小道視詩則以先生詩爲首功焉可也卽以先生詩爲集成焉可也世有知音或不諂愚言爲拘隘而失真也夫丙子孟春中浣姻愚弟袁嘉穀謹序於九龍池北移山簃



定庵詩存序

余嘗謂詩之道有二一視乎其人身世所遭故曰治世之音安以樂其政和亂世之音怨以怒其政乖亡國之音哀以思其民困一視乎其人性情所發故曰其哀心感者其聲嗷以殺其樂心感者其聲嘽以緩其喜心感者其聲發以散其怒心感者其聲粗以厲其敬心感者其聲直以廉其愛心感者其聲和以柔夫惟因乎身世故世次既殊則所作亦異惟出乎性情故雖居同地生同時而心聲不同各如其面此可以觀古今詩人之作而知之矣余與由君定庵始結契於昆明時君已文采聲華踔越州郡既而同赴汴梁應春官試禮闈報罷君入國學余航海東游及丁未還滇同居講舍辛亥以後相繼佐戎幕司教育攝省政綰綦綱屈指二十餘年間凡身世所遭余與君先後驂靳如出一轍故以文章道義相切劘亦與君爲獨深當余之初識君也在庚子事變之後君盱衡時事慨然有匡濟之思每抵掌高談余已深爲傾倒洎同入幕府值海內多故軍事倥傯余執筆簿書徬徨亟肄君則從容治辦應若有餘乃益以數其才之未易及也已未歲君渡大海至美洲歸而得紀遊詩百數十首蓋得於江山風物之助者爲多近謝政閑居偶結吟社傳牋刻

燭君詩先成同人皆斂手以君之才豐學贍又身歷諸艱壯遊數萬里外意其所作必慷慨任氣磊落使才顧乃春容夷愉略無噍殺淫哇之響斯則冲和本諸天性非時勢所能推移也君嘗與余論近代人詩謂李越縵博古通經甄綜百氏而其詩斂才就範不爲蹶張連狝之詞陳滄趣詩清切雋永蔚然深秀讀之使人意遠其夙所稱道如此今哀所作將付梓人屬余爲序余觀君詩醇雅清夷亦與越縵滄趣爲近然行年六十猶刪詩緝頌孟晉無已則余又安能測其所至耶丙子春周鍾嶽謹序



定庵詩存序

余交定庵逾十年書問往還無虛日逮來黔及二載密邇君鄉  
警效如接尤極推藝之樂余雖以塵勞致疏吟事然君書至無  
不卽答且辱詒句亦罔不卽和儻古人所謂神交者耶歲丙子  
仲春定庵將刊其詩督序於余且眎其自序集中錄及鄙作時  
述與余往復攻錯得益爲多以余薄劣何足以益吾定庵顧海  
內知定庵深者自珂鄉樹圃惺庵諸公及並世石遺室外余庶  
幾亦附相知之末又安敢以不文辭嘗謂西南諸省文化皆肇  
自西漢初不後于中原顧僻在邊徼重以士習樸質往往不善  
爲名而名亦弗彰蓋其由來久矣滇至明清人才稱盛文采風  
流甯殊吳越迺沈歸愚輯清詩別裁王蘭泉輯湖海詩傳均不  
之及洪北江當時已病其隘（按王輯頗及滇人或洪偶未憶  
及）夫聲氣標榜賢者不爲川媚山暉豈能終閔往者鉅製鴻  
篇流傳天壤區區甄錄與否要不足爲滇賢輕重卽如吾定庵  
詩固自有必傳者存海內今日論西南壇坫者蓋無不知定庵  
則茲篇雖晚出殆所謂其蓄之久者其流愈光者歟定庵柄鄉  
政久聲施在碧鷄金馬間比歲沈酣典籍兼研佛乘有林泉嘯  
傲之樂又平生游踪遍東西瀛海笠屐所至得句爲多綜其遭

逢昔賢所罕天將以此昌其詩吾又安能測其所止也若其詩  
之醇雅清夷惺庵論之已詳不復贅述云丁丑元月綿竹曹經  
沅



雙鳥詩倣韓昌黎體奉題定庵詩集

清宣統元年昆明錢君平階叔辦雲南日報余與定庵實尸論著故託以

起興

滇山有雙鳥飛飛兩相酬不辭嘴流血意欲挽春留春去不可  
留四時相代休百卉迹如掃芳草滿汀洲一鳥剪其翎坐以聲  
自囚一鳥特軒舉浩蕩凌九州有美稱西方無女哀高邱歸來  
兩鳥合往往發商謳假令占上林和鳴戛琳球卽或放江海亦  
足求其儔奈何頻仰間衆羽紛囁啾因風寄所懷於焉寫幽憂  
高翔尙如此卑飛安所投升湛雖異趣感慨實同流玉盆損魚  
鱗金羈蹙馬頭物情忌拘束不及任天遊長爪抱芳條引吭不  
自收誰能爲此曲清絕聽者愁

丙子二月

劍川張父趙式銘





題詞二

青蛉毓秀鍾鴻儒 定庵崛起滇西隅文章政事希歐蘇曹倉

鄴架勤肥梳讀破萬卷資涵濡更行萬里山水都耳聞目見心

追摹長歌短什成斯須滇詩從古名寰區楊遠庵張禹李溪錢南

戴雲黃雲朱丹探取騷旨古爲徒公追大雅輪再扶主盟壇站

探驪珠驅唐入宋鎔真吾滄趣越縵與合符一篇遠道投贈余

我亦桴鼓相應呼公如大楚吞五湖我如曹鄴如苕邾一官曾

爲飢所驅時復吟詠懷抱攄今避寇亂歸田廬嗜詩結習猶未

除自維腹笥漸空疎從公補讀未盡書天雨地豈吳越殊山川

磅礴雄坤輿發揮勝概才俊需要與海內爭名譽金沙浩瀾萬

流趨彩雲燦爛天下無地以人傳言不誣望公導引宏遠謨

丁丑秋九月

昆明

王

燦





定庵詩存卷之一

姚安由雲龍夔舉撰男振錫校字

羣  
奇

同學綿竹黃尙毅評閱

蠶婦吟 附小序

惠風師以風俗日侈婦女不務蠶織命作蠶婦吟以爲世勸  
伸紙立就師覽之以爲步驟得宜末數聯寄託遙深如規如  
諷可與古農桑詩相輝映云 時年十五

鳥嘯花落三月天桑葉陰陰短牆邊村婦安排養蠶事蠶生先  
求繭如意東鄰女伴西鄰子攜筐執筐羅敷里瞻彼微行桑柘  
綠曰日采葉躡林麓去年春較今年早今年蠶比去年好殘月  
涼風近五更攬衣推枕眠不成挑燈添葉檢視過生恐葉稀蠶  
受餓直到春蠶上箔席繅絲染采成新績可憐歲歲桑落春忙  
煞村中養蠶人君不見城市之上女如雲身衣錦繡著羅裙又  
不見楊柳樓中歌妓兒纏頭是錦衣是絲嬌癡不識養蠶苦朝  
朝暮暮鬪歌舞一旦繁華事零落不如藍縷蠶婦勤自若

八月十八日獨步西山展墓

凌晨往西巖板橋渡河水漸覺遠塵囂獨向山村裏秋風吹我

衣秋露沾我履山路多崎嶇行行復止止登高一縱觀山川歸  
彈指晴嵐審長城初日映朝市田夫荷篠來問我誰家子問答  
蕭然間炊煙溢荆杞秋收禾滿場老農顏色喜迤邐至墓門墓  
前草嶷嶷自廢蓼莪篇七稔及茲紀往事忍重論流光嗟如駛  
下帷事攻苦久未親拜跪風景已全非江山固猶是封誥猶餘  
事繼述焉可諉依依不忍歸徘徊復延行行矣慎自勉扶搖搏  
萬里

時將赴滇應童試

渡小金沙江

或云即瀘水爲蜀滇兩省分界地

峻阪長途困旅人黃泥九折到江濱蒼涼一水分滇蜀岬嶂雙  
峯象主賓擊楫祖生原瑰偉渡瀘諸葛劇忠純金沙淘盡英雄  
淚對此茫茫一愴神

歲暮至姚安寓光祿鄉鄉中摺紳結鏡湖吟社佳節良辰  
輒小集唱酬丙申人曰大雪盈尺集社於養雲草堂余參  
末座走筆書此

光祿鄉中來駐馬人曰初把新詩寫續紛瑞雪值佳期分箋聯  
句徵風雅雕蟲本無逸羣才卽景敢辭聞見寡拈毫動欲借癯  
仙梅花諒我非俗者灞橋春色正宜人有客騎驢應不舍名葩  
我來折一枝贏得暗香衣袖惹秋月春花又易年胸中磊塊澆



瓊甓環堵光陰能幾何願賦凌雲獻闕下一詩吟就意茫茫腕底龍蛇任揮灑

入邑庠後將赴省垣讀書留別白塔諸友

游踪萍梗汎天涯且踏名場莫顧家南國無情生豆草東風有信寄梅花山川負笈安辭遠雨雪興歌莫漫嗟聚久轉難分襁去空揮別淚上征車

傷心失怙未成童十二年華一夢中縱蓄班超投筆志還勤董子下帷功顯揚酬願知何日繼述方前拜下風發軔雲程從此始冰淵頊頊懷初終

漫道科名艷少年感深今昔淚如泉懷才猶賴金針度磨墨還期鐵硯穿自有素心盟止水聊將別緒付吟鞭來秋好與攀丹桂三五良宵月正圓

征歧一曲唱驪歌入耳魂銷喚奈何同輩漫疑期會少人生苦是別離多艱難險阻嘗由我得失窮通聽自他寄語諸君各珍重韶華大好莫蹉跎

丁酉二月遇張法春於龍街款留痛飲卽席賦贈

少小嬉遊輩奔波各一方乍經忘面目促坐訴衷腸對酒增離感挑燈話故鄉青春能幾許努力趁流光

清明日

客裏清明節臨風淚滿裳松楸勞想像霜露動悽愴故土情難  
恕他鄉酒倦嘗不堪回首望雲樹莽蒼蒼

八月二十二日吳玉書招遊西山

旅居昆湖上忽忽春徂秋鉛槧無暇晷名勝覽未周故人來江  
漢握手話綢繆臨流作盛會沿河盪輕舟雨霽日澄潔清波如  
練浮扣舷舒逸興飛槳驚羣鷗卅里到山麓蠟屐登高邱磴道  
躋千仞塵海同浮漚撥雲得異境萬象森雙眸石殿懸空濶峭  
壁生涓流滇池五百里浩窅潛蛟虬憑欄重徙倚斜陽在山陬  
乘風返歸棹危崖安久留勸觴得新令薄醉發清謳何當月圓  
夜攜酒續茲遊

戊戌仲春寓居養雲草堂卽景

半間小屋絕羣塵怡興羣芳作比鄰開戶不嫌春寂寞桃花隔  
牖笑窺人

花影如潮月在林春宵寂寂院沉沉一樹海棠初破蕊耐人清  
賞到更深

端午節遊妙峯山留題

炎暑蒸騰甚相將入此山奇峯千仞峙俗慮一時刪客到殊清



健僧招共往還呼童攜榼酒結席古松關

領略山游趣林泉引興長管絃衷別調

遊人增多  
嫻音律

餅餌過端陽日

午林陰密途紆展齒忙甘霖欣普降徧野插新秧

開山祖師係鷄足山和尚名徹

紺宇紅牆地投閒置散身開山雖祖力留教是皇仁

庸者土人或稱之又乾隆間有以沙汰僧道爲請者諭免沙汰上聯紺宇紅牆投閒置散皆疏中語藉以勉勵住持

花木勤栽植工夫認本

真還將堯舜澤留與後來人

廳事壁間有碧窗夢一闌倚而和之

地僻花偏媚天空鳥任飛棟花風過雨霏微縱是此間可樂

莫忘歸

附原作

雲影移山動風聲掃慮空登樓樹樹見煙籠欲望明朝歸路  
霧濛濛

附煙蘿山樵留題一首

再覽名峯妙流光已十年山池留水月人事渺雲煙鹿夢忘  
苔路蟬吟噪樹巔老僧能解律吹笛和絲絃

己亥二月二十四日述夢

一枕還家夢中宵斷復連睡魂雖恍惚真意總纏綿儼屆期三  
五渾忘路幾千慈親瞻笑貌諸弟共盃筵別況偏爭訴離懷頓

覺宣團圓情未艾彷彿恨重牽棣萼重分手薰蕕雜比肩時光  
嗟奄忽世路懷迍邐但得分符俸（時有議叙之望）稍添負郭  
田詩書爲益友林壑結幽緣概任翻雲雨何須辯白堅長歌發  
金石用此卒天年

擬陸魯望茶具十詠

茶塢

尋芳不知路面面浮雲阻祇容碧乳香那許黃金貯竹裏饒清  
芬林阿喧鳥語支筇聊小憩滌煩兼卻暑

茶人

生性何所契綠花與紫英未必啜其秀先得氣之清分澗湔塵  
俗信芳徵性情願渚山頭鳥慣見應不驚

茶筍

沃土蠡靈芽欣欣不盈尺抽是雷有聲潤處雨無迹秀色已可  
餐芳心殊自惜寄言提筐人珍重加採摘

茶簾

不餉隴畔人不求牆下桑編織輒隨意取攜應靡常春巖掬香  
露歸途趁斜陽朝朝偕伴侶陶然歡自長

茶舍

卻依彎環水拓開數弓地茗荈趁春藏茅茨得古意曉晴宿霧  
空夜涼山雨至出作入息者情同而事異

茶竈

汲取越溪水鑿開冠山石一束燎霜薪滿鍋沸雲液殊味絕羶  
腥清氣凌松柏貧淡有蛙生斯人乃足惜

茶焙

客從衡封來遺我衡封物甘露比清華團月差髣髴火候幾蒸  
騰膏液相縈鬱試和松雪烹春風滿座拂

茶鼎

幽齋無長物古鐵頗修整欣逢舊雨來況當春晝永活火添竹  
爐香泉挹橘井一甌傾未畢渴塵萬斛屏

茶甌

微物有本真豈必尙雕鑿筠席聊周旋茗味耐咀嚼滌筆淨詩  
心擊節助歌謠碧玉與琉璃仍茲勝一勺

煮茶

安鼎疎松前爇火修篁裏新泉湧雪花餘馥滃芳芷挹爽見精  
神舉念無渣滓由來偏嗜者箋註亦可喜

火車行

亦經正課題也



西人行車破陳腐能以陰陽一氣鼓不求長房縮地方海角天涯如庭戶紛紛與國鐵道開四通五達輪車來名都雄鎮罔弗徧終朝震耳轟春雷濃煙一抹噴管起急於流星奔若矢倏忽之間不可追朝發夕至瞬千里我聞夸父西逐日力行未必如斯疾又聞列子能御風事非曰擊熱鑿空一自火車創新式盡奪天工與人力任重致遠殊不勞山川城郭過瞬息鼓輪端賴水氣蒸十輻百輻齊奔騰漫言地球廣且大乘茲徧遊罔弗能雖然歷年駸駸來外侮往往借辭通商賈一旦鐵路告成功稱干戈誰能阻吾滇門戶東西陞耽耽英法久伺窺近復許彼通車道南方大局伊誰持興言及此三大息同軌休風杳難追矜奇炫巧日益劇斷雕爲樸需何時吁嗟乎斷雕爲樸需何時

## 其二

轟轟雷霆匝地起頃刻馳驟千百里不勞推挽能飛行鬼斧神工乃有此五洲萬國環地球星羅碁布誰能遊西人妙得製造法車行平地如行舟矯若游龍身幻若長蛇陣捷若驚飛鴻迅若乘八駿一氣蒸騰霧漫天不見塵沙見濃煙前車鼓輪後車繼十輻五輻相追聯吁嗟乎人力至此亦已竭天機至此亦盡洩矜奇炫巧恐不長世事驚心若電掣我欲安步當車輪不隨

鐵道追風塵從來物極必思返試看同軌自聖人

送李紹先王約文二君赴大姚應試

八月十一日

人世相逢總宿緣此鄉聚首忽三年通家孔李情增洽耐久元  
炎世並傳大節冰霜須砥礪小窗燈火共鑽研鯢鵬奮翮從茲  
始佇看扶搖搏九天

學古猶難自得師不嫌盲瞽每相咨愧無高論驚塵俗徒有卮  
言慰別離此日春波勞悵望他年雲樹更相思河梁攜手道珍  
重不覺涔涔淚已垂

讀書自古重登科我正蒼涼感喟多學海望洋空起歎韶華巨  
坐等閒過開編怕讀江淹賦擱筆豪吟武帝歌遙羨量才深院  
裏十分明月放金波

蓮花池族祖姑合葬墓成族兄騰龍屬爲題詠刊諸墓側  
敬題二律時九月下浣

可慨期年內頻教老病櫻歸車方駕鹿仙路頓騎鯨餘慶憑忠  
厚貽謀只讀耕幸哉賢有子喪葬極哀榮  
華表來瞻拜音容記不迷持躬原翼翼處事更媿媿家室心同  
瘁泉臺手共攜尙餘潛德在後福自堪俟

十一月初六日自白塔街回蜀省親途中得詩十首



驛路彎環西復東經霜林葉半成紅竹輿輕便捷於馬髣髴穿  
行圖畫中

江水茫茫月正明巉崖高處有人行羊求好友多情甚預遣家  
僮埽徑迎

李紹先遣人迎余於飯朝

此間風景劇堪憐兩岸奇峯一道泉我是風塵來過客也思小  
隱駐江邊

綿駒小駐在雲林雄辯高談愜素心可惜鹽車甘俯就悵然無

處覓知音

貴筑傅后堃茂才高才博學盡就拉餅厘局事談次感喟甚深

連朝文讌樂盤桓巨耐歸期促歲寒記取青青萬楊柳重煩攀  
折在江干

破曉霜寒撲敝裘蒼茫曙色上輕舟當年數過金沙渡翻讓新

都一狀頭

曉渡金沙江

萬山高處月輪低聊假衡茅一夜棲記得來時風雨路分明猶

可認鴻泥

宿鳳山營

三絳名區市肆稠嘈嘈車馬任遨遊平生不耐繁華地寄語知

交莫強留

至會理張蔚齋昆仲留住數日堅辭始得行

白果河灣流水通幾家村落半山天然一幅嘉陵畫翠竹丹  
楓點綴工



沿堤綠柳茁新芽河水茫茫漾晚霞一路東風如有意扶搖送我遠還家

歸途述懷

定省晨昏缺五年歸期屢約總遲延有方縱可寬游子司命何能學偶仙菽水欣逢承順日風霜仍是別離天板輿迎養知能否搔首踟躕意惘然

不辭千里路迢迢算到歸家興便饒遊子思深忘道險僕夫懶慣怨途遙感他縞紵殷投贈笑我膝囊太寂寥要使宦成歸去日只攜琴鶴似今朝

趙瘦仙孝廉贈畫傳后堃茂才贈書檢點行囊竟無以報膝囊見范書儒林傳論

庚子二月二十六日別家

纔得休裝又束裝舉家咸爲旅人忙匆匆揮手何時返一望雲山一斷腸

三月十七日甫卸裝退園主人以詩約赴園內賞雨

征塵猶滿袖詩召入春筵雨喜隨時好風清籍退傳園花撐蕊活池水濺珠圓拚作甘霖慶酣歌雜管絃

謁趙金波先生遺像

自慚生也晚未及覩英姿遺像來瞻仰清風宛在茲丰神歸鍊冶骨格振岐嶷汗水甘棠在千秋說口碑

送李朋溪昆仲遊泮後還家

相逢同作少年狂，半爲君傷亦自傷。有酒也難銷別恨，無詩不足寫愁腸。鵲林借處垂三載，雁影分飛各一方。艷羨君家昆季好，歸來衫袖有芹香。

桃花潭水幾徘徊，還踏鄉山亦快哉。爲學莫從名上計，立身須自苦中來。能甘貧約知非病，虛擲光陰便不才。此後相逢當刮目，阿蒙學問費疑猜。

星回節觀炬懷古

屈子抱忠烈，角黍弔江湘。之推持高尙，插柳昭回光。吾滇有軼事，佳節同芬芳。西漢元封際，滇土居遐荒。世忠爲漢將，叱咤凶餓張。賦性登徒子，酋長被其戕。厥婦曰阿南，大節著堂堂。殉夫甘如薺，誓不從強梁。季夏廿五夕，郡志載能詳。逮夫皮邏閣，狼虎肆披猖。志圖併五詔，詭計殊難防。邏遣妻慈善，智珠獨潛藏。諫止苦不聽，鐵釧識身傍。嬰城力旣竭，捐軀從前王。二婦相先後，義烈同彰彰。迄今傳盛蹟，萬炬燒輝煌。闐闐如白晝，遊玩紛康莊。登高試縱覽，霄漢燭光芒。我亦與憑弔，感此心徬徨。人生宇宙間，萬事隨滄桑。惟此巍巍節，足令千載揚。嗟彼二婦人，詎必窺縑紵，乃能持大義。亘古存綱常，昂藏士君子，豈不如紅妝。



甘令七尺軀草木同枯僵或立功與德抑或存文章須令百世後光燄萬丈長區區巾幗事安足與頡頏

雪君先生銅鑄像補存并小序

白塔土目高天映字雪君學識淵博著書七十餘種晚乃隱於光祿山中嘗以銅自鑄睡像旁鑄銘語寓意甚深庚子夏同人邀集德雲蘭若避暑因得拜識爰紀以詩

我聞先生名欲識先生面遙遙百餘載望古徒歆美我讀先生書並閱先生傳

州志列先生藝文文學類

想望彌復切癡心存一片方謂願終

乖先生乃奇炫鑄像留來茲精銅經百鍊偃蹇作臥形熊度綦

安燕銘詞鐫其旁一一堪摩研別有圖畫存參觀若合鈿

魯蘭泉明

經曾以先生畫像相示

我來登獅山拜識誠歡忭遂殷尙論心妄欲參管見

先生嗣守土適遭鼎革變遺蛻鑄斯形珍重藏僧院遠效陳圖南形神示厭倦瞑然一覺長榮華靡顧戀壺廬作枕頭莫是呂公薦勝國古衣冠不隨時代轉在在寓深心探討意自見何物

么麼賊移置供饘膳先生振威靈逆虜乃驚顛

同逆據城時與先生像去未幾疫癘大作賊共

驚異逆仍移供原處

在昔顏子淵翹翹孔門彥謂是仲尼鑄此擬誠嘉善卓

哉范大夫扁舟去穩便范金象其形藏閣越王殿茲製方昔賢佳話相後先生節既高况復宏論譔邱索窮其源百家資貫穿可惜兵燹餘無人爲葺繕七十餘種書曾未存百卷徒令世俗人競欲希寵眷視同木居士紛紛陳杯奠我詩不成章聊當



下里謠先生倘有知或弗加呵謔

庚子感事

海國連縱戰局開揚鋒鼓餓自西來妖星閃鑠輝仙仗蛋雨續  
紛落上台涇水驟臨回紇騎岐山先避狄人災試登平乘高樓  
望孰使神州付劫灰

燕趙頻年不解兵羯奴戎馬肆縱橫名臣半被枯楊議大將誰  
當細柳營魁柄倒持和約定盜糧齎送鬼謀成敢疑王氣終江  
表念切憂天百感生

寇兵而齎盜糧時局益不可爲矣

匪亂初起言獲譴者僅許竹翼侍郎袁爽秋京卿等數人其  
他軍機大老多半附和權奸釀成大亂草草議和賠償鉅款僅

巋然北極奠皇基二百餘年厄運罹

咸豐熱河之役不如此次蹂躪之甚數百年法物國粹一朝蕩然矣

已

謂化爲甌脫地不圖重睹漢官儀九州神器歸荒漠三輔豪宗  
迭亂離聽說河陽龍馭返關東父老慰謳思

漫道鹽車帖耳馳抱關擊柝亦吾師無端榮辱何須計得聞光  
陰好自爲讀萬卷書真富貴立三不朽次言辭騰驤有志期他  
日珍重無荒一簣基

寄內

夫子祖姚年甫三齡蠢頑特甚予又外出日多懼其久而愈漓也爰於暇時選書格言數種彙成一冊屬內人

教之冀其稍辨之無亦藉以束其豚犬之性云爾

家塾黨庠廢古制遐遺風所學非所用長此安愚矇弱小無導引長大仍自封習見聰穎子嬉頑狎童蒙諉言年齒幼久久終祿庸泰西重教學轉與古意通規模端始基男女一視同佐夫兼教子自茲儲厥功我立志遠大四方聘其雄有子弗能教環顧心忡忡所期內助賢朝夕牖渠衷數須認奇耦方名辨西東耳濡兼目染積久用斯宏毋謂雖齡耳轉瞬卽成童毋謂知識少趁此開明聰詎冀成樑棟幸免爲蒿蓬灑涕念衰門勢已如僵蟲敢弗亟努力挽此窮途窮事業我當外教卿主中內外各自勉折機奮厥躬譬如培黍苗座或觀芄芄

七月公車北上擬游學東西洋景樓外舅以詩勉勵諸友人亦各賦別根觸鄙懷抒成八首

忽忽光陰似轉輪那堪徒手作游民制科期變冬烘土國恥須關草莽臣鄧禹旁觀應笑我張騫博望亦猶人天涯揮手從茲去聽唱驪歌漫愴神

髫年雅慕棄繻生芒角撐腸偶一傾顧怪歸奇誰見賞廬前王後我無爭鬬山莽莽知何屈書劍勞勞亦有情百倍精神摩厲出彼蒼默自寓權衡



次第征帆且向東大秦規畫此先通耳詳徐福三山地心折扶  
餘一世雄王管度遼思往日（擬從遼瀋去）機雲入洛仰遺風

公詩有博通靈要  
歸諸約之句

箴言守約韋弦佩深恐荒嬉負我公  
仲宣日日強登樓何獨甘心寄浪遊骨肉和情渾不戀男兒家  
食總含羞半肩行李殊輕快一曲陽關且唱酬爲語同心諸伴  
侶莫依婢子訴綢繆

早識窮通總在吾不須飽死說侏儒寒窗學術先嘗蔗塵海艱  
難且茹茶酒酌行時腸頓濶詩吟醉後膽彌麤不禁狂態逢場  
吐擊碎當筵玉唾壺

自憐蹤跡浪萍飄入夢家山路更遙定省虛懸心未了匈奴不  
減恨難消韶華只惜歌金縷親舊還期奪錦標自分庸才何足  
取好風能否借扶搖

汪倫情致想深淵此別東西各一天江樹暮雲朋輩遠池塘春  
草夢魂顛浮生鴻爪都無定到處鶯聲卻有緣幾輩知交應盼  
憶雞林消息待遙傳

飲到長亭酒一杯黯然心緒共低徊人生難料惟離合事業無  
常在化裁漫詡題橋司馬志須追挾策樂羊才此番真向蓬瀛  
去整頓冠裳着錦來



次韵和仲仙李中丞留别士民八首

偉人寥落莫追攀，正氣何由扶兩間。已見長材試西蜀，從知物望屬東山。非緣華胄棲筠貴，卻驗名珠合浦還。畢竟天生爲社稷，理繁端不礙身孱。

特躬易事說應難，墨吏崩心競抱丹。判牘曉籌精力瘁，焚香清夜夢魂安。荒陲綏撫蘇民困，芸館甄陶恤士寒。願借寇公宸聽遠，鳩車竹馬淚痕看。

番舶蠻琛競款關，開通風氣說瀛寰。樂羊游學蒙優獎，嚙矢陳詞忘魯頑。余首倡呈請派生留學蒙嘉許論世於今通吏少，憂時未許宦情閒。爲

山一簣功猶歉，諫草回天動聖顏。

一封朝奏夕休官，詩酒猶尋竟日歡。經濟文章規學富，雷霆雨露總恩寬。長存遺愛山登峴，喜聽清歌笛弄桓。預卜楠材終大用，巖阿根柢益深盤。

彌天駭浪混清漣，擊楫澄懷獨湛然。智勇羅胸期有濟，瘡痍滿目見猶憐。時艱不擇言危，孫臣直應知主聖。賢誓掃逆塵歸淨土，着鞭詎讓祖生先。

時病因循不易痊，石銘漫詆讀兜堅。逆鱗雖犯領邊怒，推轂須知闔外專。未必履霜忘鑒薄，果然坐席屢虛前。笑他退食委蛇

輩踵事模稜說智圓

益弄潢池勢蔓延術兼剿撫說年年內憂未靖連黔粵外侮尤虞瞞蜀滇方幸擁旄資保障豈容解組遽歸田逍遙莫作終焉計半壁天南望瓦全

馨香萬戶壽祠虔且喜蒼生望未愆潞國威名震荒遠贊皇奇計著籌邊荆天棘地嗟文網黍雨棠陰結後綏他日鶴書徵召起乾坤一擔荷雙肩

次韵和邑侯梁瑞知同年留別士民四首

顓頊無能詔駟工春婆一唱夢匆匆怨言廉叔遲今日抗志子奇希古風起廢箴盲殊墨守折衝剖斗闢莊蒙一方百姓望如歲兩漢循良將毋同

愧我游蹤如轉磨違公顏色少傾襟口碑載道能詳耳舌本翻瀾爲達心事舉十奇精措治波橫千頃想淵深欲知樞物無遺處何異吸陽兼乘陰

百廢未興眠厝火張弛緩急在儒賢開源衣食非貧也入境規模頓煥然宓子鳴琴思過半庖丁游刃目無全試聽畫一謳歌起踵事何須嘆力綿

詞賦曾經讀左思純儒純吏可從知乘風宗慤徒嗶引啟事山



公匪徇私歲月突驚及瓜早泥塗轉恨識荆遲一言臨別聊相贈霖雨蒼生到處期

張鐸弟兄活棺殉難

不受花門婉從容大義伸舉家一灰炬千古兩完人木櫬甘生入杯穀且漫陳可憐小兒女亦解殉君親  
二子匹夫耳初無責任肩肝腸懸日月忠義薄雲天卞氏古今映友聞先後傳尤奇灰燼裏骸首竟渾全

徐特顯母子殉難

毒霧迷南極妖星照北城紅羊齊墮劫白首自全貞大節香爐峻澄心春水清君家元直在應與訂同盟  
一炬無遺憾相攜共返真還教乾淨土葬此老羸身太息忠悃事偏歸巾幗人裔孫興未艾已見貢成均

香爐峯春水泉並永北名勝地

某姓姑嫂赴井殉難

死或鴻毛朽微生惜一捐豈期閨閣輩竟蹈九重泉朝露甘同萎春花不共妍妾心原古井逆虜漫垂涎  
彼都衆君子樂善表彰勤茲事自千古鰥生欣一聞逆鋒前滅迹奇節永垂芬勵世兼摩鈍端資大雅羣

十月十一日由白塔起身北上衆親友設餞於桂香亭畔

飲盡一杯始揖別

一吸長亭酒風雲壯遠征題橋司馬志贈策繞朝情堤柳如相  
送征衫何日更壓裝無長物書劍一肩輕  
揖謝衆親友長亭勝錢彰馬嘶驚別夢驪唱愴離腸白日愁空  
過青雲待激昂此行關出處切莫等尋常

祿豐縣題壁

擁被尋鄉夢披衣怯曉寒馬欺詩骨瘦愁仗酒腸寬驛路行彌  
遠家書欲寄難雁行分影去雙袖淚汎瀾

洪江夜泊

正月十三

十里送灘舟洪江一望收帆檣驚宿鳥燈火射潛虬曼衍呈諸  
戲蒼茫起百憂故鄉今夜月應照幾多愁

沅江道中

又放沅江棹春波湧霽光輕帆隨港轉斜日映湖長堤柳茁新  
綠萼花翻嫩黃洞庭如許助一葦直飛航

過洞庭湖必俟順風俗傳洞庭龍君係雲南人凡同鄉至者皆

得順風洞庭梓桑之惠也  
趙松泉同年爲文以祭之

七月中廣西匪事日棘制府岑公奏請揀發人員趙潤之  
李少宗孫采臣宋石臣張景周皆與選治裝將行趙李兩  
君出摺扇屬繪率題二首



請纓喜同志聯翩共岑京華勞逐逐歲月去駸駸撫髀暗流  
涕贈刀明素心寰瀛多事日洒恥貴從今  
一寫煙霞景聊爲誌雪鴻氣吞巖壑壯筆掃海雲空出處跡雖  
異經權道自同澄清從此日何以信初衷

重陽日入大學

學業浩煙海工夫著手難都門萬人海太學一枝安宏啟千間  
廈因憐多士寒真才寧靡靡漫侈帝恩寬

物競紛繁日須求優勝功離家兩昆弟努力各西東一水海天  
隔尺書郵路通挽迴繫人力吾道豈終窮  
家國蒙艱難因秋劇可傷旅行數千里客過幾重陽寄食慚烏  
哺聯翩羨雁行茱萸同插處應向薊雲望  
合共嘗薪膽寧能辭苦辛欣逢同舍友不讓古前民風月都無  
意圖書日與親煌煌煌典型在勿僅步歐塵

送席何兩君游學日本十一月初十

大陸風雲變須求學戰優幕巢悲祖國書劍出神州驥足開雲  
路雞聲夜驚籌海輪直飛渡努力壯皇猷  
並是西雨秀苔岑契誼眞同舟看郭李挾策恥儀秦學海探奇  
境蓬壺誤昔人尺書頻惠我勿爲滯音塵

同作天涯客離家路八千男兒聊復爾鄉井亦徒然措拄資羣策遨遊及壯年向輸歐化入東權正踞筌

不盡中年感猶殷嚮道心他山方借石寰海遠分襟東亞妖星

定學期十年頗合樂羊之數

烟西鄰禍水深望諸成績在翹盼嗣徽音一唱陽關曲因之自赧然早懷宗懋願偏讓祖生先芳草瀛洲路東風海國天二三知己晤應與話幽燕

冬月十四爲陽歷正月初一日

清明日緘東信有感

令君重興學游子輕去鄉一身書劍在萬丈海波揚獨有憂時淚誰爲活國方天職與民職夙夜總惶惶

客過幾寒暑春風感不禁問年驚馬齒力學戀駒陰佳節蜀山遠相思瀛海深何當風雨夕聯榻共談心

哭立人四叔

時署武定州教授卒於省垣迨奉鶴慶實授之命已不及見矣

最是傷心處荒山夜讀書追隨曾象野睽隔竟燕都誰恤衆兒女徒從先大夫虛聆懸肘印一職况匏瓠

作客逾千里游仙僅五旬應憐遠游子痛念未亡人幾度空陳策連年莫救貧河東賢伯仲澤骨感深仁

一別甫三載相違長此生鐸音沉客邸哀耗遞神京曾否韓詩念難禁阮淚傾滇雲南望處觸目總心驚



十二月十六日與黃仲笙同學談

入學匝三載新思掩舊聞寥寥數知己落落更逢君操守探王  
陸光陰惜寸分勗哉時過渡珍重保斯文

千頃汪汪度君家舊有名更祛門戶習獨見古今情不厭傾談  
數應虞鄙吝生蜀滇遠相望記取證前盟

八月初一伯兄自東來京暢聚數日復同至津門流連六  
日始歸歸後惘惘不快者數日因書以誌之

滇海一爲別征塵西復東悲歡逾昔日離合正秋風

今相逢在都仍八月也然轉瞬已六年有餘矣談助番叢雜奴呼島語通

宿扶桑館內和式也因兄此行未攜行李聯牀

徹夜話卻忘在都中

小住津門外歸途少息肩北門今鎖鑰西耗昨烽煙臺上誰尋

駿橋頭莫問鵲梨園西幸後猶自盛歌絃

萬里同爲客匆匆公與私半生憂患日尊酒縱談時壯歲幾回

見家山一例思國身兩珍重揮手卽天涯

己酉元旦書懷

己是還鄉里依然作寓公一身竿隊裏百感爆聲中微命知磨

蝎前塵認雪鴻更新瞻氣象杲杲日生東

紀算時方壯傾談氣自豪執鞭猶碌碌逝水去滔滔撫髀無長

策搔頭見二毛歲華焉我待淵羨莫徒勞

遠大常期許吾生忽壯年從前嗟種種毋漫詡翩翩首蒼知新

味芸窗識舊緣鵬搏仍此志何事問青天

放眼空寰海行行逐隊魚欲酣千日酒悔讀十年書爭競紛塵

芥崎嶇識世途天心猶未艾珍重紀元初

惺甫孝廉續絃赴蜀作此送之

宣統元年二月

蜀水滇雲各一天紅絲肯信繫良緣彩鸞端合文簫偶如此鴛

鴛不羨仙

文陣騷壇早擅長況懷鉛槧涉重洋乘風意氣拏雲手不讓喬

家顧曲郎

長康家世比肩人讀畫抄詩妙絕倫遙想洞房添樂事雞林風

景話前塵

以茲穠艷儷清才鶴雀丰姿絕點埃桃李欣欣待扶植雙飛彩

翼速歸來

梓鄉疊賦繫維篇往復佳期幸未愆恰值清和天氣好銀檠重

結藥珠圓

銀河渾不隔西東冰語先煩月老通

冰人爲月村先生語意雙關

料得催妝詩寫

就陽春高調和難工



浣花溪畔水潺潺百輛迎來俗例刪薛井泉香渝酒煖喜看黃色上眉間

陋他玉質與金夫嫵媚還誇滿腹書我忝十年同道友樂觀盛事紀元初

艷稱大小兩登科學貫東西更足多緣綺窗中頻問字簪花餘事寫歐羅

春風小別在昆湖一幅鸞牋畫得無余繪昆湖送別圖來日爲君重寫照十眉百子兩新圖

宣統二年三月十二日徐茗樵司馬以詩見貺並索和章賦此奉答

茫茫滄海幾揚塵肝膽相遭氣誼真覲面頓知名下士談心恰是個中人才非百里牛刀試胸有千秋驥足伸毋負出山霖雨志喁喁想望慰斯民

底事相看百日忙恐將七尺負昂藏小臣慣作憂天語大局誰籌活國方言鉅已知爲計拙時艱未悔此心長半生事業蹉跎甚愧比前賢魏邵陽

哭瘍子祖裕

枉負蓬弧願三朝已咳名河魚沈痼疾兒腹痛啼哭不止舐犢戀餘生弱

命難言數癡情欲喪明短牀啼宛轉灼艾痛阿兄

斷續終何疾悠悠巨一春竟無活汝藥終未乞靈神

余始終無祈禱之事

殘

喘延難久難容憶尙真最憐綿啜際淚眼徧窺人

記得嘒聲試賓朋謬獎優笑頓解人意療治罄醫謀病已深肌

理心原泯怨尤短修同不免身世等浮漚

旬日絲絲氣猶餘一縷呻孤燈寒四壁倦眼對雙親徒憶占熊

服日本保壽園奇應丸驅蟲散仁丹諸藥均無效

夢應憐磨蝎身漫漫蓬島藥嘗徧莫回春

醫家謂指紋透甲則病不治

不盡更生望終無一線還彌留猶吮乳脈絡早通關

含弄虛堂上攜持杏膝間平安書寄到一語愴慈顏

拚擲春宵去倉皇夢不終未知醫藥耗始訝客囊空啼夜如鵲

苦將雛直鳳同劬勞憐爾母病劇強從容

叔氏歡相聚摩挲極愛憐醫方勞共酌魔病不成年庭角顏先

改珍湯手自煎尺書來海上猶問幾曾痊

中歲多哀感公私細較量庭除無樂事家國有餘傷一掬英雄

淚千迴兒女腸呱呱鄰舍子夢境尙迷茫



定庵詩存卷之二

姚安由雲龍夔舉撰男振新羣鐸校字

赴大理途中書感臘月十五自省啓行

奇

南來遂三載事業果如何兀兀皋皮擁莘莘蠶舍歌栽培及葑  
菲鬱勃望菁莪幸雪虛聲恥憑他齟齬多  
無滋他族類逼處最堪憂授柄甘錙錕齎糧長寇仇天心如可  
問人事總宜修脂韋成風習誰爲借箸籌  
十五年來事猶堪一一思壯懷應不減世故本無知閱歷偏成  
拙逢迎總是癡北山重過訪魚鳥漫相疑余於丙申赴試楚雄登城樓遠  
眺慨然思舊今重過有河山之感

又作西行客曠懷蒼洱間裁成况人士寄託在江山且喜囂塵  
遠漫稱湖海閒昆華回首處雙袖淚斑斑居昆明三年不能無離別之感  
流寓連年慣行行又別離風光重惜別時事不勝悲雲嶺家千  
里兼葭水一涯揮戈猶此志況瘁又奚辭  
上智早英發下愚終不移生平成敗事大抵壯年時舊政空輪  
廓新知亦相皮前途亟珍重歲月似駒馳

附詩餘題畫

時中日交涉甫結歐洲戰事方酣  
譜滿庭芳一闕寄意乙卯暮春

西土茫茫龍跳虎躍一時血濺玄黃算來結果誰弱又誰強  
且趁國家閒暇整頓我內治精良綢繆早時乎不再稍縱逝  
流光 歸田何日遂一庭松竹半畝芳塘更羅儲今古萬卷  
縑緗閒對清風皓月芸篇展仔細平章浩歌起聲逾金石睥  
睨世炎涼

壬子六月朔方守永昌至小保場勘案畢宿觀音寺傍晚  
寺門外遠眺二首

東西平峙兩山頭綠野芸芸一望收傍晚斜陽頻散彩乘時好  
雨潤如油當前景物饒生意壯歲韶華等逝流何事簿書勞軼  
掌林泉歸去足優游  
每值登高涕淚橫萍蓬身世感浮生家庭早負天倫樂社會猶  
餘悲憫情叔季人心雲雨薄共和官吏羽毛輕任呼牛馬何須  
計且混黃鐘瓦釜鳴

濬河至青楊村大關寺因上哀牢山一覽

哀牢直上勢嵯峨逶迤盤蛇到半坡列岫平添眉上黛膏原如  
數掌中螺蠻風剽悍今猶是文教荒涼疾已多毗庶未亡三代  
直年豐猶自頌恩波

卸郡守篆自賀二首



卸除符綰一身輕，泉水出山懷此生。半載塵勞終古恨，中宵魂夢此時清。無官反博妻孥喜，有口猶聞父母聲。最是共和開幕始，問誰名世理殘評。

拚棄微官罪不辭

屢辭始獲請

鳴梟腐鼠漫相疑，明珠且負無端謗。片

石空傳紀念辭，夜雨敲簾心自靜。秋風入戶鬢先知，翠湖便作西湖老。捲束詩囊莫故遲。

### 三十六初度

少小能文志自豪，崢嶸頭角邁羣曹。竟辜國士三千選，忽漫春光卅六遭。書似診癡難濟用，官如沆贅等閒拋。未酬母難終天恨，獵獵悲風徹夜號。

### 蓋臣守戎招飲鶴雲寺樓卽席示黃子容太守

二首

層樓佳夕敞瓊筵，坐對河山色黯然。數點宵燈明近市，一輪秋月湧中天。悲歡幾許人間世，今古如斯不計年。須盡東南賓主興，莫教晶鏡負團圓。

曾記蒼山去歲遊，賓朋蠟屐共句留。照人猶是中宵月，閱世偏經兩度秋。亂後瘡痍滋隱疚，風前笳鼓盪邊愁。願君一雪虛聲恥，比似黃瓊壯遠謀。

### 題歐陽荷生詩集丁巳冬

歐君夙好遊踪跡徧南北太華高峯高滄海波無極麗景豁心胸奇情染翰墨纚纚窮物相續續動顏色我昔綰郡符同居哀牢國朝夕促膝談與君致相得今再誦君詩前塵猶可憶時事悵橫流誰施障挽力君詩發其覆語語極深刻倘以措施行樹立定絕特古來能詩人豈必居顯職煌煌吟篋編自堪金石勒君方努力爲勉旃古是式

題吳子瑜西山別墅

塵鞅勞勞苦縛纏西山一別動經年羨君卜築巖阿好許我銜盃林下傳不問龍蛇紛起陸果然鷄犬盡成仙更於何處尋幽隱此卽桃源一洞天

登樓凭眺水潺潺對此茫茫百感紛但少風波斯樂土儻來富貴總浮雲山林畢竟饒真趣樽酒何妨取薄醺莫放春秋佳日過褰裳鼓棹更從君

曉赴西山

戊午正月二十二日

綿衣未卸警霜嚴一舸隨風入蔚藍十里湖塘回首處綠楊城郭似江南

昨日輕帆傍晚歸今朝景物未全非春風似識偷閒意送我看山願不違



己未初冬飲錢塘江酒家

錢塘江上小句留一曲琵琶轉玉喉不是江州司馬到也應清淚濕衣裘

江干遠眺

江干傍晚雨霏微葉葉風帆逐浪飛如此江山耐尋味未須遽唱不如歸

金山寺浮圖

廿年夢想金山寺今日來從北固樓直上浮圖高七級遙看焦洞滙雙流勳名南宋都消歇衣帶東坡作鎮留不盡登臨桑海感寺前彌望半山邱

前此金山寺抱山環水今則皆成陸地距江數里矣

焦山枕江閣

最高樓上俯江流萬疊雲山一望收三國分爭成往事六朝更代等浮漚相臣墨蹟千秋在名士丹心一軸留過客往來頻展玩精神奕奕紙間浮

寺僧出楊文襄楊椒山兩公墨蹟共覽題跋極多又對面北固山俗傳上即甘露寺劉備招親處實即多景樓

贈大休上人

浙江山水天下奇西湖勝景尤夥頤四圍葱翠如渲染中開一鏡澄玻璃高僧墨客競託足園林蘭若相參差我來正當酷暑日不逢佳士傾心期沿湖剎宇恣探訪方外何人堪師資大休

來自峨嵋頂矯然獨具凌雲姿釋典爛熟祇神會不屑律藏空  
矜持曰抱一琴彈古調襟懷落落稀人知餘事並工詩書畫清  
奇濃淡罔不宜叩關相對忘晝永清言娓娓沁心脾有時佳釀  
注瓦甌興酣落筆何淋漓方今八表盡霓旌吾輩俛俛將何之  
不如與子共隱遯日理七絃夜敲詩風雨晦明有眞賞身外浮  
名視等夷

壬戌夏日養疴西湖晤翼舉世兄喜而有作三首

己負平生志沈疴益趁衰湖邊樂閒散海外喜歸來黃色軒眉  
見青山倦眼開故人不可作執手一徘徊其父觀臣與余有  
蘭交物十年矣

回溯哀牢事匆匆遂十年嘉君能努力愧我竟華顛滄海橫無  
地明湖別有天西窗同剪燭情話各欣然

時事江河下迴瀾豈異人衰慵空白日茶苦正青春故國瘡痍  
滿蓬壺學業新歸期堪屈指相待翠湖濱

壬戌九月攜兒重遊金山觀坡公玉帶率書二絕

昔年曾此拜遺簪桑海重來感不禁寄語山僧勤護惜驚馬駭  
浪滿江濤本年颶風數次沿江沿海皆受其害海  
內亦風潮迭起動輒不安故云云

人云可殺天方惜道不趨時公太癡並世奸諛盡何往爛然遺  
物繫人思



壬戌臘月初四發滬上留別香圃子青諸友

何論海角與天涯但少風波便是家今日申江復分手離愁翻  
比出門加

二三朋輩唱河梁又趁颿輪向故鄉劇惜江南好風景何時重  
到理遊航

人海茫茫著我閒升沉得失竝無關年來中有膏盲疾祇在煙  
霞泉石間

名勝窮探竟鬱紆不辭南北幾舟車此行打點歸家計細數游  
踪讀舊書

汕頭舟中

海上浮槎五日程巨鰲蹴浪負山行連年例作舟中客睡足風  
聲與水聲

宿河內

輕裝又向越裳歸雜沓歌呼入耳非回憶江南如畫景夢魂猶  
逐片帆飛

癸亥七月二十八日曉夢初醒大雨驟至卽枕上口占一律

曉寺鐘聲和雨來朦朧睡眠倦難開恐忘舊夢重追憶愛琢新  
詩費翦裁成詩每於枕上馬磨牛醫皆可伍鼠肝蟲臂亦因材縹緲盈架

山排闥雅稱疏慵養不才

余自辛亥年就西雲書院辦省立第二中學兼師範學校  
迄今十有二年校中畢業生盡職於各界者咸推美於余癸  
亥冬張君勉之到省爲余述及感而賦此

桃李陰陰手自栽十年不斷報花開東風二月春如錦都受西  
雲雨澤來

遊金馬山陪宴美國公使舒爾曼博士不到此六年矣

癸亥冬月二十

林巒不改舊清奇笠屐重來鬢有絲倚屋茶花高過脊緣坡楓  
葉艷於脂鐵旗銅瓦空塵蹟玉兔金烏感歲時

韓琮詩金烏長飛玉兔走青鬢長青古無有

鸚鵡山頭一憑眺勞勞俗累豁襟期

萬里浮來使客槎玉梅香裏共停車玳筵相向殷酬對寶劍曾

聞逐疫邪

廊下陳真武祖師曾用之大刀寶劍相傳顯聖逐疫疾瘟邪者

無瑕當前麗景休辭醉雲海相望道路賒

薄醉有作

癸亥臘月六日

簿書期會曾何補馬足車塵有底忙已分功名成草草坐看歲  
月去堂堂讀書猶冀年堪假對酒焉知老至將一醉放歌天地  
窄不須著蔡問行藏

歲暮讀書涵翠樓

臘月初十



高樓築向翠湖濱，玉軸牙籤列架陳。  
韶景虛拋年易晚，奇書補讀味彌真。  
雲山三面如張畫，風雨中宵覺有神。  
閉戶不嫌人寂寞，冥歌呼元白在比鄰。

游曇華寺看花

甲子正月十三日

欲擬稽生七不堪，城東花事試幽探。  
韶華始覺辜人境，紅紫偏宜鬧佛龕。  
勝地來如空谷足，軼聞傳賸畏廬談。  
林畏廬有劫外墨花傳奇小說豚蹄漫祝汗邪報，醉飽無功祇自慙。

贈樹五古逸愚若鼎臣皆比鄰也

九龍池北會城西，衡宇相望比屋齊。  
釣水儘饒鮮作食，看山毋事杖扶藜。  
鷺鷥跡近人忘俗，雞犬聲聞夢覺迷。  
詩酒談諧朝夕見，未須風雨詠瀟淒。

題餘姚毛母余太宜人傳後

橫流滿目世沉酣，藩籬摧破德二三。  
賢哉毛母衆所誥，重闡奉侍樂醴醢。  
鵲結糠覈能自甘，任卹親族訓子男。  
女師德象夫何漸，是宜百代香花參圖詠。  
傳之爲美談，振勵頽靡激頑貪。

甲子花朝前三日，與保權伯璵偕遊觀音山。  
至大觀樓，因輪船機壞不果往，遂歸戲柬兩君。

盈盈一水隔春波，葦渡焉能效達摩。  
幸有大觀來眼底，何輪勝

賞在巖阿古云飲啄皆前定我輩情懷自足多一事尤堪稱快  
意屠門大嚼罄叵羅

三月四日聞子規聲次日有金馬之遊觸緒成詠

九十韶光百轉鶯昨宵又送子規聲春來無雨花偏發

本年尚未雨

談到看山趣便生庶事自知難報最尤官祇計早歸耕

實業無款即有款亦

不能辦一事也

霜華已上青青鬢俗狀塵容何日更

進固無心退亦難橫流何地保平安一麾遽入烽煙窟

守永昌有兵變之事

十載重遭政海瀾逐隊笑魚分溼沫嗜書如蠹惜叢殘鹿門栗

里猶人耳莫作神仙天際看

游華亭寺

三月初七即四月十一

修禊纔過上巳辰斜風細雨絕囂塵筍輿不礙穿蘿徑瓜艇端  
宜理釣綸茶銚粥魚清淨土青雞白犬葛天民便須一盡登臨  
興莫遣山靈暗笑人

八月十六自大觀樓放舟遊觀音山

曉日瞳瞳宿霧空遊船盪入水雲中螺眉初過千山雨鷁首如  
乘萬里風不問龍蛇興大陸卻探蛟蜃俯幽宮奇峯疊翠波浮  
綠如此湖山畫不工  
塵外來偷數日閒捨船拾級更登山漁村蟹舍嵐光裏梵宇琳



官樹影間代謝遽驚寒暑易再來不厭涉行艱同人有春初來遊者重遊則寒暑已易矣

何當小築三椽屋時與鷗鳬共往還

中秋纔過月華明透出層雲分外清  
邈想古人曾共照似知我輩亦多情  
遙吟俯唱賡絃管澹慮澄心有梵聲  
浩浩天風中夜起又騰雷雨潤蒼生  
半夜雷雨交作

昔年曾泛普陀舟雲影天光眼底收  
復此西山同選勝居然南海又重遊  
視今視昔塵中夢觀我觀人水上漚  
惟有佛心常自在滄桑閱盡世悠悠

壬戌漫游江南北返寓滬濱有懷古逸愚若樹五諸君追錄舊作

不欲南風競天心詎可知邊聲鼙鼓動除夕羽書馳別思從滇

道輕裝又滬涯萬方同一概去去復何之行矣  
江南北春來水拍天故鄉無此好佳日未輕蠲對景知何

似懷人意渺然屋梁多少夢夜夜落游船

大雅陳夫子由來事事精理絃山水契落筆鬼神驚間有軒渠

語都如夙構成壯遊知倦否足跡徧寰瀛

河陽種花手歸去幾霜華松菊陶三徑文章溫八叉酒宜澆壘

塊曲不厭箏琶可有鴛湖夢前民問竹垞

荒荒四山雪高臥老袁安蠓角憑時輩龍頭屬歲寒詠歌出金

石庭砌茁芝蘭自有千秋在楹書付二難

故鄉望不極身在古匡廬巖窟堪招隱羈懷歎索居雕搜靈運句摹繪輞川圖行篋歸來日新詩尙起予

題友人所藏王石谷畫冊

去年探勝到廬山雙劍香爐縹渺間歸展耕煙尺幅畫猶聞瀑布響潺潺

層巒疊嶂境深幽佳樹葱龍映碧流妙筆獨專邱壑美甌香爲遜出人頭

壽陳古逸六十五月十九日

先生學佛不學仙無罣無礙心超然先生能書兼能畫指上烟雲俱入化琴禪舍與涵翠樓衡宇相望氣相投祇慚塵鞅猶束縛未若先生樂自由蒲觴泛過桃觴啟覽葵花甲週復始憶從射策登明光二十年來變滄桑至今已入不退地紛紛頌禱誠多事但留金剛不壞身看他泱泱大海幾揚塵

題胡芸盦繪姜孝子圖

是兒非等尋常乞日進和甘博母歡難得雲盦寫生手傳神阿堵萬人看

亦有食瓜捕魚孝肫肫矇誦事同符於今教育施盲啞得似斯



人至性無

附錄陳筱圃先生題句

幾人淫佚幾驕奢富貴場中路易差玉食錦衣何足羨古來孝子出貧家

目擊心傷亦大難天盲其目得心安世兒豚犬多無賴只恐開眸不忍看

趙樾村先生題句

孝出貧家孝乃真自調甘旨跪供親雲盒鄭重揮金管不貌王侯貌此人

亦能巾幗擬汾陽躋跼兒孫臭滿堂爭及鶉衣真孝子一匙賸飯有餘香

題陳嵐青先生觀我生圖

戊午年作補錄

昔年讀公集蕭灑絕纖塵今日瞻公貌藹然彌可親古稱仁者壽斯語信而真第九初開秩蒼蒼一樹椿

公昔膺民牧牛刀一試鋒棄官如脫屣閱世等飄風詩酒生涯裕朋儕臭味同心香存一瓣

原稿辨字

躡履步前蹤

重修大觀樓落成

戊午年作補錄

說法人何在蒹葭水一方危樓煥金碧勝地感滄桑興廢原無

定維持賴有常平湖五百里登眺極蒼茫  
占斷昆池景重瞻傑構新流年真過隙往蹟盡成塵水木清華  
地風光澹蕩辰好尋侯叔起把釣莫逡巡

除夕蓴鷗惠梅花果餅

昔我居卽都寒梅遶書屋每值冬春交對花勤誦讀書既有餘  
味花亦有餘馥忽忽四十年塵鞅勞馳逐不逢驛使來冷香縈  
夢轂蓴鷗大雅士經綸彌胸腹逸興託山林餘事見涵育贈我  
一枝春橙餌伴芬郁佐飲酣屠蘇比鄰喧爆竹轉憶髫髻時此  
景宛在目兒孫今滿前我意殊蹙蹙蹙蹙果何爲米當珠量斛  
嗟爾嗤嗤輩何以資事蓄

少小逢除夕欣欣恣嬉戲稍長逢除夕頗勵飛騰志迄茲將艾  
年翻恐值歲事去日苦已多空嗟伏櫪驥默省一年中得毋縻  
疵累檢身若不及遑有進取意垂老而猶狂古來所憎忌所以  
賢聖言良時不再至我媿建樹無鉛刀徒相試安國與養民所  
圖百不遂願學東家某假年以學易

乙丑元旦書懷

臘雪初銷遂入春東風又感物華新推遷時序人將老塗抹東  
西事已陳翻笑鵑鳶偏嚇我自憐牛馬聽呼人他年重檢鴻泥



記故紙堆中過此辰

題和萬松絹本蛺蝶及鶴鶉圖

芳草芊綿間落紅翩翩五采颺微風寫生妙手滇雲見不讓滕王設色工

曾見雲山潑墨雄又看花鳥寫來工羨君一管生花筆兼學南田與石翁

附錄趙樾村先生題句

蛾眉探勝又羅浮仙蝶因緣兩處留不學滕王摹搨本蘧蘧有夢效莊周

好花娟媚嶙峋石石畔鷓鴣意態馴畫苑吾鄉寥落甚眼明初見後來人

莫春再遊明家地村名也上有寺曰永興庵三面環水

小艇輕移向郭西綠陰一路鳥頻啼番風已過春將老勝地重來酒共攜不遇高人理綸釣卻看健婦把鋤犁杜鵑謝後茶蘼了鸚粟花開欲上隄

七月四日邀劉顯丞陸雲高林伍彭鄭諸君遊西山卽席有作

西山峯巒可十數此是巉崖最高處呼吸直欲通天庭恨無謝朓驚人句我來恰值新晴天秋風萬里開雲煙山川歷落堪指

數田疇方罨都連延南望征塵動笳鼓干戈重惜生民苦何當  
靖埽欃槍星勝遊再爲山靈補

西山石壁有龍門獨立其上拍一照焉

最是龍門迴出塵危崖千仞勢嶙峋萬山沓匝羣流競上有蒼  
茫獨立人

七月十六日四十九初度偕古逸愚若樹五遊高曉

日月跳丸相趁走流光又到幽風首年華一度一更新遂令黃  
童成白叟世事方如亂絲堆安得快刀執在手簿書碌碌不自  
聊且喜素心得良友招邀放棹西城西天霽月圓信非偶捨船  
直與叩僧關大聲問雜蒲牢吼去年曾此醉留題飛鴻泥印猶  
在否熱火爲烹新芽茶得魚好佐夙藏酒倚欄縱眺豁心胸水  
月光明徹戶牖談諧搜抉古今奇俗士竟欲關其口況復山水  
樂趣真何必金印懸諸肘相期來歲續前遊不辭醅酌酌大斗  
次曰遊安甯溫泉

見說名泉勝時時作夢遊今番踐宿約佳日趁新秋幽谷偏紆  
曲明河卻倒流澡身兼浴德相與證源頭  
扼塞連然地千年漢史傳石淙有奇士金匱得名篇樹古雲濤  
寺花深碧玉泉清遊猶得共賴是宰官賢



索讀摩崖字升庵蹟已荒連岑鏞蝌蚪一水繞螳螂信宿剛圓  
月幽探到夕陽龍山無限好收拾入詩囊對岸龍山尚有聖水灘音曹溪寺諸勝以河水咸澹不克往遊  
何事強人意徒嗟馬齒增假年猶可學涉世總無能不盡登臨  
興相攜直諒朋匡山遙在望吾意正飛騰宜良有匡山湯池同人咸留後約

八月十五夜無月次日有西山之遊

望前夜夜月光明底事中秋不放晴想是天公多醞釀留教皓  
魄助詩情

十六日至西山積翠闌連夕朗月相與賞會至夜深始罷  
衆山木落一峯高坐看清輝上柳梢萬象沉沉音響寂有人得  
句話深宵

題張仙殿四首

鬱紆磴道陟盤盤到此湖山極大觀已是劫灰經再過風光莫  
作等閒看

寸心難忘故君情圖畫張仙託姓名若使蜀人有男子宋宮焉  
得貯傾城

美食豐衣無一人何須歎息恨前因縱然解甲歸疆土猶有仁

慈逮下民蜀主孟昶嘗歎曰吾家以美食豐衣養蜀人四十年今日乃無人為發一箭

也非孟昶也非仙祀舉高謀理則然禍福從來由自己生男生

女兩無權

宋竹垞謂今世所祀張仙即禮月令祀於高禖禮曰帶以弓韜祀於禖下禖之祀廢而仙祀舉焉非文昌星亦非孟和也

### 上三清閣

攀雲直上鬱羅臺日月堂堂我又來漫道江山不復識百端懷抱一時開

### 龍王廟

四面波光屋數楹當年曾駐水師營扁舟一葉隨風至便有江湖萬里情

### 九日萼鷗招同樹五惺甫遊鐵峯庵卽席有作

露冷霜清九月天憑高一望色澄鮮置身巖壁衆山小極目關河四塞圓霜葉也爭楓樹艷晚菰恰上菊花筵眼前風物方淒緊縱覽晴空一灑然

十年重到鐵峯遊勝蹟猶堪次第搜風磴屈盤千壑上雲門雄踞萬山頭壯心偶爲登高發韻事何妨埽石留（是日刻石留題）卻憶韜光觀海地可堪又起戰雲愁唐殿極似韜光是時有何孫之戰

### 臘月四日偕樹五遊黑龍潭謁薛墓看唐梅宋柏

薄游訪古並探花人與梅花屬一家鐵骨冰魂同不朽剎那桃李任繁華

好事還推民國盛湖山勝蹟備褒傳孤芳終古自幽潔寂寞寒



潭三百年

興雲導雨豈無靈  
水底潛虬喚不醒  
遮莫龍蛇紛起陸  
卻甘隱處葆神形

斑斕壁上舊題詩  
名士名臣各一時  
畢竟暗香疏影句  
不施塗澤自清奇

老梅蟠地柏參天  
種自有唐炎宋年  
鶴骨龍姿春萬古  
那知塵世幾風煙

推美山茶當大魁  
默齋書語太奇詼  
若論生色邊荒物  
鬱鬱龍泉幾樹梅

涵翠樓四時詠

吹縐一池水  
東風陣陣來  
山林半城市  
煙雨幾樓臺  
鳥語清歌徹  
花光粉本開  
登樓試瞻眺  
疑在小蓬萊

漣漣波四面  
蘭若正當中  
萬柄芰荷雨  
千條楊柳風  
納涼翠成幄  
招飲碧爲筒  
欲問九龍子  
蒼茫雲水空

征鴈又南返  
遙天清唳高  
秋聲起木末  
黃葉下亭皋  
風物自淒緊  
詩懷破鬱陶  
相期松柏性  
甯讓歲寒操

衆木盡搖落  
西山逗屋檐  
天高霜氣肅  
夜靜雪聲嚴  
黨帳羊羔熟  
朱爐獸炭添  
蕭寥一閣上  
獨擁萬書籤

性不喜近火雖冬日不設爐

題張贊卿將軍壯心千里圖

哀牢山高江蜿蜒磅礴鬱積鍾英賢下馬能文上馬武縱橫殺  
敵無當前東溯湖廣西金齒戰功一一皆堪紀奇績尤數靖泮  
荆至今威稜震邊鄙泮荆苗賊慣跳梁搶攘奔突頑且強偏師  
直擣虎狼衆虎狼兇餒翻鵠張麻哈城邊陣雲黑鼓聲已死援  
兵絕終令主將得歸元拚向疆場裹馬革將軍信非尋常人忠  
肝義膽何嶙峋六十罷官八十老意氣猶欲干星辰楊君獻琪  
寫生手圖成奕奕神抖擻祇懷老驥伏櫪心富貴浮雲夫何有  
文孫忠孝精誠通遺物得自刼灰中惜不圖之凌煙閣徧令國  
人瞻仰欽英風留傳家乘光厥宗百世興起其視公

丙寅七月十六日五月初度先一夕邀同古逸子瑜愚若樹

五小秋諸君子泛舟遊太華山

暑往寒來歲又週年年初度計新秋萊公覽揆偏先我蘧氏知  
非合與儔少壯光陰逝奔馬生平心跡證浮鷗囊琴榼酒招詩  
侶又上華山續勝遊

黛影嵐光竝西嶽雲華寶樹擁中台崔巍佛殿諸天拱婉演河  
流一綫來寢處自饒山澤氣傾危端仗棟梁材（時重建佛宇）鬢毛  
雖白豪情在酌唱應須盡百杯（原稿佛字）



五十自述

人生縱百年三萬六千日一日復一日去如流水疾何況百歲人千萬未逢一上壽八九十其次六七秩所以曠達士行樂貴及時修學當務早立名亦恐遲功業與著述汲汲謀久垂我生懷抱者似同而實異既稱萬物靈又丁文明世形上或形下一須默識名言繹儒佛哲學窺奧義理化探其源動植格而致更爲汗漫遊萬里騁風煙橫絕太平洋莽莽別一天瑰瑋窮殊狀黑白極熾妍歸來坐斗室插架列奇編萬象萬殊理森然羅吾前奇文苟有會得意亦欣然惟有保蟲類情態多變幻顯鏡不能窺巧歷不能算閱歷數十年望洋徒興歎咄咄止茲事終作門外漢外此縱奇奧鑽研思過半艱虞何所戚豐亨何所怵飲水知冷煖前定無泮渙湖當舞勺年孤露失嚴親懼貽門戶辱攻讀忘苦辛獵取畫餅名無補心與身刼海歷成住世途感荆榛至今耐尋味咀嚼殊津津若數愉快事少小在西蜀瀘山傍叩海時時有游躅及長南北征名勝探水陸僑寓穀昌城老友居北屋詩酒見性情談諧傾心腹潛身書墨林躡足山水窟亦多稱心處絕勝饜梁

原稿梁字

肉悠忽始衰年事業終碌碌時事江河下猶食公家祿幸不辱先人衾影質幽獨蒼狗倏白雲世

事如轉轂毀譽風過耳賢否識藏目我自行我素安知剝與復  
宇宙寄蜉蝣滄海渺一粟仰首笑飛鳶腐鼠空逐逐

重九日邀古逸壽生愚若竹潭惺甫樹五錫九及釋平光螺  
峯山登高愚若有詩紀之余亦漫成二律

連日秋陰羃滿城登高失喜放新晴一聲雁唳天邊起萬瓦魚  
鱗眼底橫塵事未能忘憂樂寒花猶自見崢嶸莫嫌脫帽流風  
沫盤礴須拚酒共傾

俯遠憑高意若何不堪東望徧干戈八州縱復推陶侃五嶺何  
能限趙佗歷劫蒼生餘喘息效顰虛號擁共和年年例作重陽  
慶我爲重陽感喟多

游黑龍潭次夢澤原韻

天台曾訪舊龍湫萬里歸來續勝遊湛湛潭波傳故蹟蒼蒼林  
木迴高秋節同古柏千年勁花間寒梅幾世修倘得太平寰宇  
靖招邀應作十旬留

富氏楊母沈氏潘氏雙節歌

人生挺挺惟大節富貴聲華何足說板蕩之際識忠臣歲云暮  
矣知松柏賢哉兩母出一門前美後繼相題論陵谷遷變人雖  
往懿德苦行至今存沈氏賢母大家女柔嘉惟則周規矩來嬪



弘農婦職修遽值花門變端起夫子投筆事戎行內助直嫺洗  
與梁成功莫遂白首願僵屍馬革裹疆場孤幼煢煢待撫育畫  
荻含熊恩義篤兵燹崎嶇甘如飴庭階煜煜芝蘭茁是時寸草  
戀春暉有婦潘氏方來歸木鐸正勤宣教化安輿期得奉庭幃  
修文忽赴玉樓召黃鵠歌殘彤影弔誓將冰蘖終厥身不致琴  
絃彈別調婦姑相守撫雛兒淵雲曾史聲交馳苦節賢媛必有  
後益信斯語非子虛兩母均臻壽古稀堂堂雙節輝門楣賤子  
聞之敬且唏聊摛歌詞表芳徽小言何足爲珍奇百世而下欽  
母儀

讀烈婦張孺人傳題後

孺人王仲瑜觀察之母清咸豐末隨夫之雲州學正任任滿將歸次永昌而同亂作乃  
孺夫攜長子避蜀子道中死復命壯婢改裝負幼子行婦與女投井殉焉子玉麟長成  
之永昌訪舊居停湯老得其詳陳榮昌太史爲  
之傳歲丙寅澄波世兄出傳冊相晤爲賦此篇

勝清承平二百年豺牙虺毒潛滋延滇南金齒桂金田兇鋒暴  
發稱戈鋌覆巢之下卯無全賢母大義獨昭然無後不孝事當  
先君難我易告所天從容偕女投深淵寧馨能存母命蠲崑崙  
背負逃西川飛黃驥足終高騫至今陵谷已變遷藉口民主堪  
從權婆娑長樂霜盈顛有媿巾幗道義肩曷觀青史節烈編熊  
熊光燄千秋傳

丙寅除夕

已過新年復舊年陰陽各歷轉紛然從知臘盡梅舒蕊爲識春  
歸柳破眠國事沸羹爭水火兒時樂趣渺雲天四郊近報豐穰  
慶未復流亡愧俸錢

丁卯元日讀書

無事新春興最濃書城坐擁小侯封燈前細索青年味門外時  
迴俗客蹤每苦塵勞紛意念好乘休沐拓心胸何須別更求師  
友開卷名賢若箇逢

壽趙樾村文

時年七十七歲

影事陳園記最真軒軒眉宇見精神青年末學宏推獎蠶尾研  
經一輩人

陵谷滄桑遽變遷曾勞巡省重仔肩分符我亦隨琴鶴回首前  
塵十六年

西雲兵燹又重經蔽芾詩歌尙入聽爲問當年籌策善無人知  
是少微星

文章經濟並歐蘇壽考還兼毛與朱我欲重編者舊傳大年碩  
學似公無

五華山卽洞庭山書局隨身亦等閒三百餘年文獻寄彼蒼特



爲駐童顏

六十年來萬首詩渭南佳話久心儀拳拳鄉國差同揆矍鑠精神強似過之

陸放翁七十七歲小飲梅花下有六十年間萬首詩之句

收拾叢殘謬廁名表彰先哲賴耆英羣書跌宕恣搜採好古長生比老彭

濟勝猶稱腰脚健登臨處處輒留題模山范水誠餘事賸與他年史乘稽

五十一初度邀同古逸樹五愚若鏡澄泛舟至庾氏別墅觴詠竟日載月而歸屬孫君尊盒和君萬松各爲一圖以紀之

因題其後

秋波壯濶接空青畫槳輕搖到野亭嵐影當窗人意遠荷香入座酒魂醒今年歡會知非易近事紛呶不可聽好水好山能益壽况叨吉語祝延齡

如斯勝地稱疏頑四面空明好看山盡撲塵氛三斗俗也當休沐十旬閒無端警耗頻驚夢有象豐收爲破顏享用非奢天不靳年年樽酒對煙鬟

庾墅之遊愚若首以律句見貺再成絕句八首

何時憂樂願能酬霜雪駸駸已上頭他日編詩依白傅恰當長

慶二年秋

白太傅詩長慶二年秋我年五十一

請學久思樊氏圃薄遊卻借子山園少風波處自安穩何事桃花窮水源

素心三五拍肩來權爲湖山作主裁數首新詩尺縑畫奇情偉抱一時開

笙歌甘讓豪華士山水偏宜我輩人但得澄清無箇事便爲日

日過生辰

俗謂有酒食得安樂爲過生日

向子心期猶未償思飢思溺更徬徨駑駘我已無能役願效鵬夷一葦航

大觀樓宇遙相望華浦汀洲斷復連六十年來興廢蹟細傾盃酒話滄田

婆娑比似古梁溪水態雲容景物齊歷溯一年一觴詠又添名勝入詩題

新年屈指到秋風日在驚濤駭浪中今日扁舟任容與月圓花好謝天公

松泉作庾野觴秋圖見貽再題其後

扁舟一葦又輕航秋水澄鮮歎望洋節候乍驚鴻鴈至情懷幾共鷺鷥忘不材因得全天賦卻老何煩覓異方賸有佳詩與佳



畫描摹不負好湖莊

寫生妙手趙千里了了湖山景不殊名勝已曾傳貴紙紀遊重  
君曾作滇南名勝圖說  
百八十幅行於世與作新圖他年酒伴如相憶舊日詩情可共摹

過眼煙雲知幾許倘教鴻雪笑髯蘇

題如皋金竟恆詩卷後

麗句清詞落筆工多君武達又文通信非擗摭篇章比家學淵  
源有素風

翩翩淮海一青年振策南遊意灑然瀛嶠鵬程三萬里佇看風  
翻更高騫

題行樂圖

圖成行樂助劉填想見隋唐康盛年今日萬方正多難一家僥  
倖聚團圓

本係行歌帶索人一麾遽出綰軍民疚心十七年來事還我閒  
雲自在身

繞膝燕山五株桂一株遽折滬江濱黃金白壁吾何有只賸遺  
經付後人

眷屬新遷抱朴廬芸香滿屋稱迂疏十年早辦生涯事一桁湖  
山萬卷書

丁卯除夕書事

一年擾擾事除夕結總帳

歐陽公謂彝陵紙作帳簿最佳

今年邁厄運時局最波蕩

五日正嬉春風鶴驚七邑四鎮效鬻拳舉兵齊內向改革不崇  
朝誅求及錯盜方冀圖治安同心矢忠亮無端內訌起和平失  
保障岌岌只四旬迴戈擁故將重九殆陽九省門掀巨浪月黑  
又風高燄火漫城上東氛尤不靖鏖戰幾決盪堅城久難下老  
弱同凋喪盟約豈久要借兵重相抗自衛無再計吾軍果能張  
卻敵盡潰走委棄多甲仗外寧恒內憂古訓匪虛妄荏苒徧四  
境黨傾不相讓司農仰屋嗟庚癸呼轉餉在在堪深虞策畫疇  
得當躬親十閱月迴首徒快悵急流退身去冀免速官謗蒿目  
嗤嗤者中宵猶悽愴所願來茲歲民物得休養庶此予遺者或  
有復甦望

戊辰元日

舊歲光陰赴壑蛇履端此日最清嘉屠蘇有味綠家釀爆竹無  
聲減市譁

今年禁爆竹

聊撰盤銘書柏葉自添瓶水供梅花糕甜粥嫩  
徒增設別有琳瑯自奉奢

正月二十三日解職自述

髫年未閱世舉目皆善人嬉遊任所適觸處隨天真稍長事馳



逐睽步多荆榛及壯彌懷疑人各親其親甚者利害關機阱生  
笑嘖深情與厚貌何來懷葛民可知學不進賢聖旨未伸四大  
原假合聊復著此身但當本良知事事種善因因果相推爐積  
久俗美醇何得躬自薄而疑天不仁

逼迫始入官一心爲公計了無利祿念亦靡識趨避孜孜圖治  
心諒可質天地浸假厖吠聲蜮沙勝芒刺吐哺未爲賢同升豈  
曰義淪身一邱貉始免遭嫉忌我心奈弗昧我骨苦不媚寧饜  
藜藿甘肯遂渝初志豈無司馬安願從向常侍何爲繭自縛徒  
供造物戲昨者改革初聊與參時會而乃邁屯運諸艱竟歷試  
一朝得解脫洒然釋重累松菊未就荒詩酒娛生事琅函勤校  
讎探討無盡義卽此樂陶陶百年拜天賜

戊辰七月旣望五十二初度邀樹五古逸愚若鏡澄松泉美  
齋雲岑遊海源寺時近村有萑苻之警詩以紀之

秋至每不怡輒尋郊岐遊况感曦駕速彈指星一周言訪古招  
提相攜素心儔出郭一曠望景物紛迎眸連山疊翠巘大野沃  
綠疇躋攀到危崖奇雋窮雕搜澄澈天宇淨寥閬佛殿幽圓月  
何晶瑩照人情話稠吾生有真樂浮雲胡可留泉石愜心賞那  
復增煩憂所念四郊壘虎豹窺林陬恒產與恒心此理堪推求

倘各遂厥生甯甘居下流劍戟鑄農器棘矜化鋤耰庶期樂利  
同醇風採軒輶年年踵故事策杖娛清秋

白蘇兩公詩往往紀年歲

洪容齋隨筆  
有此言

王李兩公文浮生寄深慨

及時而行樂古人所同貴顧念區區懷頗復有同異及茲覽揆  
辰領略山水味山得壽者相水亦符聰智厥味殊清腴咀嚼無  
盡意歌舞金谷園酒肉黨太尉鯁生塊未能淡泊明素志一軸  
畫與詩珠璣盡羅置勝攜累牘詞徒爲通人棄

際雲四弟五十初度以詩壽之

戊辰八月二十九日

我生猶多難僦居在西蜀五桂無旁枝卯君情尤篤讓果復共  
被愛踰骨與肉丁年走四方蹴踏奮驥足我歸自薊門英才廣  
教育弟從革命軍義幟樹滬瀆一戰拔金陵威儀復漢族移師  
防鄂渚五載駐安陸浩然解甲歸鵬夷返初服轉得長聚首晨  
夕數心曲我亦鳥倦飛脫屣升斗祿箕踞擁書城琳琅森滿目  
相與析疑難怡怡忘塵俗各遂半百年我更逾二熟泉石同優  
游尊酒舉相屬餘生自可樂無事便爲福所媿白髮兄初無黃  
子木

東坡壽子中以黃子木拄杖又詩述卅年事聊以當嘏祝  
詩云但願白髮兄年年祝生日

秋意二首

四山喬木莽成圍一雨蕭蕭景物非纔覺炎威銷水閣又添涼



意入書幃丹楓耐老葉還變紅蓼經時花亦稀獨有黃華真本色自標寒艷傲霜肥

噉嘈蟲語與蛙聲徹夜苔堦聒耳鳴不辦公私徒亂意聊當鼓吹寫閒情山空老木紛紛下晝靜秋陰黯黯生且喜中天一輪月光涵萬有照虛明

九日望日偕樹五由華亭寺策杖登太華山攝影於石池畔

題四絕句

太華本峻特衆山齊繚繞置身在峯頭始覺衆山小  
看山共攜筇塵俗一擺落浮生半日閒心胸萬古拓  
湖上復有池峯上復景石抱取當無窮蓮葉深白惜  
兀立深山裏蒼茫人不知寧須世人識孤被山靈嗤

偕古逸樹五鏡登慈若錫九遊華亭寺九月十一日

勝境重來又二年琳宮著煥采人天期難力猶將事邈絕宗風更續傳試與汝心安一晌曾隨僧衆禪坐逾時未忘我意過三眠可憐煩

惱娑婆世催盡朋交入戒禪

十三日由華亭步上太華寺坐鬟鏡軒遠眺

太華高低一徑通攜筇步入亂雲中烽煙不礙丹青好勝蹟爭傳金碧同一攬湖山入懷抱數聲鐘磬徹迷蒙握衣便與山靈

約要借巖阿作寓公

小雪前三日登螺峯山接引殿遊圓通寺復登山薄醉而歸

同遊者古逸鏡澄樹五竹潭美齋

巖城何處宜舒望無如螺峯最高曠重陽未得騁秋懷

重九日偕遊寺宇以

遊人衆多途爲警吏所阻未得登山自崖而返

此日相攜恣下上上方佛殿何崖鬼俯視間井

皆鑿坏山木蕭蕭朔風動湖光黯黯陰雲開下有圓通古時寺  
規灰歷盡久淪棄一朝妙相復莊嚴是善知識非好事我輩探  
幽來弔古摩崖奇蹟勢飛舞回向神龕祝瓣香東林往事堪踵  
武興盡扶筇將下山西山日影照朱殷躑躅且向山頭立四圍  
光景開心顏獨憐萬人如海方逐逐雞蟲爭競焉歸宿寅夜鐘  
聲破空來酣夢沉沉警幽獨

謁唐會澤墓

颯爽英姿杳荒荒土一邱識時終闕憾護國自嘉猷仿佛盧生  
夢淒涼任昉游偏裨各樹節誰與問松楸

題洱源馬翼武桂堂父子雙孝錄後

天地蒼蒼有正氣在人忠孝與節義任他陵谷幾變遷此氣浩  
然終不敝洱源孝子翼武公奉母盡瘁全初終歲荒仍必進甘  
旨自食粗糲心餽餉母病剖股以和藥母歿哀毀斷孟勺積慘



遂致風痺疾施教育才甘窮約嗣君早歲熟楹書公步亦步趨  
亦趨先意承志務悉當疾痛疴養無稍疏廿年奉養如一日棄  
養形銷徒骨立風木蕭蕭悲不勝行路感歎爲垂泣孝行間世  
始一聞何況兩世接清芬多少讀書談道士內省難免媿斯文  
我聞百體不虧謂之孝刲臂療疾慮難垂世教豈知至行由天  
真寧期後世相則倣又聞旌表有無奚足多此理昭昭耿耿千  
萬年不磨傳否雖祇在吾輩子孫用心理則那歸震川與宣仲濟書此理在入間昭昭耿耿千  
萬年不磨龍逢比干何嘗有旌表哉其人之傳不傳只在吾輩耳文孫錫輿輯雙孝錄請旌表亦孝子之用心也象賢有人相踵起繼志  
述事彰厥美哀然成帙雙孝錄光饑熊熊照閭里前有明德後  
必昌昭垂史乘流芬芳佇看芝蘭玉樹庭階發終信天定可以  
非茫茫

與古逸愚若再遊華亭寺十月十五

三旬兩度向山行慣聽齋魚粥鼓聲心定不隨幡影動塵祛自  
見鏡臺明樓前水月饒虛境夢裏林泉証舊盟爲語山僧漫猜  
憶重來面目未全更

偕古逸寺樓觀月出

山河黯黯收羣鷺一輪湧出東山高初若銅盤乘仙露繼若冰  
鑑明秋毫倒影忽成金塔千百丈玲瓏璀璨橫湖上

金塔倒影爲昆湖名勝風景之

一幻耶真耶渾莫知天光水色相蕩漾儼然寫生妙手出西歐  
蒼蒼莽莽饒深幽丹青烘染迹難求又如坡公赤壁來重遊山  
高月小臨江流是時有人相對立樓頭目窮萬里胸千秋清琴  
一闌茶一甌貝葉繙罷風颼颼伊誰識得此中真味不

華亭雜咏

萬竹擁巖壑杳杳寺何處祇見歸山僧迤邐竹間去  
循山得水源晝夜流汨汨願將塵勞心日向此中浴

丈室日日坐坐得蒲團破念佛任是誰且莫放這個  
曉鐘敲夢醒一片空明機時時認此境勿使剎那違  
寺中禪坐係參念佛是誰四字

己巳新春少坡市長招評茶花

春風猶未到天涯是處園盆已著花綠葉硬能搯臘雪  
羣芳譜山茶葉硬而

厚紅妝豔欲奪朝霞石湖品作羣芳冠鄧漢還將十德誇獨喜  
歲寒貞性在偶輸芬馥不須嗟

其二

洗陋開荒當大魁虞衡語出廢翁誠自緣佳質舒明豔豈豆藉巍  
科興挽推色相偶從春市露根株慣自遠山培  
巨大者多在太華華亭金馬諸山從

今滇海添佳話  
古稱桂海滇海皆陸海也真向百花頭上開  
定爲滇省市花極允當

書緬寧彭耀南先生傳略後



周生繼福

字聚五

以緬寧彭鉅事見跡並索題句

昔年曾羅起湘中提倡團練平江東吾滇咸同靖內亂亦以鄉  
勇收奇功卅年四境宴無事封狐長蛇日縱恣沿邊四縣遭荼  
毒綠營竄敗久無備耀南先生今世賢純孝至性出天然旁通  
岐黃熟經史更爲氓庶除顛連鄉人樸勇能殺賊祇在良法善  
部勒先生操持本有素登壇旗幟皆變色義師一出殲羣夷掃  
蕩幾如折箠咎更有妖僧巨憝張與羅狼跳豕突尤猖披先生  
誓衆齊努力不滅此虜不朝食帕首韓刀身爲先其後相隨士  
八百一戰渠魁咸授首邊塞烽煙從此熄吁嗟乎湘勇當年播  
英聲百折不磨憑忠誠先生信義及蠻貊要非倖致有同情邊  
氛何慮才爲寶有才遂如長城保先生已騎箕尾去羣蠻尙稱  
孔明老

定庵落成書懷四首

市隱何能泯見聞蜩蟬時事況紛紜還從世外舒青眼合向山  
中臥白雲荻岸蘆洲添畫本藥欄花塢足清芬明湖萬態供陶  
寫不盡朝霏與夕曛

早知結綬總生纏志業相期壯盛年豈意瘡痍猶滿目已驚霜  
雪上華顛三椽風雨粗能庇一壑林泉或許專楊氏舊遊毛氏

宅海莊遺韻踵前賢

懶散今成五石匏何煩文字解譏嘲趨時幸免頭如葆避俗猶堪屋結茅夢覺前塵徒惘惘坐看去浪盡滔滔商量種竹栽花事賴有求羊莫逆交

原稿裁字

記從瀛海泛歸槎久拚煙波寄一家小規又經尋息壤故山無恙好懸車安心且證摩羅果閱世真同優鉢花屏卻元規塵十斛試看天半自朱霞

王什公以采風錄見寄覆詩謝之

壇坫東南舊主持

君曾充南北議和總代表駐上海

拈毫重與定新詩杜陵歌哭皆

關史安石歸來不廢詞觀我觀人情可睹變風變雅網無遺獨憐閒卻披雲手日對吟箋撚斷髭

鐵珊以豆豉見惠兼賸佳章賦詩覆謝

一封惠我賸吟賤鹽豉書徵急就先調共梅羹人不識

宋吳曾能改齋漫錄

謂晏子云以醯醬調鹽梅而不及豉是古尚不知豉之美也

和來菽乳味尤偏鼎烹正鬪豪華日家食

同安淡泊天每飯不忘薑與共故人情誼總拳拳

三月三日墨莊小集

永和雖值偏安日猶有羣賢修禊時我輩遙遙生世晚此懷落落少人知自無塊壘寧須酒

近因佛化濡染同雅集例不設酒怕損心情不著棋

楊鐵崖平



生不作畫怕爲人役  
不著棋怕損心情但說菩提生滅泯臨文何用更興悲

甘子文赴騰衝縣任過辭以詩贈行

百里一身寄偉哉君此行循良思叔世處士雪虛聲蒿目瘡痍  
時方有江心坡之驚徧極邊烽燧驚謳歌久寂寂佇看一崢嶸

高曉別野山居

無事便爲福得遊真是仙今知古君子早賦逐初篇老至步猶  
健宵來倦卽眠長歌行帶索擊壤樂天年

春望

十里長隄萬頃田春深生意尙蕭然龍葱惟有東門柳占斷風  
光又一年

清明

寒食初過二月天北邙祭掃各紛然灰飛如蝶君休惜一例幽  
明紙作錢

摩訶喀車

纔賞唐梅黑水祠又看小隊上溫池飊輪快意如飛去斷送行  
人竟不知

陳筱圃丈七十壽詩

六月十四日

制科世所重匪重在虛榮叔季成弩末實乃不副名先生獨佼

倭忠孝出至誠三遷奉母教驚人一飛鳴彈章斥官邪直聲天下傾一生志南園趨步見牆羹豈徒文字未同符在志行鄉國數科目先後兩者英

國體建共和鼎革茲規局奚事匹夫節斷斷志溝瀆先生曰不然終已食人祿浩然解組歸埋首在鄉曲餓死亦小事況乃差自足足跡絕城市守身洵如玉獨惜丁戊間庖代一州牧致令鄭公鄉不免黃巾辱至今猶汗顏思之常局促

文章載道器奚取塗澤爲作者遞嬗變優孟每貽嗤先生探道要一一託修辭言直抒胸臆至性如見之書法一藝耳剛勁饒清姿點畫家戶曉姓名婦孺知卽此自食力窮約甘如飴時流方凌競逐末本見遺屹然東流柱士類仰宗師

髫髻奉庭訓嘗眎曾公書務擇鄉賢詰事事相規趨舉似賢昆友謂比桂五株先生尤白眉古士今所無自此心嚮往時如提耳呼奈何茵溷花飄墮不一途忽忽四十年各已賦遂初屈指入此歲七十當懸弧且喜腰脚健不倩鳩杖扶坐閱世升沉方之摩尼珠

我築三椽屋近與德星鄰閉戶探書史矩矱儀先民歌嘯若互答跡疏情自親門外九龍池萬荷香紛紛冰桃與雪藕日日湖



市陳持以爲公祝願公全其神遇齋心境豐頤養得天眞名德  
並不朽眉壽窈窕靈椿

題陳少疇竹園圖

呼吸湖光飲山綠豔羨吳兒生湖曲名園恰在昆湖灣況有千  
竿萬竿竹先生隱此食舊德不獨醫人且醫俗我亦小築傍高  
嶢背山面水三間屋扁舟一葉往來頻預約便道訪高躅游目  
不須問主人蛩音應訝來空谷所嗟劫火痕猶新民居遷播未  
盡復又慮四野多荏苒伏處亦難安耕讀喜君別墅近城闌燈  
火相望匪孤獨由來大隱在朝市此君相伴願已足琅玕萬個  
綠亭亭中有儼焉人如玉

遊晉甯盤龍山萬松寺

古剎重開擁萬峯偶攜勝侶憇遊蹤松濤陣陣能湔耳雲氣層  
層欲盪胸頑石無靈空肖象志載有石象石蛇大師有骨永盤龍元盤龍祖師遺骸尙存蓋  
木乃伊也何當再振宗風起法鼓金幢見景從

其二

勝地前賢詠紫芝我來剛及中秋時木樨香味參禪偈夜雨空  
山有夢思謂趙樵村丈柱礎尙留靈蹟在瓦柱礎見通志梵宮已是劫  
灰遺時當末法千年後珍重香林好護持

歸途宿昆陽旅館

孰著煙霞引興長不辭舟轍犯星霜  
吟癡甯有驚人句嚼蠟還尋避世方  
華壑松篁榮客夢一宵風雨臥昆陽  
騎曹可共從容語莫學郵亭醉尉狂

戒嚴期中邸舍例有運卒相詰溫語答之

李鶴峯先生故里

即晉寧城西錦川里俗呼活馬村

中丞故里晉城西大野黃雲一望齊  
可有令威來化鶴早稱延祖立羣雞  
掌珠無忝繫香草疑獄終歸落燕泥

先生以文才見忌時主藉他事中傷之

多是雪生篤鄉舊零丁弱裔賴扶攜

楊文襄公生日與祭祠堂卽題冊子後

臘月初六

西湖有地祀龐張

斷

十七詩人宛在堂

闕

廟食推公兩無愧獨

兼勛業與文章

綽楔新題照水堦易名曠代孰齊肩  
山川猶是輝金碧間氣銷沉四百年

卓絕才華藉甚名三南稱謂見鄉情  
料應魂魄戀斯土山綠湖光相送迎

焦山玉帶曾題字觸我枌榆故舊思  
今日靈祠酌盃酒葭蒼露邈從之

二月十五花朝與惺甫適生鐵珊泛舟至湖墅看花遊山信



秀挺會當造園一賞心不惜對花同銘酹

有以錢南園通副所書枯樹賦直幅求售者方議價間粵人

劉毅夫聞之遽出千二百金易去而以影片寄余亦慰情

聊勝於無也賦此解嘲

一縑一字誠無愧且喜人知重妙書比似竹垞耽舊籍鈔存副本慰情無

和琴禪居士懷淨土詩

四首

閻浮從是往西方樓閣莊嚴有道場萬德洪名專意念七重行樹卽吾鄉可憐具縛生多苦總爲邪疑見未忘從此認清西上道一乘直下便承當

(信)

瞎煉盲修何日成須將弘旨認分明娑婆清淨非歧致煩惱菩提判一誠果爾勤修依了義自然便入涅槃城

龐居士詩若依了義學便入涅槃城

如

斯捷徑偏拋卻枉事芸芸逐死生

(解)

那堪五濁儘遷流我佛曾言記得不少善根人猶裹足阿鞞跋致莫回頭

阿鞞跋致不退轉也

蓮花四色思親睹貝葉三經著意修

試向夕陽紅處看寂光隱隱導吾儔

(行)

彌陀一卷利天人蓮社雙支證果因甘露有時來灌頂微風吹樹不揚塵一心趣向途非遠八苦祛除樂最真健美琴禪老居

士超然先我渡迷津

(證)

三月三日社友襖集什刹海用顏光祿從幸曲阿後湖詩韻

友人代拈鱗字率賦奉柬

辛未

陵谷一變遷遂別京華春彈指十稔餘未踏長安塵長安盛文

讌才多情復親裙屐想風流邈如天上人漁洋與倦圃

謂逸塘眉

目尤殊倫惓懷及同調尺書損文鱗刹海修禊事適邁天氣新

嘉花呈美姿細草敷文茵觴泛恆幽賞仿佛曲水濱故宮久寥

落漫社跡已陳

李西涯漫園在什刹海附近

念茲當行樂何可虛芳辰烽燧况未

熄此是桃源津令我澹蕩人渺然思無垠

送琴禪居士赴華亭山修持

義馭不少待奄忽催華顛勞勞塵網中憂患苦相煎竭來歸佛

祖惟君導其先聞道雖惜晚飲水知河川朝夕頻過從得多增

上緣意義或茫昧開解遂豁然趣行或疲茶策勵斯強堅肫摯

逾骨肉契合空言詮塵海甯久羈華亭境地偏僧寮暫棲息咫尺

歸西天所嗟睽離後放逸孰驅鞭感此增愴恨中宵不成眠

何當笠屐隨短榻風雨聯巖壑幽絕處寂坐同參禪

贈文質上人

駐錫落迦頂東南滿福音能來邊徼地爲有大悲心示教人天



無心雲出岫倦翮鳥思歸終是故鄉樂甯云吾道非青囊恢復舊業絳帳景前徽父老如相問長歌住翠微

送鄒近居歸蜀二首

鄉心垂老切旅思逐雲飛世亂百憂萃途長千里歸蜀山青歷歷滇水碧依依卽此知廉吏蕭然忍凍飢朋輩嗟寥落相看鬢髮班我方初服遂君亦倦思還童稚釣游地往來魂夢間祇今歸去好虎豹塞天關

題楊忠愍公墨蹟

曾展焦山遺墨新一編手跡復存真卽茲字字有稜骨豈僅彈章懾佞臣

聞貴陽聶氏婦俞則柔殉節事成短句十章

慷慨赴死易從容就義難矧在弱女子能行心所安女夙承姆教柔嘉有懿德嬪聶十餘年姘姘盡婦職婦職雖無虧婦命磨蝎苦松桐苗變烈所天喪豺虎噩耗偵旣實寸心矢不移從容具餅餌顏愉心則悲月黑烏鴉啼啼聲何淒切啓視閨幃人已化杜鵑血遺書別尊長一一禮無愆女志如霜雪女行如冰淵叔世禮教弛戀愛毒饒鼓人幾盡可夫夫婦道益苦

女亦生今世女亦濡新學滄海橫流中志行殊卓卓  
義重身已輕情至理不忒情以義乃深義不爲情賊  
黔山何峨峨黔水流澌澌中有女貞樹亘古同不夷



定庵詩存卷之三

姚安由雲龍夔舉譔男振新

羣  
鐸校字

五十四初度湖墅雅集二首

民國十九年歲次庚午秋七月

身閒不礙宴游頻  
明淨秋光恰趁人  
小艇載來三五客  
輕橈劃破萬千鱗  
雨餘林木都如洗  
刼後樓臺轉更新  
不識世情生冷

煖昵人猿鳥  
鎮相親  
年來妄念漸銷磨  
念念遷除辨剎那  
諸法無常寧執我  
寸心有定枉來魔  
駐顏卻老誠多事  
範水模山且縱歌  
老友不嫌村路遠  
寒衣相顧白雲窩

湖墅聽雨

萬山如墨雨如潮  
永夜瀟瀟破寂寥  
夢醒乍疑蓬背穩  
更殘翻訝市聲囂  
沸騰時局聞如此  
觸撥秋懷不自聊  
潦汎重爲農父慮  
百重泉水看明朝

九日偕愚若石齋樹五惺甫螺峯登高循圓通寺歸

登高懷抱一開朗  
佳友偕來三數人  
晶晶湖光照天宇  
層層嵐翠壓城闌  
杯盤終憶承平好

從前席地飲酒之風今已無矣

風物都隨時事新  
惟有空王常自在  
滄溟坐見幾揚塵

質卿招遊碧玉泉宿雲濤寺

夙愛坡公語雲濤欲際天瀕河有古寺得地近溫泉小住連三日長流滙百川滔滔東下注洗滌萬塵緣

送子暢赴騰衝殖邊

一去二千里茲行亦壯哉權奇跨同輩終始見邊材鷹隼霜天潤駢驅道路開莫爲無麵餅作意到雲臺

游曹溪寺

曹溪古名刹零落致堪嗟已絕僧伽影猶存優鉢華珠泉徵勝地碑記識名家末法誰龍象中興企望奢

題琴禪居士指畫月梅橫幀

爲孫樂齋題

琴禪精佛理餘事工潑墨指頭恣點染且園分一脈春意透南枝灑落見標格佼佼冰雪姿掩映黃昏色琴禪兼畫禪佛說資詮釋因指可見月指非卽月魄觀指謂月輪迷誤失扶擇得心應諸手花月兩證獲非妄亦非真此幅最精闢清奇濃淡俱如入妙香國坐覺丈室中花雨繽紛積孫君紹法人

係琴禪高弟

藏弃如拱壁會當有神物在處爲護惜

懷蘅以移居城東詩寄示依韻奉和

歸耕虛願畝南東猶在茫茫人海中閱世已嗟青鬢改移居爲



有素心同

與結維諸君相和

新春樂趣饒花事午夜歌聲徹碧空遙想石

倉茶竈外更安綠軫撥仙翁

和纏蘅移居詩後感今思昔再疊前韻奉柬

遨頭屢向禁城東佳槩曾收古寺中

於隆福寺得明槩諸葛忠武陶靖節集即錢輔宜曝書雜記所稱家夢廬文博

收數十年而未得者

卜宅君仍倦京洛移家我自近禺同舊遊歷歷風前憶

輕薄紛紛眼底空恁是橫流滄海徧猶能有地著詩翁

論詩三疊前韻

底須派別辯西東故國風騷日麗中俚俗趨時吾不敏酸鹹知

味子能同佳章屢倩郵籤寄險韻常虞腹笥空巴蜀繫懷今舊

雨慙懃爲訊病山翁

送彭躬武返黔

二十年一月

彭孫雖宿將博雅似經生重到舊遊地來尋和好盟鄰交唇齒

重友誼肺肝傾歸必崇清議潢池永息兵

夢謁墓

五里城西路兒時慣往還松楸能記憶溪壑總彎環髣髴華胥

夢依稀禪智山何時飛艇遂瞬息渡鄉關

送許羣立赴秣陵

幾回相聚復相別此別難爲萬里行嬾散吾偏同叔夜飛騰君

正似宗生遙知旅宿秦淮渡應話前遊鄴善城時君挈眷同行盼得來春雙鯉到又當草長亂飛鶯

賓川楊母百歲坊歌詩

上古人壽多久長書契以前或難詳堯舜皆至百有餘華封絳縣同康強逮至文武數稍殺夢齡猶各耄期屆雖緣渾噩得天厚亦由畢世種德邁後來雕鑿失天真往往中壽胥以淪像法已過末法值衆生減算非無因大羅楊母仁且淑賓川古爲大羅嶺早歲崎嶇在山谷佐夫教子有義方彼蒼默默因材篤夫既成名謝世緣子亦勛業昭爛然峴嵒有功鄉里薦至都司子如軒中將續尤著

大德必得祿與壽況復秉賦資山川華首之高高接天生其間者千萬年明釋古如葉門即華首門也母有懿德應星躔寶婺炯炯光綿

延輝映棹楔照丹鉛巾幘矜式彤史傳期頤過是彌不朽令名長與山河壽我讀事略摘歌辭笙鏞在前間瓦缶

題蘇鏡川花園五月中蘭桂齊開徵詩冊子

南滇氣候殊他方四時不斷聞花香四月荷花八月菊桃李常伴寒梅芳蘇氏名園花似錦霏紅綻白皆奇品五月蘭桂並時開騷人詞客灑墨瀋蘭與玉樹生庭階晉人方之子弟佳後有燕山竇諫議五枝丹桂茁芳荄難得君家二美竝預兆子孫皆



秀挺會當造園一賞心不惜對花同銘酹

有以錢南園通副所書枯樹賦直幅求售者方議價間粵人  
劉毅夫聞之遽出千二百金易去而以影片寄余亦慰情  
聊勝於無也賦此解嘲

一縑一字誠無愧且喜人知重妙書比似竹垞耽舊籍鈔存副  
本慰情無

和琴禪居士懷淨土詩

四首

閻浮從是往西方樓閣莊嚴有道場萬德洪名專意念七重行  
樹卽吾鄉可憐具縛生多苦總爲邪疑見未忘從此認清西上  
道一乘直下便承當

(信)

瞎煉盲修何日成須將弘旨認分明娑婆清淨非歧致煩惱菩  
提判一誠果爾勤修依了義自然便入涅槃城

龐居士詩若依了義學便入涅槃城

如

(解)

那堪五濁儘遷流我佛曾言記得不少善根人猶裹足阿鞞跋  
致莫回頭

阿鞞跋致不退轉也

蓮花四色思親睹貝葉三經著意修

試向夕陽紅處看寂光隱隱導吾儔

(行)

彌陀一卷利天人蓮社雙支證果因甘露有時來灌頂微風吹  
樹不揚塵一心趣向途非遠八苦祛除樂最真健美琴禪老居

士超然先我渡迷津

(證)

三月三日社友楔集什刹海用顏光祿從幸曲阿後湖詩韻

友人代拈鱗字率賦奉柬

辛未

陵谷一變遷遂別京華春彈指十稔餘未踏長安塵長安盛文  
讌才多情復親裙屐想風流邈如天上人漁洋與倦圃謂逸塘眉  
目尤殊倫惓懷及同調尺書損文鱗刹海修楔事適違天氣新  
嘉花呈美姿細草數文茵觴泛愜幽賞仿佛曲水濱故宮久寥  
落漫社跡已陳李西涯漫園在什刹海附近念茲當行樂何可虛芳辰烽燧况未

熄此是桃源津令我澹蕩人渺然思無垠

送琴禪居士赴華亭山修持

義馭不少待奄忽催華顛勞勞塵網中憂患苦相煎竭來歸佛  
祖惟君導其先聞道雖惜晚飲水知河川朝夕頻過從得多增  
上緣意義或茫昧開解遂豁然趣行或疲茶策勵斯強堅肫摯  
逾骨肉契合空言詮塵海甯久羈華亭境地偏僧寮暫棲息咫  
尺歸西天所嗟睽離後放逸孰驅鞭感此增愴恨中宵不成眠  
何當笠屐隨短榻風雨聯巖壑幽絕處寂坐同參禪

贈文質上人

駐錫落迦頂東南滿福音能來邊徼地爲有大悲心示教人天



喜師資僧俗欽四施先法雨露灑遍香林

贈寶靜法師

實現四無量惠然從海東

師嶺紅上虞人

轉輪當末法卓錫振宗風修證

資禪淨

師係合宗兼修淨土

觀行泯異同衆生咸利喜行脚莫匆匆

佛生日作

二千九百五十七年前我佛降自兜率天歷劫出世復入世祇  
爲一大事因緣自行七步獅子吼天人尊勝無比肩出四城門  
各有見生老病死苦相牽往昔行願況成熟宜應方便脫羈纏  
畢波羅樹成正覺明星燦燦昭爛然弘法利生鹿苑始首度外  
道羅邏迦蘭仙四十九載轉法輪三百餘會弘敷宣色身無常  
法身常常樂我淨般涅槃者闍崛山謀結集突吉羅罪責阿難  
五百歲後法幾滅像法已盡末法延今日重邁佛誕日僧俗四  
衆皆大歡香花綵飾盛供養捷椎鞀鞀聲喧闐惡業相尋未休  
時迺有慈祥一念被愚賢阿闍世王業如山懺悔猶許入福田  
但恐心口殊途向佛力未由作筏船善星受持經藏十二部淨  
念已入第四禪不達無生究何益返墮地獄叢垢愆佛弟多聞  
昧實相翻爲文殊所訶彈盲人摸象空說象瘡聾聽樂樂奚傳  
須入宗鏡徹表裡

佛語心爲宗

永師開示標言詮大法無古今亦

無內外邊苟歸中道第一義自他兩利不唐捐塵說剎說理不  
二甘露遍灑三千與大千我親法會生多感敢述斯旨當踞筌  
趙生良璧自遼寧貽書二十年不見矣感賦卻寄

遼天萬里惠雙鱗風義堂堂近古人廿載流光如過客一編要  
術裕齊民生著梓鱗學銀  
行論以惠遼人時艱未濟吾偏老世變相期子有真佇看

羣生歌樂利白山黑水勒貞珉

螺翠山莊品茶

四月初十

五月二十三

世途倦策蹇物外尋逍遙季鷹有幽棲曠朗居崇皋華素得其  
宜花木圍週遭延客甫合座脩然捐塵勞佳卉薦明前淺盃試  
新鑊色香味俱淡湯喉費勻調入口初泊如旋沁心脾交兩腋  
春風生一天酷暑消評隲伴泉石意境窺夷巢匪惟驅煩渴快  
如飲醇醪惜將賦行役聊復永今朝

陳貞蕙秋園雜佩色香味三淡初得口  
泊如耳有間甘入喉有間靜入心脾湯  
喉字見明田藝衡表泉小品

采丞侍郎寄視其先德西雲公行述奉題一首

芝草非無根醴泉非無源古人勗自力遂垂爲茲言根源固潛  
滋枝葉斯茂繁樛有傑士家世出太原早歲掇巍科濟陟乘  
高軒瀚厥先德初迺備歷艱屯花門亂事亟舉家盡逃奔強半  
死忠義餘者得僅存航航西雲公姿秉時淵肫拾薪供炊爨誦



讀忘朝昏蜚聲巖序中熊熊如朝瞰避地同遠徙威楚復驚魂  
巡守士卒散予身墮城闌默若有天相相將入會垣廣平加青  
宋子堅以鹽道護督七年

右政績頌西崑改官佐大定仁澤惠黎元擾攘兵燹中麟子適  
洗盆始識生不凡卒能大其門椎牛不逮養風木聲泪吞我昔  
試楚郡桃窪禮尊墳祖太夫人葬楚雄之桃窪山故老爲我說此如萬人園今讀  
行述竟往迹堪追論史冊足矜式豈徒示子孫

題蒙化朱宴春墓表冊子

活人有術同青主殉國亡家似雪漁今古相望並奇士布施不  
厭亦浮圖思親時下皋魚泣教子能傳扁鵲書蒙舍城中遺范  
在過車應與式門閭

惺甫以哭其第三子錫燾詩見視率奉慰

彭殤等量觀晉賢談名理天人一漚發佛說寓深指與君夙研  
討豈不悉端委叵奈骨肉情寧復能遣此昔讀海藏詩爲魚慟  
相比久羈得一縱惜未了生死不如去去語解脫徹表裏原句中無

人法去非吾世請更廣斯意百年一彈指憂患轉轆轤骸骨終敝屣君本  
慧根人推測及令子捨此假合身安樂定當爾君詩已自言君  
悲良可已

自題手持念珠立餘園前小照

憂患無端萃一身於今解脫出風塵青燈開卷兒時味白髮撩  
冠老境臻照眼恒河水如故潛心佛法智翻新茫茫人境吾誰  
與後世相知自有真

與筱秋至古幢公園散步納涼

居然邱壑起平林約略池亭盪俗襟園藝也應入歐化滄桑翻  
覺觸詩心未秋涼意因風逗不語幽懷與日沉都市嘻嘻能按  
堵亮無鋒鏑遠相侵

前此近郊多有劫掠事

華亭聽經和石齋元韻

欲尋香海問津涯

華嚴經有中央無邊妙華香海

信宿招提禮薄伽

婆伽梵大般若經作薄伽即佛也

縱

歷僧祇終正果須知億劫亦曇華幡風自動粗能定山雨如傾  
不覺譁我是虎邱一頑石點頭應許證禪那

同日和幹臣原韻

與君袖手看洪流過眼浮沉歲幾秋名剎莊嚴堪駐足世途茫  
昧早回頭須知佛我無岐致卻笑天人共一漚記取楞嚴參法  
會深山夜雨話僧樓

附石齋原作

想到吾生也有涯月來寢食伴僧伽性源竊似探星宿覺海



還須見日華去住了然拋得下陰陽一理聽無譁道場盼佇  
音塵久靜裏年光是剎那

與古逸塔院閒坐

日陰亭午絕囂塵默坐深山有兩人隨意幽花無世故流音小  
鳥亦天真卽茲共證禪那境暫許相看懷葛民儻得竟除塵俗  
累甘從汲水伴樵薪

登太華山坐鬢鏡軒遠眺

七月初八

碧空萬頃豁雙眸誰挽明湖水倒流六詔風煙餘故蹟九天效  
唾倚高秋滄桑世變成孤抱歌嘯吾能覺寡儔避暑梁宮何處  
是壯圖雄鎮各山邱

生日

已幸時人不識名駐山旬日意崢嶸詩歌寧借聲華重文字甘  
爲賈豎輕磨蝎星宮成獨笑木魚梵唄證三生行年早過知天  
命震撼風濤儻未驚

住華亭旬日身心交益得詩四章

綠篠叢叢一徑深撥開蒙密見香林遊人莫更驚禪榻避俗溪  
山無處尋

聽經後穿竹徑歸寮琴禪避居於此遊人時至

形骸言語兩相忘爐篆初銷道味長清磬一聲羣響寂空山午

夜月如霜月夜坐琴禪寮房

大悲閣子俯青蒼野色秋陰入混茫一水涓涓崖罅落滿山涼  
意透衣裳 大悲閣晚眺

中天涼月立蒼苔落木蕭蕭百感來悟到覺空萬緣寂此心澄  
澈絕纖埃 與琴禪立月下閒話

寶靜法師過琴禪寮房共話師謂佛法多門本源無二先精  
一經餘自貫徹又謂人世光陰迅速彼汨沒於功名富貴  
中者不過剎那之境兩君能實心學佛乃智慧過人者感  
而賦此

汎覽難收尺寸功一經精究萬流通私心自昔萌斯見印可名  
言叙五中

百歲光陰等剎那切身大事問如何佛門自有真常樂螻蟻功  
名瞥眼過

### 蘧園雜興

野園除荆棘卉木初成長塵事屢牽率日久闕清賞相攜華亭  
來耳目一超朗枯柏增昔陰豆苗進新壤泉聲韻琴筑涼月窺  
幃幌女牆浸湖光帆檣漏三兩凭几恣盤薄俗氛莫予餉卽此  
自怡悅抗懷羲皇上



少無適時骨負笈事趨走懷刺盡磨滅所如輒不偶幡然圖白  
樹名理深析剖立身信有真奚藉悠悠口爾來四十年斑白成  
老叟冥悟境益超進取力愈猛迴視渠碩者卑卑亦何有禮法  
徒面具文章並芻狗

京城百雉過寤生殲段叔燃箕七步成子建免荼毒哀哉玄武  
門喋血罪誰屬胤義號友愛燈影斧聲續大器等途骨不嫌滅  
親族周公雖聖人管蔡猶遭戮吾獨深滋疑君主道何艱後世  
相殘賊鉅細若一局靖難肆兇殘泰陵即清世宗胤禔尤慘酷利重  
義則輕往蹟勝最錄天地殊不仁賦性等牲畜泛交篤風義患  
苦偏手足深山鵲鵲嘯聊爲歌當哭

儒道成弩末佛法方契機我從橫流中矢志來皈依五戒首在  
殺一忍百無違矧達識三變能所靡子遺萬法畢竟空爭奪亦  
何爲徒令重業因苦塗墮輪迴感此勤修省時時克其私不畏  
果畏因修慧福自隨有生此歸命無復惑他岐

### 十五夜對月

四山穆若俟滿月出東方湖波與相映上下通清光移几坐相  
對澄瑩澈肝腸去年聚朋親淫雨亂虛廊今年成獨賞歲時感  
奔忙喧寂雖異境進修似云強了了人生觀妙諦參法王神理

有深契萬象空相忘此心得真宰素行安其常

新樂府二首

倭奴禍

朱五經兒作天子歇後鄭五爲宰相猶是經兒與詩人偕亡已  
嗟日曷喪况復駟僇會恣貪欺販夫走卒相追隨二十三稅一肉  
糜侏儒飽死臣朔飢豈有天幸安疆陲家居撞壞咎在誰嗚呼  
虎狼入室知未知迷樓歌舞正酣嬉

義勇軍

全國養兵二百萬餉糈盡出人民膏血汗分割地盤構內亂大  
敵當前不能戰義勇軍學生羣少年能武復能文惜哉強敵非  
草竊棘門灞上徒紛紛

據熱河戰地歸來人言義勇軍各就所踞地籌餉前者進攻則後者進據其地歸食無地遂瓦解

廖叔度母張夫人輓詩

叔度汪汪千頃陂粵滇相望天一涯惠我尺素慰積思慈母棄  
養留母儀述之娓娓詳且悲上事尊嫜下撫兒佐助夫子百事  
宜區畫井井罔或遺芝蘭玉樹庭階滋勛績克建教澤施桂林  
山水世稱奇板輿徜徉安以怡返里日暮迫崦嵫及門遂廢蓼  
莪詩達雲樓前雲猶馳望雲思母母何之寄我行述徵我詞我  
撫杯棬涕流洟



偕樹圃惺盒孟湖由華亭至三清閣登石室歸途沿湖經淞

隱寺訪梅

二首辛未冬月初九

蘿徑復輿小隊行茸衫攪帽一身輕年來濟勝慚無具

時疾經年頗艱跋涉

雨後看山倍有情遠矚遼天塵黯黯

時方失東北

欲吞雲夢氣崢嶸

嶸暫歡聊遣登臨興怕聽南飛旅雁聲

家憂國難殆劉越石所謂排終身之積慘求數刻之暫歡耳

薪

火相煎賸此身飛鴻踏雪再來人恆流照影顏知老舊石尋題跡已陳城市如塵畧可避山林有境亦非真暗香透出春消息却似孤山訪隱淪

題龍門照像

曾向龍門留影事流光迴首六年餘蓬山再到無他願祇學當年陶隱居

復與樹圃惺盒孟湖尋舊題會照於西山石室內

也堪石室擬敦煌惜少名書此內藏今日偶然留指爪累人好事費推詳

北地寇氛日逼頗念友人旅居者再用前移家韻柬之

曾聞避地走遼東

後漢末管寧王烈皆避地居遼東

今入烽煙莽蕩中楚老相逢泣

已晚伊川先見有誰同射鵬猛士千年邈相馬凡羣一瞬空旅雁紛紛向南返獨憐堅臥有詩翁

自題五十五歲小照手持念珠寄懷衡並索近影

忽忽涪翁留蜀歲日披古籍味醴醴安身立命復何事百八牟尼手自拈

風雅多情海內知問年未到始衰時邇來國事顛危甚恐惹霜華上鬢絲

題哭簪課女圖曾小魯屬題

結襦伊始嗟無姑結襦數稔復無夫無姑有夫猶拮据無姑無夫聲淚枯環堵蕭然四壁立掌內僅遺雙明珠篝燈熒熒斗柄轉紉釧茹淚課編蒲雛鬟問字相左右書聲琅琅出敝廬况乃撫叔兼撫孤苦心毅力古所無一朝玉樹咸成株皋比坐擁羅生徒母心稍慰母力痛快如得錢償積逋徜徉山水鳩杖扶回首當年辛苦猶深吁媚鄉為馳徵詞書前者北江機聲燈影圖近者楊子經聲畫亦符楊君屏衡為其母作經聲燈影圖徵題佛法世法均有因果律善福甘苦答報無或殊走也披圖慘不舒杯棬手澤空追摹未能返哺不如烏

書譚叔裕覽海賦後時倭人據遼復寇甯應當局莫展一籌時事益不可問矣

得失安危一覽知生花妙筆慨言之家居已被纖兒壞更不如前灑淚時



樹義陳詞步子山道咸時事考斑斑風霜安得如君筆誅伐當  
今誤國奸

壬申元日書感

白日黃雞去若奔桃符又換比閭門不因四海烽煙警那得千  
街爆竹繁往年黨部禁舊歷年事甚嚴今以寇警弛禁爆竹遂喧闐不止誤國誰能誅馬阮可人翻欲歎  
敦溫填胸時事天難問酌盡屠蘇酒一尊時已戒飲

鏡川招飲蘇園賞花因事未赴詩以答之

未到南塘路園林想像中勝流容幾輩芳訊數番風酒政陳驚  
座花時陸放翁放翁有花時過遊諸家花園詩不才呼負負將意藉詩筒

漁生招賞牡丹卽席成詠

攢玉霏金簇簇開看花人似在瑤臺境拋朱紫歸冲淡牡丹青白色絹

寫丹青待剪裁佳賞最宜張翠幄寇準牡丹詩留賞惟應翠幄遮羣芳直與作輿儻

綠章乞借春陰護莫遣東風浪撼摧時倭寇犯僊

次日復張飲花下以羣芳擁之再成一首

嘉名遠自魏公傳花種即金帶圍玉立亭亭色相鮮饒有孤芳堪自

賞不隨紅紫鬪媿妍

評彩雲社詩鐘畢卽題其後

聯歡好是舊苔岑短句寥寥意境深變雅變風摧滅盡天南猶

有折枝吟

老馬何曾果識塗騷壇風雅共追趨猶賢博奕推敲樂祇惜光宣盛不如

上海五洲藥房經理項君松茂有至行善商業倭寇犯滬組義勇軍護國竟罹寇難賦詩悼之

羣飛海水天方醉火燄崑岡玉並危志士成仁寧苟活寇氛甚惡想當時世無道濟誰堪倚禍及韓康事可知願率鬼雄同敵愾庶殲蛇豕靖邊陲

拔山蓋世稱先烈爲國捐軀見後昆方待馬遷傳貨殖遽隨先軫痛歸元布衣偏識國家義肉食乃辜茅土恩後事茫茫難逆料大招斬返戚俞魂

明戚繼光俞大猷皆禦倭有功者

三月十日偕伯安寶權崇皋禹枚智陔赴高嶢別墅一棹瓜皮艇搖來雲水鄉但忻塵垢遠都覺主賓忘花木不迎拒鷗鳬無短長卽茲永朝夕何必羨羲皇

太華山雨後夜坐待月

三月十四

萬壑松濤擁一樓晚春天氣似深秋望窮原野雲猶溼寒襲衣襟雨乍收各誦新詩斟聲律細談舊事數更籌置身同在最高處俛視天人等一漚



曉起鬢鏡軒遠眺

大地槃槃在眼中湖流西去日昇東雲容野色迷青靄人語天  
聲墮碧空據亂爭端類蠻觸浮雲霸業笑蒙隆且乘佳興理遊  
屐世事真吹馬耳風

西湖感事二首

直達颿輪坦道開眼中突兀見亭臺名山例合兵家佔漫許詩  
人策蹇來

鑿翠流丹繚屋垣迴廊高柱五龍蟠強藩偏霸銷沉後見此巍  
峨氣象尊

壬申上巳同人十刹海襖集以白香山三月三日詩分韻道  
遠未赴纓蘅代拈得歇字

茶陵娛水竹廣雅嘯風月陳跡不可尋盛事久銷歇落落舊都  
彥各抱九仙骨襖集踵前徽清思並颿發觴詠接蘭亭銅駝慨  
蕪沒祓除飲文字連年幸無闕南瞻滬江濱煙塵尙馳突此地  
得高會辟世等仙窟避世亦何心相視寧秦越積痼博暫歡陽  
阿聊晞髮祓除佳兵氣尙可舒鬱勃搜句勿逡遲例有金谷罰  
東程擷華南昌

颿輪子夜快談

與君同乘津浦夜車南下  
抵掌談詩事在辛酉秋中

詩一別爭禁十載思聞說易

廬刊稿就流傳曾不到天涯

東鄒樹文吳門

歇浦相逢喜欲狂吳門柳色幾青蒼爭如憂患催人老一度烽煙兩鬢霜

東胡石青開封

故人蹤跡十年疏曾與尋求海外書黃犬不來雙鯉杳當年息壤竟何如

戢勁臣參議自北平以近影見貽覆柬

走馬南遊又北旋英姿颯爽勝從前寄聲頗牧加餐飯照眼邊烽未熄煙

社友以海棠花下小影見貽覆柬

論交寤寐早通神展晤洵知我輩人雅度宜教團扇畫清標遙望後車塵舊京景物輝江管薄海詩名塾郭巾想見吟情正酣暢海棠花下十分春

讀史書懷

起陸紛龍蛇殺機遍大地天心久去漢冠履遂倒置駟儉會廝養踞高位谿壑狼虎深嗜欲犬羊肆治絲緒益勞斬麻刀孰利試繙相斫史歷稽分裂事數十或百年昇平豈易致況處



大通世列強環而伺豆煎尙未熄瓜剖已莫避觥觥所南翁耿  
耿抱忠義一成猶中興孤島亦見志其心良可嘉其策苦未備  
今昔既異情強弱復殊勢上者石晉耳劉豫張邦昌抑其次帝秦  
終蹈亡用遼恐非計虛冀鼎祚延徒供傀儡戲對山車在前覆  
轍可再試不如縱扁舟知時善藏器忠告希朋交嚶鳴惜氣類  
忍作袖手看聊用伸吾意

錢君士青以先德林富公暨戴宜人傳文見眎奉題

錢子嶽嶽跨輩行京朝一出騰飛黃中外敷歷廿餘載足令家  
乘增輝光萬里馳書眎我二老傳嚴修賀廣龔心湛江朝宗大筆煌  
煌楹書并荷機杼教大河巨浸淵源長盛德端推仲弓老潛星  
不曜韜光茫明德達人古有例況乃慈訓勤萱堂機聲燈影洪  
北江篝燈課讀周養廉與楊屏衡君其繼起聲名揚少微寶婺雙  
歸帝座旁冥算計達百年強有子如斯何讓壽而昌我撫杯棬  
心焉傷生不逮養椎祭空牛羊

樹五以見和賞牡丹五律相眎漫和

不盡娛姍態留教賞會新一枝矜國色百卉殿陽春也稱天南  
豔偏汚洛下塵近洛陽與設切甚囂且塵上清平三絕調念爾夜郎人

前至漁生處連續三日有見詢者詩以答之

出城連日笑吾儕城內寧無國色佳不雜世情花倍好偏從市外遣春懷

寄懷鐵珊金陵法曹

僅憑詩柬知蹤跡

去年得其自三九社寄來詩柬

飄瞥流光又隔年別後好懷祇歌

詠却餘觸處動哀憐迢迢鄉夢輕千里落落晨星各一天且著解冠非失計歲寒相冀保貞堅

題采風錄全刊後

名流幾許罄肝脾勝似輶軒采不遺涕笑都堪存稗史興衰略可見微辭江湖浩蕩成孤賞者舊風流賸一時政恐續編婪尾集噍音激響倍增欵

和小魯移居詩元韻

藉甚才名王子安彩鸞佳配兩俱難琴書妥貼行窩樂花雨續紛丈室寬容我全天甘寂寂讓他盛地說桓桓何時相見一樽酒商略詩篇到夜闌

附原

移居遂安伯胡同有作

曾學孔

占得蝸居亦遂安兩年棲穩一枝難

予與叔鐸結禱兩載已五移居

長閒轉覺身

無累薄醉還疑量儻寬但有琴書供嘯傲且栽松竹與盤桓

對衡况接楊夫子

嘯谷

鄉味時同話夜闌



星海以遊高曉西山諸詩見眎覆柬一首

山遊我亦老成癖卻爲塵勞負此回

滌園遣人相邀未果往

清景描摹無逸

失新詩補讀當追陪驚厖儻詣幽僧話題鳳懸知佳客來

過余草堂

未晤

他日草堂更延佇遲君覓句共傾盃

寄懷竹村北平兼訊逸塘

荒荒滿目海流橫雲樹依稀接故京歷下三王並風雅

二君本同宗系逸塘

弟亦能詩

軍中一范舊威名鶯飛草長春三月雨晦風瀟夜五更非

是子規啼不到薊門煙景太關情

邀集南雅詩社以詩代柬

六月初六

翠湖蓮社並成塵冷落陰壇二十春

翠湖吟社蓮社吟社爲陳嵐青趙繼村二丈所倡導均在廿年前

老

輩流風猶可溯新知舊雨況相親盤餐奚必謀兼味情話惟應

共率真折柬招邀自愧始佇看驚座吐文茵

南雅第一集奉酬滌園弢父

桑田滄海今何世吟社重興轉喟然舉目神州嗟破碎藏身藕

孔倖安全期從正始追前軌盡捲蒼茫入錦箋祇恐艱危時事

亟編詩續到匪風篇

國事日非日人又由遼侵榆關不勝匪風下泉之感矣

滌園社集讀畫看書頗備文會之樂輒書所懷呈

同社諸君子

少壯難禁撫髀嗟哦詩肝肺出秋枿頻經世路成衰鈍一臥滄江感歲華落落成交依涇沫嘈嘈時曲厭淫哇誰如吾輩文觴樂

是日星期例得酬應微逐

讀畫評書到日斜

星迴節

亦社題也故事有二一爲阿南一爲慈善夫人各系以詩

六月星迴說令辰阿南往事去如塵惟餘鄩善城頭月照見貽榛贈芍人

德源城郭莽蕭條慈善夫人久寂寥大節如山猶泯滅浮名虛譽枉囂囂

蒙顛段蹶彤芬在谷變陵遷世事差欲問德源不知處春風開遍自由花

橫流滿地蕩新潮舊事都隨舊歷銷記得年時當此夕銀花火樹賽元宵

寶權因病持詩戒爲代作三首塞責

諸君風雅各翩翩旗鼓重張意洒然我似參寥參末座不施文字只談禪

維摩一病強支離筆硯塵封久廢詞幸有竹溪先例在社期必到卻無詩

楊竹溪先生每詩社必到但不作詩

徧讀佳章意也消何須卮語續前貂淵明琴軫羊公鶴一例相



看爲解嘲

寶權招集南雅第三社卽事成詠

羲和控飛馭瞬瞥到立秋主人崇社約走簡招吟儔珠璣燦盈目  
撚髭讀數週彬彬松雪翁佳什連篇投此事更推袁史乘廣羅搜公謹  
茹騷雅熟探文選樓梅村與退谷曲異工相侔餘子並超逸翩翩今勝流  
大都耽禪靜止酒辭觥籌頗極談諧歡言同物外游有時慨新亭徒塵漆  
室憂不如且行樂塵事空悠悠七夕二首

瓜果慇懃祝鵲津祇希返樸更還淳不觀世變窮機朽只益婆娑造業因

柳子奇文著汗青也同兒女拜雙星世間大巧偏如拙更向天孫與乞靈

夏日閒居遣興十首

湖北湖南自在行擺除俗累一身輕猶漸賣藥韓康老入市教人識姓名  
偶行湖上常有隨而干乞者不敢多出

澄心舊紙冷金箋隨意揮毫廣墨緣文字祇今成弩末也同風月不論錢  
有以佳紙索書問潤例者不答逕書與之

芸香顛倒蠹魚身上下千秋趣最真尊客妙言吾印可書巢始

是會心人 李尊客謂書籍須使環身而置取便繙覽古所稱書巢真是有會心人云

班荆常喜故人至懸榻爲妨僮父來我似半山專一壑偶聞敏戶便疑猜

一角高樓鎮日扃白檀香裊誦心經市聲不到蕭閒地疑有頻伽隔牖聽

兒孫賦性各迂疏不解趨時似老夫但喜閒情歌擊壤蹙眉干祿魯公書

手栽疏柳幾週星嫩綠葱濃被一庭秀色年年渾不改爲誰眼白爲誰青

不獨官休鄰里生 巢經巢詩官退里鄰生 無官賈豎亦相輕 美國人嘗謂余中國爲官世界直接間接均須有官

始能立足美國爲工商世界故云然其他恐亦不免也 百年以後空人我拓眼乾坤意氣平

血流漂杵已疑書遷固明刑范曄誅欲起九原證因果就中曲筆有還無

閱盡翻雲覆雨情此心止水與平衡憑將獨立蒼茫意靜看枯棋後一枰

會澤首義樓成詩以落之

頌莽諛溫盛爾時籌安民意肆奸欺義麾一舉陰霾解方牧羣雄鞭弭隨回首不堪孤注擲苦心豈必盡人知十年幕府西州



路注海傾河此淚垂

名世鍾生迥不同鬱葱佳氣望東蒙山川偶一宣靈祕時勢相  
需奏偉功傳檄先聲風草靡揮戈再見日輪中龍潭夜月同千  
古石爛泉枯永念公

農家

瞳瞳滿簷明朝瞰老農晨炊雙瓦盆苦蕎甘饅供一飽籬傍圍  
坐笑語溫今年禾稼猶未熟淫雨漫漫浸田麓收成十九已無  
望况乃一畝徵一斛今年將改徵本色以時價計幾如此數東鄰有子方壯年輟耕入  
伍操戈鋌寒暑不見曾幾時連雲架屋饒金錢西鄰有子販鸚  
粟操奇取贏稱富足均勝枯守十畝田終歲勤苦空碌碌我聞  
其語深嗟咨人民本計乃如斯十年盡成兵與僧倉廩衣食焉  
取資恒業既虛寡廉恥相斫相爭何時已許陳舊說火燎原禹  
域自此多事矣

五十六初度住高嶢別墅

前年暴雨親朋驚去年寂居少懽情忽忽星歷增一歲淫雨又  
如天河傾運化循環若有定祇恐秋漲湮田塍囊琴挾書重慙  
此田夫野老相將迎舊樹詫比兒童長新鄰喜見屋廬成古逸建雙修庵  
適相此鄰住寺僧伽已代謝疇洳水潦失縱橫山中景物亦嬾變毋

怪塵俗多紛更要如舟動岸不移此心炯然常虛明誰何機來無起滅人間歲月空崢嶸明年再到復何似湖光山色相與清

饒園秋集

園在東城角主人取東坡眞簾谷詩意以饒名之

殷春樓畔客停車來過簷簷太守家園有擘龍供鋪啜座開文燕鬪尖叉涼颺故故侵衣薄霜色駸駸入鬢華還借西風助吟興漫勞秋士動悲嗟

秋聲

南雅社第五集詩題

輕露濕空階涼月挂高樹颯颯西南來萬派奔騰注綠葉紛辭枝朱顏亦改故相期歲寒心不彫守吾素

秋色

漲落沙渚平雲淨天宇濶雁陣橫空來衰柳垂廣陌黃葉何處村時有幽人迹欲倩荆關筆約略爲設色

秋夢

新涼衾枕親垂簾妙香炷俄化漆園蝶栩栩自來去葭蒼露白間伊人如可遇霜鐘一聲鳴蘧然小窗曙

秋思

霜風正淒緊蕭條關河清登樓試眺望悵然多遠情幽士感節物閨人念戍征何如一尊酒醉伴黃菊英



雞足山

以下三題皆社友所擬於滇獨黔三省古蹟各舉其一也

飲光入定後奕世倡禪宗歷劫山如故朵朵堆芙蓉左瞰蒼洱  
勝右連康藏峯諸天如可接古德留遺蹟或謂在印度茲山名  
實重庸知妙香國古本阿育封迦葉於雞足山入定或云山在東印度然  
大理國本在阿育王舊封內非異地也佛  
法自昔盛接葉鳴鼓鐘寰宇共傾仰名僧時一逢華首試登眺  
雲氣蟠心胸落迦曾躋攀視斯遜龍從圖遠乃舍近對山殊愧  
容何當結勝侶策杖遙相從

浣花草堂

詩老不可作浣花留草堂一室恣嘯咏天地爲低昂季鷹嚴武字  
信可兒竺舊崇文章俾免茅屋歎殊過廣厦藏我昔升堂階一  
瓣通心香水木劇明瑟龜臯各徜徉池內故多龜斯人自不朽景  
物何足臧子雲有草亭並以人著彰寥寥千載後誰其嗣芬芳

紅崖碑

在貴州永甯縣西北六十里諸葛營

客從夜郎來貽我紅崖碑云是殷高宗征伐銘功施

說自嘉慶中武  
威張介侯謝倡

始呂堯仙鰲叔  
續輩承之

巉巖勢陡絕架閣勞旣椎數日得一紙所費良不貲

鬱律走龍蛇文字信瑰奇越譯難句讀至今未全知或謂誓苗  
辭武侯當年垂或謂係土語詰屈匪夷思楚南魏與鄒釋解無  
游移魏默深鰲叔續均  
有釋文鰲辭尤辯吳王吳驪翁  
王嘯山並傳拓漫飢有歌詩均伸殷蹟說

頗足光邊陲經巢嗜古士著錄乃見遺

經巢遺弟之吹角壩取盧豐碑詩有云黔中且無宋人刻况願上此

知難續又訪齊火碑詩紅崖光微萬大長刻自高宗伐鬼方鄒君考釋芳可信會鼎岫嶠同岐陽辭向游移外此別無專文訂正也

即亭宗禹經黑水

導二危地近二盤會

即亭謂禹導黑水至三危在二盤之會是崖地近殆即三危之禹蹟歟云云

其間有古祠

地理志益州渠縣下有黑水祠鄭康成即引以注禹貢是即南北盤江為黑水之例證

謂是治水蹟良非私臆窺字青

而石赤氣象殊岐嶷泐留二千年神物應護持持較夏岫嶠相

差僅毫釐惟與禹壇字形神頗差池謝山於二事經經猶見疑

全謝山謂岫嶠碑及禹壇吉日癸巳四字皆後人所偽作

禹貢兩黑水異說亦繁滋

須搜良例詳確考正之滇黔論舊蹟權輿當在茲

讀孫師鄭先生自壽詩率次元韻

棟折榱崩僑壓憂國防岌岌慮難周朝陽有孰鳴孤鳳傾廈無人問萬牛江表山川空王氣少年官職大長秋

於詩少年初拜大長秋垂轡振策謁通侯

家居盡入纖兒手禍福興亡任自求

獨彈古調漫嗟吁

嶠嶠不與翁俱連羣見抱朴子

千里嚶鳴德不孤垂老光陰銷蠹簡連羣棲

息有麟虞

麟虞不與翁俱連羣見抱朴子

齊東稗說宜徵實

原詩厭見景山雄項泣虞注謂唐督繼堯所任女叔書某氏云云殊非

事竇薊北詩筒偶寄娛風會祇今趨末季可能追彭到騶吾

孫少元先生見和前作再次元韻奉答

嫠婦徒深漆室憂無心恤緯念宗周逐就環伺羣蛇豕盲瞽其



如風馬牛東北長城隳萬里是非公論付千秋且隨三五同心

侶廣和詩篇互應求

采風南雅兩社均與唱和

俛仰蕭廬獨慨吁茫茫世路一身孤閒居霜鬢添潘岳流別文章陋摯虞八識田中猶起滅萬書堆裏足媮娛朝來攬鏡窺顏面頗覺今吾異故吾

### 題沈曙秋西山紀遊圖

聯翩裙屐入雲中來訪梁王避暑宮大好湖山供跌宕俊遊詩思極空濛卻煩健筆如霜鶻追寫前蹤紀雪鴻自是君家衣鉢在開圖錯認石田翁

### 書抱素堂集後卽柬尊庵

五華五子去如雲

道光末戴惇等五人能詩稱五華五子菊君稍後出而差勝

風雅翩翩獨不羣十卷

新詩長壽世

原印六卷補遺一卷鈔本尙有三卷

一家高咏劇憐君騰驤未遂徒齎志

下馬尤稱善屬文

君歷襄戎幕筆政

且喜楹書無恙在孫枝能爲嗣

清芬

### 附尊庵和作

高義真能上薄雲風流儒雅早空羣摩挲祖硯應憐我管領

詩壇合讓君話舊尚思同桂榜求書得許篆蕉文舛來喜有  
吟箋貺讀罷猶餘齒頰芬

再次前韻答尊庵

亂事當年變白雲一編雅詠獨超羣衰時無奈今猶昔冷眼相  
看我與君餘緒尙能彰吏績效顰自愧學倉文佳章讀罷看佳  
畫遺韻流風奕世芬

小重陽日嚼根移社集

往歲登高圓通巔鱗鱗萬瓦浮晴煙鐵峯庵頭共題石流光彈

指今六年

丁卯重九日張君尊鵬招同樹園惺庵於陸山登高題石暢飲日暮始回今六

年矣舊事成塵那可說風風雨雨又佳節

（原稿風風雨又佳節）

故人如

故續追歡祇惜松杏金甌缺石齋顏老興未衰預招佳客聯翩  
來插萸何有異鄉感落帽不妨相嘲詼昨日重陽今日展

唐人以九月十

九日爲展重陽今姑借用

要令佳期約終踐黃雞紫蟹剛入饌丹桂秋英常在

眼獨憐時會多遷移國慶翻成國難期僅賸吾儕詩酒聚空憶

承平士女嬉對菊持盃三太息落木西風轉蕭瑟試向崇邱一

登覽浮雲黯黯蔽白日



纏蘅自安慶寄脉和散釋詩并索和作次韻奉答

何時書劍去燕京  
諒值安車聘魯生  
時見新詩傳海內  
每將舊夢話春明  
裁箋遠寄天邊雁  
鬪韻甘爲城下盟  
日對皖公山色好  
探囊佳句更天成

再疊前韻書感

久拋簪紱遠神京  
點點霜華兩鬢生  
一壑能專身遂隱  
尺書乍接眼猶明  
相望並有黃龍恨  
太息難尋白馬盟  
舒皖將材天下選  
懷哉孰可與相成





定庵詩存卷之四

姚安由雲龍夔舉撰男振

羣鐸校字

瑞熙弟依前寄懷鐵珊韻見懷再次前韻寄答

一別那堪八千里相望各近六旬年諸昆我自慙封末少子君

近命玉元姪赴蘇隨侍就讀

來雁又飛苴蘭地持螯劇憶菊花天風塵

泱泱誰知己耿介還期白首堅

田家四詠

嘗新

陳陳紅腐盡銷除升穀都循呂氏書却怪經巢不解事謂餐老米幸何如

呂氏春秋孟秋之月升穀嘗新

築場

編籬插棘敞當中梯稗秔秬並可容直待倉箱收貯後拋球猶自任兒童

刈穀

正試鎌刀獲取時秋風禾黍望離離祇憐長白山前路空誦甯人刈穀詩

打稻

鶴唳鴻嗷耳慣驚居然東作慶西成破間試向村墟去失喜家  
家打稻聲

玉清山館月夜小集十月十三日

炯炯何時月清光直到今難逢文友會照徹古人心落木寒初  
重唧盃話易深雲天苟相假良夜數開襟  
靜室無塵雜清談盪俗襟古今入懷抱城市亦山林對此愜幽  
賞瑩然生道心料應何水部寒夜聳肩吟

石虎歌

石虎岡爲明趙忠愍公譔故里近當道以石虎涉迷信毀之

碧雞西翥東騰驤長陞一綫趨南岡滙爲形勝結天穴青烏家  
言析毫芒山嶽有靈孕賢哲忠愍趙公邦之光立朝侃侃樹奇  
節殺賊不遂甘鑊湯生食人粟死人事真能與國同存亡忠魂  
一去三百載空留石虎傳芬芳祇今烽火東北來掠我民庶如  
大羊虎兮虎兮不能語坐視寇盜侵封疆笑虎病虎俱莫似反  
類紙虎空衷腸我聞武侯威似虎敵人畏之走且僵又聞封君  
貪如虎化虎食人人盡傷石旣無靈懾百獸誠恐張引滋禍殃  
鬪饅山水各得所宜界有北羣豺狼不然數座爲說法或者點  
頭能參詳不才嗜古喜探訪亦復傷時多慨慷碑蹟摩挲人安  
往憑弔獨立心蒼茫



偶病有作

人生觸處悔應多，醉飽微差受折磨。不納谷神成李泌，難驅病苦似維摩。道心偶逐沾泥絮，食餌幾令陷網羅。五蘊五塵常繚繞，何時超脫遠羣魔。

性圃丈以開化八景屬題，因效朱竹垞永嘉雜詩體各成一首。

西華列戟

三十六山峯峯列，畫戟不戰能屈人。邊烽庶永熄，盤水迴波。

蜿蜒如游龍，一瀉十三曲。同是出山泉，利澤殊混濁。虎溝烟雨。

山君踞山溪，溪形適相肖。相送莫過橋，恐亦成三笑。

二橋煙柳

二橋相望處，煙柳鎮絲絲。莫怪少攀折，無多傷別離。

天塹飛虹

疑上劍門關，飛瀑落虹影。欲浣銀河筆，一寫奇橫景。

飛鳳昂霄

城南望城北，山勢起飛鳳。翼若垂天雲，覆此億萬衆。  
篆文鳳即騰

二台夕照

平台峙東郭麗景紛將迎不愁夕照晚更睹圓月生

大興雙桂

寺中雙桂經兵燹廢而復盛

人事有代謝天香無生滅此中饒禪味豈僅鼻功德

壽錢士青六十

君辭官僑居西湖

回頭五十九年間花甲重週類轉環敷歷聲名滿中外優游頤  
養藉湖山遙飛一棹將微意爲祝千秋駐盛顏我亦曾經滄海  
客祇慚雙鬢已先斑

題蒙化徐星五先生殉難事略後

早服儒先懷五常終看大節著堂堂拚將一障苞桑繫遂令千  
秋姓字香擊賊司農生不顧護鄉包立死猶強孤忠耿耿符前  
哲無愧雲川廟食長

就宅左小葺林園星海以詩見貺依韻奉答時曰本方入榆  
關侵華北國勢岌岌不禁憂從中來也

抱朴移家地轉幽十年寒暑換絺裘

前居一邱田嫌近鬧市移小  
吉坡地較幽靜屈指剛十年

曾經

火宅難回顧且葺荒園當臥游勝日期君盃共把新詩貺我筆  
頻抽蓬門早晚移高履莫事時登王粲樓

又驚烽火逼燕幽何處英雄遇褐裘一士未聞稱謔謔羣兒但



解作嬉游枯棋刮角疇相救宦海閒身幸早抽種種鬢毛嗟老矣祇宜棲息隱君樓

附原作

小吉坡前闢地幽更從鄰院築菟裘向禽敕斷家人事袁盎追陪里巷游垂老篆書蟲欲活最新詩緒繭初抽蕭齋祇在東牆外容我閑時便上樓

東坡生日社集

公昔哦詩贊李白謫仙非謫乃其游湖公生平得失事蹤跡毋亦白也儔立朝在位雖頗勝終從黃州遷惠州歡愉難工窮易好詩歌文字彌復優尙竟雍容安華貴未免庸儻儕悠悠命官磨蝎何足計逸才天馬不可囚世上小兒多忌諱公已自言無怨尤區區六十六年中游戲偶爲人間留公之精靈耀千載日月經天江河流異代有人與悵望數公甲子發慨謳心香一瓣聊髣髴臘酒百壺嘗新蜀卻恨不辰邁世變幸與不幸寧相侔公生景祐迄靖國終始未曾缺金甌桑海變幻乃如此搔首問公公聞不

哀渝關

一名臨渝因下有渝水故名見唐志今作榆誤

毒霧東捲漫天黑師干盡化萑宏血零鴻斷雁哀無辜三千遊

魂歸不得

報載日寇攻關破火劇烈人  
民一日內死傷三千餘人

臨間自古崇金墉一朝虜犯傳

驚烽士非田橫僅五百於思棄甲成沙蟲

報載守關兵士  
一團實只五百我聞馬璘

敗朝義揮斥區區止此數又聞武穆破金人衝鋒不過五百騎

古人何獨成丈夫趙趙不戰胡爲乎人施刀俎我魚肉坐失天

險隳良圖綠疇黃花自深阻紫蒙白狼亦門戶

皆古設關附近  
扼塞城寨之名疏防

乃類宣和末從此洞達及堂宇羣雄耽耽方協盟七十二沽無

堅城舐糠及米吾滋懼僑壓誰搢棖棟傾嗚呼翁

德

王

俞

大猷胡宗憲

不可作愷陽風義今寥落

孫承宗字愷陽三守山  
海關無失事後殉節

終致越師

入吳門仰天愁看晴雲薄

白香山生日同人小集寓齋醺酒爲壽

香山壽觴盛東粵老友弢父爲我說愼昔僅爲玉局會至今風  
流幾歇絕城南城北嬉新春僖夫濁醪甚囂塵那識吾儕賞寂  
寞園蔬遠薦唐詩人公詩如話老嫗解時相愛讀雞林買規諷  
曲盡風人情何論俗體矜童駭生當平世足優游不隨牛李爭  
戈矛歸老洛陽盛歌詠一編長慶傳千秋較量身世發深慨眼  
底河山紛破碎儻公生與我並時應灑一掬同情淚海棠初放  
桃初開壽公且斂新亭哀宜趁芳辰寫懷抱祇愁佳客期不來

社集到者日稀以省會之大謀  
一文字之聚亦不易可慨也



纓蘅自安慶寄示癸酉元日詩次韻奉和二首

荏苒流光咄逼人屠蘇又度一年春  
六旬扶健天非薄萬卷供攤道不貧  
梅訊遠傳煩驛使椒盤粗具讓嘉賓  
朔方戰士塵風雪我媿天南作幸民

舒州猶有未歸人卻效昌黎賦感春  
萬里傳賤徵氣類十年借箸策均貧  
君元日夜歸詩有凍羽爭棲故繞林之句  
未容向尙完家計且學郗超入幕賓  
何日能銷兵氣盡歸耕同作葛天民

附原作

翠微猶待北歸人誰信淹留負卻春  
綵筆如新才豈減辛盤爭具歲寧貧  
長期薄海銷兵甲真與寒梅作主賓  
一載盛唐山下住俸錢我自媿流民

花朝社集

萬人如海苴蘭城氣雲汗雨紛紛營營談走幾  
歎無覓處社約乃得歡將迎自秋徂春數數聚  
聯吟直至百花生所惜入春少廿雨月餘無日  
不放晴花訊寥落莫供賞更愁四野妨農耕天  
時人事互倚伏起看大角猶纏兵朔方健兒今  
安有徒令杞人憂天傾招邀且謀文字飲祛煩  
避俗求友聲坐對好花忘世故開襟彌觸風騷  
情昔賢秉燭方卜夜況有燈月交輝明舍此兀兀

何所樂虛負良時蓬累行願今再接再厲乃費省事約申前盟  
黃蘗脫粟亦至味安用鋪啜思美并但期佳會無輟廢飛箋擊  
鉢相角爭一任頭上歲月空崢嶸

花朝後二日乘摩託車遊海源寺歸後柬小泉

時何君同遊

得窮佳勝卽歡怡半日飆輪野外馳山水有靈似相識姓名賣  
藥漸無知檀林祇樹經三宿碧瓦朱欄又一時稍喜故人何水  
部倚筇猶與論心期

江村課子圖

星海屬題

繫昔介庵叟築舍向湖曲

趙介庵大有向  
湖村舍詩集

抗懷發高詠遐邇盡傾服

並時有達人同邑復同族清江抱村流結茆三間屋花竹覆四  
圍蕭然意自足耕餘攤經卷深夜課兒讀一燈照青熒萬象昭  
靜肅飄忽五十年變遷到陵谷當時寧馨兒文藻挾芬馥珠江  
羈宦輟騷壇偶角逐顧念趨庭事情景宛在目倩人作茲圖永  
懷念鞠育走也愧薄德艸角愴風木析薪熟佳話披圖想高躅  
融融天倫樂寧減萬鍾祿自悲鮮民身歎羨君家福

玉清山館修禊

春風曰鼓盪萬物爭鮮新似憐詩境寂麗景爲鋪陳花朝覺幾  
日復茲邁良辰蘭亭雖往矣佳節難遽淪山館聚裙展得非稽



阮倫合座吐清辯列筵無俗賓惟恨修羅偏幽薊彌兵塵祓除  
苦不易茶炭哀斯民外侮肇自侮試與窮果因坐視疆宇蹙神  
州寧有人安得旋轉才大地胥迴春明年重襖集相嬉湖水濱  
輓楊竹君母陳太夫人

珠江春水碧於油暇祝曾添海屋籌恰趁板輿旋故里俄聞蓬  
島返仙舟褒揚四字頒榮璽國府題頌仁心  
淑行四字福壽雙歸演舊疇我願

抽毫增志乘養堂紗幔竝傳留

早歲持家茹苦辛門庭光大豈無因推恩哺乳全猶子截髮張  
筵款上賓鶴弔事同徵舊史牛眠地好泐貞珉作忠移孝期賢  
嗣北望邊關莽戰塵

庾君臣堯購備書籍於墨江圖書館徵詩紀其事

海上傳來有異書一時紙價貴三都千金不惜郵籤致原稿至  
傍支字萬  
卷端爲梓里儲絕勝高樓築傳是無慚華冑接肩吾佇看文化  
蒸蒸起瓴借從今得所需

春暉永慕圖臣堯屬題

燕山丹桂五株榮睠念重闈夢寐縈愛日不忘設紗幔流風猶  
可邈蘭成一堂樂事天倫叙萬石家規奕世貞叔季孝思能不  
匱披圖令我意屏營

碧溪漁隱圖

臣堯爲其先德徵題

辛苦當年貿有無，林泉歸隱愛吾廬。  
一竿自具濠梁想，百世長留箕穎圖。  
饒有清風颯梁孟，不妨偉抱似陶朱。  
扁舟疑是鷗夷子，浸碧溪流卽五湖。

過仰山書齋閒話

蕭爽門庭掩竹苔，相逢懷抱頓時開。  
翠湖煙柳身同隱，黃海風波首重回。

丁未僧赴日本於黃海洋面遇災幾殆

各有圖書堪嘯傲，賸憑造物與排推。

莫嫌炳燭光陰少，有味青燈似幼孩。

贈金松岑

時以撰通志列傳來滇

文字精神息息通，直須求索古人中。  
堂堂旗陣當之靡，滾滾詞源瀉不窮。  
空谷足音真失喜，穹山品節歎彌崇。  
天南名輩堪僂數，妙筆傳來協至公。

纏蘅自安慶郵寄近作讀之感賦二首

偃仰書巢鎮掩扉，眞如空谷足音稀。  
儘教造物風雲變，不奪文章性命依。  
每展郵筒先色喜，爲傷時局累增欷。  
餘年已辦巖棲老，汗漫詩來興欲飛。

卻於銳哲英雄外

綿竹楊銳富順陳崇哲名山吳之英德陽劉子雄並有名時號銳哲英雄

愛讀清新俊逸詩

蜀國山川縈夢寐，舒州風月幾吟披。  
遠遊異地方韓偓，狎主騷



壇繼石遺百事衰時無可樂幸憑文字寫心期

園居

小園半畝足徘徊竹箭花枝爲剪裁攜卷據梧聊自適閉門種  
菜復何猜早應世路深思爛况感風輪轉益哀一事閒居難釋  
抱補天終望濟時才

後圓圓曲

蛾眉自昔傾人國淑女名媛豈易得况是碧玉出寒微奚怪呈  
身祇顏色毗陵村市貨郎兒

本奔牛鎮陳貨郎女

才藝乃稱今古奇

一度孽緣經小劫卒歸鎮將捧巾匣賊氛滾滾漫天來神京玉  
石盡罹災佳人已陷沙叱利豈冀明珠合浦回直掃黃巾如敗  
簪十重錦幃張迎幙從此滇南萬里遊深宮享盡繁華樂繁華  
流水逐香塵老滷衰年覆轍循不隨花藥入宮禁終蹈蓮池甘  
沉淪明季儘多奇女子香君小宛柳如是風義佼佼勝鬚眉白  
門玉京何足齒衆香集中芳名多才調襟懷首屈指

王楊緒徐樹敏及漁洋迎陵等

撰定清初閨秀詞名衆香集園園哀然居首

後來彩雲克琴皆庸流

張勳妾王克琴

餘子卑卑無論矣

祭酒前歌極頑豔後曲賜卿益華瞻畏廬老人著傳奇足令流  
風千載見我漸牛鐸和鍾呂聊拾裨餘彰彼美佩壺欲訪商山  
蹟墓門何處晚煙紫

握蘭簪裁曲圖

散釋屬題

細拍紅牙斟綺詞欲憑絃管喚聾癡  
嗑音變徵都盈耳始是周郎顧曲時

淺斟低唱藐浮名詞客心情有重輕  
不道桓桓射鵬手祇操玉尺訂新聲

舉芳紉佩勤徒結嚙羽含宮意自憐  
一桁溪山傳唱遍底須髭鬢染凌煙

潛龍庵弔建文帝

金川門上陣雲黑龍虎江山倏變色  
袈裟一領送餘生萬里遊蹤歸未得  
初自松陵入南滇流轉江湖四十年  
梵宮剎宇終淪落潛龍遺蹟空留傳  
少康一旅中興奏惠王襄王復堂構  
惜哉選懦非其人屬對早知難大受  
不然鐵函鎖匣豈前知國本未能輕  
動移龍縵燕啄雖定數寧敵叔棣多  
權奇胡濙求仙本譎計鄭和浮舟亦  
故事舍近求遠詎人情視之不如德  
昭類有明國祚得長延壬午遜位實  
成全惜哉殘忍珍士類首領莫保榆  
木川

成祖暴崩於榆木川寶被刺也見近人所著說元室述聞

吁嗟乎國家大器重有託不惜骨肉

輕相薄隱巢變後有貞觀斧聲燭影諱興國  
倘教是事出平民豈非人世大憖惡獨怪明  
主流離俱滇中建文永歷相始終赤



壁山前故庵在猶聞杜宇怨東風

徐君述先研究教育有年頃將赴美益宏造就以詩贈行

豆分瓜剖勢離披大厦疇能一木支  
端賴菁莪勤溉育期成梁棟柱  
傾危君誠志士心偏熱我已衰  
年望尚癡佇取滄溟滋物水歸來  
滴滴洒楊枝

松岑許作蘧園記久而不至詩以促之

邊荒何意接清芬莊介而還復見君

楊升庵亦論莊介其寓宅即在蘧園旁

落落高蹤

繼西渚琅琅古調振南雲剩尋三徑元卿宅肯錫千秋皇甫文  
下里巴詞充耳是風流藻采張吾軍

湖山遊息各歡然歸去剛餐滴粉團

歲時記五月五日作滴粉團松岑以五月三日到蘇

駒繫未

酬場藿願鴻泥偶結墨花緣子山賦就小園重夢得銘成陋室  
傳遠道郵程渾不隔青鸞佇看下遙天

廬山萬松林雅集賦詩未與纓蘅代拈得酉字

曩陟匡廬正重九

壬戌在牯嶺度重陽

歷訪萬杉尋五柳十年不赴

山靈招俗狀塵容徒抗走曹侯報我盛文讌一時裙屐萃林藪  
同聲遠過竹林賢勝侶還參蓮社友就中皤皤散原翁筆吐光  
芒射牛斗自餘人物天下望德星相聚良非偶亮有憂樂繫安  
危寧止風流鬪詩酒我慚家食但臥遊日理舊聞探二酉曠懷

空寄停雲思佳會迢遙阻攜手郵書直送彩雲南夢魂已到彭  
湖口山中景物多廢興豈況塵寰幻蒼狗人生聚合泡影耳百  
年而後復何有願抒宏抱濟艱難庶與茲山同不朽餘年倘得  
覘太平尙可追隨羣賢後和詩聊以誌盛舉蕪詞祇堪覆醬額  
碧曉山莊謁楊升庵祠

有明良輔稱三楊滇蜀二楊尤堂堂滇楊槃才不世出彪炳勳  
業兼文章蜀楊妙年魁多士忠肝古誼方天祥二公事跡雖各  
異並以遷寓留他鄉石淙尙論侯他日新都始末言能詳父居  
揆席母名族巍科早掇起騰驤無何大禮爭論起張桂橫議如  
強梁大臣不言安能默撼門大哭驚天閭捋鬚逆鱗夫何惜要  
令正義能伸張廷杖流血毋乃酷一謫萬里來邊疆邊疆化育  
資起發功業不遂文明昌至今到處留遺蹟碧曉祠宇輝山莊  
我來瞻拜抒蓄念讀公遺著知公長公集雖只八十卷述作百  
種殊汪洋世儒蔑古多忌詬尋癥摘瑕同倡狂或謂考據涉破  
碎或謂假託成荒唐祕辛雜事尤猥褻文藻雖麗汚縹湘不知  
公學本博大如波浩浩禾穰穰倉箱豈能免梯稗蚍蜉撼樹徒  
張皇滇人感公相厚意歲時奠酒升馨香願我鄉人同愛護永  
與毛公配食傳芬芳



長至日晉侯招飲枕湖精舍鼓櫂赴之景色如畫

庚氏別業  
時癸酉冬

月初  
六日

長至天公恰放晴招邀裙屐出西城舟從雲水光中過身向湖  
山勝處行已拚餘生老泉石稍從佳日暢心情重來已閱三寒  
暑莫訝松高與屋平

庚午七月與羣立樹五惺甫信宿於此

園中白梅盛開掩映山石間香韵欲絕冬月十五

泉枯木落荒寒甚賴有梅花點綴鮮守素不嫌知己少得春獨  
在衆芳先乍疑白晝繁星滿好伴中宵冷月圓誰識巡檐相賞  
意山茶躑躅讓人傳二花滇中最盛開亦早

湖遊之詩張甫季默均次韻屬和賦答

城中冷暖有陰晴爲豁天真且出城縱壑魚龍堪自恣忘機鷗  
鷺亦隨行饒聞俗論成嗤點憑向詩歌理性情世外桃源非異  
地橘中藕孔見承平

前詩有未盡意補述一首

舉國勞勞正未央意行湖上得清涼循隄負手誰能喻伏案埋  
頭有底忙文字今成強弩末歌謠寫到變風章與君默識中邊  
味拈取蜂窠白蜜嘗

述學詩旨趣東季默張甫

走也於古詩夙曾事鑽仰頗崇真擊派寒山與擊壤白陸逮范

楊香山放翁石湖誠齋

愛好自疇曩近頗厭淺俗因之喜新響有宋

黃山谷陳后山簡齋

梅宛陵

語意並側儻出言皆有物聲情復超朗

善學盛唐賢紬繹殊神往但取槎枿者皮相非心賞所婉寒儉  
腹把筆難運掌時地況限局縱橫構虛想效顰轉枯澀造意空  
技癢炳燭負宿願生晚將安放落落素心人致身何蕭爽相貺  
意至厚使我志慮廣响濡在文字宙合任喧擾

冬夜被盜戲述二首

晝伏夜行溫左語狗偷鼠竊熟章聯較量人世爭攘輩肱篋探  
囊覺汝賢

嘉名君子枉稱傳鼠曰原來但識錢賤視詩書等塵土開門不  
顧幸留全

美國有與歐戰一軍官退伍後偕其婦僑隱北京日與婦詣  
故宮摩挲古物以爲常大有樂此不返之意自物古南遷  
零落喪失感歎痛哭謂諸物皆清君福德所致今之當道  
無福消受也竹村歸自北平爲予述之感而成詠

大弓寶玉盡南遷狼藉宮花羃暮煙感嘆纖兒無福受兩行鉛  
淚落銅仙



題徐貞惠先生逝世三週徵文紀念

先生名世光字友梅世昌弟仕至山東糧道著續河功國  
變後不出喜爲慈善事能書畫有詩文集歿後私謚貞惠

萬頃洪濤指顧平稽朱往績共崢嶸終成廣信嘲家弟

載鑾字安丘封廣信侯安道兄事見晉書

難令元方作阿兄利澤豈曾區出處冲襟  
本自淡華榮易名無媿同文子兩字褒稱恆衆情

三載流光感逝波松楸迴望蔭婆娑尙餘遺愛安瀾慶忍見於  
思棄甲那繼起家聲雄海表歸潛名筆壽巖阿

泰山有先生摩崖書

最難來去分明際疾革從容寫詠歌

彌留時猶寫自紀詩一首付後人

題陸丹林紅樹室時賢書畫集

憫亂憂危無好思祇憑翰墨豁襟期丹林具眼空千古妙筆靈  
心萃一時能爲文明張壁壘寧徒國寶炫瑰奇米家船後張家  
舫

張丑有清河書畫舫

並有神靈與護持

柬陳石遺先生

散原滄趣竝英耆鼎峙騷壇有石遺海內談詩尊北斗箇中知  
已數南皮箸書老至身看等載酒人來字問奇莫道天荒千里  
外郵牋倘許析然疑

劉曉上節鎮啓一千里外豈曰天然

讀纓蘅自南昌迄金陵近作感懷卻寄

純青爐火幾甄陶一字千金不可撓俊語遍傳江左右清詞上薄古風騷韓歐不作心偏苦坡穎而還調獨高  
橫觸吟懷天際遠美人香草望衡皋

喜瑞熙弟歸自蘇州

八載游蹤款緩回一家喜逐笑顏開相看白髮都非故始信青春不再來  
婚嫁未完兒女願稻梁翻逐雁鴻哀談及鵲原往事隱恨曷已歲朝恰爲前塵垢是日爲臘月二十一立春抵掌同傾竹葉杯

滌園圖

惺甫屬題惺甫嘗夢曾文正來訪謂之曰予前世爲袁瑛子戚也晤而考之知袁字漱大曾官松江太守故顏其齋曰儀曾園曰滌

宙合方冥昏何地堪隱處龍池受一塵卜居乃得所香草思美人託契在往古  
緬昔湘鄉公志業超俗伍慕蘭者伊誰厥惟崧生甫溯當締交時年各廿四五  
英英植孤標汨汨濬藝圃驤首冠名場君領癸卯解頭揮翰佐幙府時事濟艱危積勞領銅虎急流

既遂初餘勇猶可買

君解職後猶時應軍府諮訪隨宜贊助

闢築養天懷命名希前矩

琴書有幽興花藥當治譜臥雪悟再來

徽大藏書室榜曰臥雪廬

槃阿

獲晤語我亦誅茅叢咫尺望衡宇元白兩家春流風猶可數俛仰天地寬脩然遠塵土騎省濡妙筆泉石在阿堵

圖爲徐雲秋繪

小

園摘鴻詞爲謝北周庾

竹村回滇述湘桂之勝感而有作



數年索處始慙憂振策多君事壯游衡嶽煙雲雙袖滿桂林山水一囊收觀光徒作臨淵羨厝火甯同食肉謀

桂省整飭吏治修明武備建威銷萌強鄰亦爲

敘述

太息梁鴻歸國日五噫翻更發深謳

石遺老人枉和拙韻再次前韻奉懷

大師自古屬年耆况是靈光劫後遺不分麤疏逢匠石肯加鞭策置毛皮

蕭貢詩古人相馬置毛皮

迢迢驛使江南至

石遺寓居吳門

渺渺

真人天際思何日登堂行問道豈惟兩字釋狐疑

爲易拙詩箇中二字爲朝端

附石遺作

天遣衰年邁老耆交親零落漸無遺於今上國推吳越孰與聯吟繼陸皮多謝置郵傳傑句大難命駕起相思出遊肯借江山助豈少欣奇更析疑

季默迭前湖遊詩韻見訊依韻奉答

十日沉陰鵲噪晴一時春意滿春城聯吟舊約應重踐當道迷陽未礙行圖史共君娛暮景湖山助我暢幽情長歌帶索風塵外銷盡端居意不平

尊鷗以梅花詩十首見寄奉答

迢遙詩簡寄金閨賦就梅花恰十章鯉札餘香初剖腹龍潭憶舊轉迴腸

詩中憶及黑龍潭唐梅感咽之情溢於言外

茫茫大地憂沉陸落落晨星各吐芒

時松泉在中州亦有詞鈔之寄

爲吟及春理歸棹不須尊美待秋涼

竹村疊韻見和再疊元韻攄懷奉答

先後何分樂與憂祇今歸老任天游身心總向跣趺穩名姓甯期史乘收坐覺儒書輸佛理怕論國計況家謀蕭齋自得逍遙趣且效榮期作嘯謳

季默再和湖遊韻三疊元韻奉答

不關西雨與東晴世事紛紛等化城火宅驚魂漫迴顧荒塗掉臂自遊行慣親木石尋幽趣媿乏檀施覺有情始悔雕蟲矜小技絺章繪句總平平

清明日上塚四疊前韻

難得清明半日晴

晴後小雨

鞭絲帽影競東城誰憐介子偕親隱

也學龐公挈耆行蝴蝶灰飛存舊俗鸚鵡聲起動詩情年來稍幸狼星遠宰木青葱道路平

五疊前韻略述近況柬季默

讀書好趁一春晴筆硯常親嬾出城移晷每因搜典籍破閒偶亦作真行肯將心性供形役漫把文章徇俗情爲否爲臧吾分爾自然躁釋復矜平

六疊前韻再答季默



快閣西窗倚晚晴羣書南面擁專城祇甘蠹簡身從老敢謂乘  
桴道不行卻軌何心嬰世務飛箋如檄助吟情小邦寧與泱泱  
敵蔡鄭惟應及楚平

竹村招邀曇華寺看杜鵑花堅留信宿不果歸後卻柬

嘉招來趁杜鵑紅隨意復興一笑同髣髴春光猶似舊

前此每值花時輒詣

欽約近已數年不到矣

飄蕭衰鬢又凌風

遊寺恒值大風

留賓投轄情偏摯紀勝攤箋

句未工更作西郊遊覽興莫教韶景去匆匆次日有廣園之約

曇華之遊惺甫同時有作次韻答之

精藍名卉供瞿曇傳是陳姬舊隱庵客到花前春正滿

杜鵑花正盛

人

來野外食彌甘華胥夢破經千劫沉水香殘裊一龕不盡雅懷  
促歸轡更期永日作長談

附原作

千年傳說現優曇呼馬山前有舊庵樹遶金梭煙欲暝茶烹  
石銚味回甘飛花疑入維摩室布席還同彌勒龕爲踐龍舒  
居士約松風一榻共清談

庾園杜鵑盛開晉侯招飲惺甫有作余亦繼成

鹿已添雛竹有孫三年三度過名園澄鮮水照波斯鬢爛漫春  
迴杜宇魂雨夜西窗曾剪燭

三年前與惺甫羣立宿於園內之潛樓自羣立返獨遂久不到此

風流北海

憤開尊好乘佳日頻相訪莫學柴桑鎮閉門

徐蘭雪居士寄眎張蘊馨小傳徵題

燕趙由來多烈士悲歌卻現女兒身登臺一掬傷心淚難向歡場索解人

同是天涯淪落輩爲舒積慘向歌場不堪法曲傳天寶多少遺黎掩面傷

天女維摩丈室中天花散處醒迷蒙世間儘有修羅道儻聽天聲悟徹空

竹村招飲方城居近亦以家餽佐之次日有詩相貺依韻奉

酬

一年夏令又從更近局招邀踐宿盟看竹風微差不遠過牆壺榼好同傾渾忘世上紅塵擾忽漫樽前白髮生想是靈山曾共會祇今聚首數班荆

竹村再以詩來更易前作數韻仍次答之

蓼蓼街鼓轉鼃更密詠恬吟禿管城連夕傳送詩筒已二更後矣有僕傳詩同穎

士乞鄰佐饌笑微生歸潛林藪欣同調話到滄桑似解醒長日

不嫌歡會數鐔鐔韓約善以櫻桃製鐔鐔鐔見酉陽雜俎原詩末韻遺邀他日薦朱櫻準可饜新櫻

自題定庵詩話卷首



憫亂憂危祇贅詞批風抹月且談詩自甘食蜜中邊味舉似旁人恐未知

善學三唐是宋賢有書有筆氣蒼堅後來莫誤西江路爲把金釧作意傳

江康瓠先生自桂遊滇喜晤有作

中外聲名四十年來遊噬肯共歡然登音遙繼升庵迹季世猶餘郭泰賢人事可勝陵谷感神州坐見海波填黑頭都講顏如故指示鄉人說舊緣

次答康瓠先生見和前韻

往事長安漫卅年相逢回首轉淒然銅駝早寄荆榛慨金馬羣瞻山斗賢布化瀛寰遊跡徧感時幽憤撫膺填投磚引得瓊瑤報留取飛鴻指爪緣

兩疊前韻奉答康瓠先生兼畱同人

偃臥林邱幾歷年忘懷世事任紛然歸休不待文招隱清醒都無酒中賢話舊更深銀燭燼題詩墨妙彩毫填來從萬里兼旬聚信是三生各有緣

遊太和宮俗名金殿二疊前韻

不扣松扉近十年海天客到復怍然爲探遺跡思良吏

謂明撫陳用賓

合范精金鑄大賢濟勝不嫌輿代步愛山真似壑難填由來鸚鵡飛鳴地可誦心經結佛緣古時山多鸚鵡故名鸚鵡山

遊大觀樓四疊前韻

興廢相循二百年樓初于康熙間樓臺依舊尙巍然俊遊非復昔時盛清賞誰如我輩賢共數心期嗟落落幸無腰鼓鬧填填乘槎儻返重瀛去應望南雲說勝緣

遊黑水祠五疊前韻

即黑龍潭明薛爾望先生全家殉國處

似聞有鶴語堯年柏後梅先各蔚然有唐梅宋柏凜凜清標同處士稜稜忠骨弔前賢風颺幡影通禪寂雷走車聲聒殷填乘汽車往

縱過花時來選勝也應修到幾生緣

預約遊西山及安寧溫泉六疊前韻

跌宕豪情似壯年纔探黑水又連然

黑水連然並見漢書

登山不覺輕塵世

浮海何妨學聖賢且食蛤蜊滋有味疇看精衛願終填天南地北萍蓬合羸得昆湖一段緣

乘小輪舟赴西山七疊前韻

水色山光似去年

去年三月陪金君松岑遊

御風列子意冷然同舟漫比登龍

客破浪堪追鯁鯁賢一例西山同勝概

北平西山同人均曾遊

幾回東海見

塵填壤流寧足供遊賞聊與先生踐宿緣

民十三四之交即有遊滇成約至今始踐



由三清閣至太華山宿華亭寺八疊前韻

梁王宮殿幾何年懷古登臨一喟然蒙叟山川歸稗史微荒搢  
柱仗時賢唐標宋斧人俱杳舊事新詞我欲填一夕不同三宿  
戀行雲流水祇隨緣

由西山至溫泉弔古尋幽信宿始返九疊前韻

往蹟遐稽千百年名人名地有同然篋書偶洩漢時祕

楊升庵謂漢雜事祕

辛出自安寧土司石篋中云云

碑誌猶存唐代賢

有唐河東州刺史王仁求碑

閣老殊勳千載耀狀頭

熱血一腔填

謂楊文襄及升庵議大禮

均爲碧玉泉邊勝更續嘉賓翰墨緣

送別康瓠先生十疊前韻

前期執手又何年聽到驪歌倍黯然絕域寧終甘去去明時有  
望自賢賢國交早晚同盟洽民困回甦闕憾填竚見鸛冠羸海  
返定應重到續前緣

溫泉坐雨次原韻和同遊諸君子

信宿山房內孫氏舒嘯山房蕭寥絕翳氛題襟鴻印雪論世馬空羣  
浙瀝崇朝雨蒸騰膚寸雲澡身猶緒事潤物願彌殷

龍山訪葉香石將軍留針長談歸後賦東

身經百戰卸征衣萬里南天款舊扉老去廉頗能健飯歸潛姚  
仲識先幾謂宋姚平仲卅年交誼今猶故四海艱虞計日非莫怪

霜華飛兩鬢故山松柏已成圍

印度僧巴達倫索題書二十字付之

大法今衰甚東來見此人相逢須護惜文佛是鄉親

僧在易門被竊衣鉢

移住孫氏山房再和前韻

高閣移行榻脩然思不羣江山如助我風雅欲輸君妙緒珠泉湧清言玉屑紛長留清淨體出處漫區分

無錫侯君保三漫游至滇索詩因賦贈侯君盡力教育有年矣

藉甚梁溪舊有聲不辭千里款柴荆江湖浩瀚存師表簡冊流傳識姓名

侯君著單級教授法民國初年即識其名

濟勝君猶腰脚健哦詩我欲肺肝傾

臨岐執手頻珍重竚見欣欣桃李榮

書錢士青天目山紀遊詩後

佳氣臨安望鬱葱歸然天目峙西東名王累世流遺澤賢裔多才有舊風

士青爲武肅後

卅首新詩傳不朽千年勝蹟狀能工會當

笠屐重登覽一一從君訪雪鴻

題趙方山 鈔山水冊袁行笠屬題

清景全收尺幅中溪山罨靄樹龍葱江頭颿影迎初日屋角炊煙颺曉風放佛身經陽羨地分明墨牘子昂翁何當一舸隨波



去便卜村鄰作寓公

題會澤朱氏雙節撫孤圖

天乎何獨薄於朱姑婦相踵均無夫夫死不殉胡爲乎無姑  
煢煢誰撫孤無婦子子孰繼姑三世一髮繫呱呱溝瀆之義非良  
圖婦姑相視頻深吁舍易爲難忍須臾停辛佇苦甘于茶松雪  
軒中讀咿唔啞啞窗外鳴霜烏室黝燈青看模糊姑前婦後形  
影俱針黹督課聲泪枯孤兒嶽嶽洪汪徒文開繪圖徵詠北于洪北江汪龍莊兩君事業  
既就家亦紓遶膝蘭桂皆璠璣歲時萊綵陳歡饒兩母環顧殊  
歡愉天乎何獨厚於朱困勉多成理非誣當年情景妙筆摹機  
聲燈影同艱虞方今世風橫流汙此圖永宜垂世作模模

競華周女士性穎而剛介有學行工組繡任教尤劬懇遐邇  
敬慕之以母氏先歿誓不字侍父終其身及父歿從容處  
分畢遂仰藥以殉其兄浩東輩函告且徵文焉昔在明代  
宋景濂作麗水陳女妙貞碑陳孟嘗作李女孝貞傳皆以  
爲有補名教盡力闡揚競華當教化淩夷之際獨能一意  
孤行振厲末俗是尤難能可貴者也余聞吳姚信之言曰  
昭德以行顯行以名今無有司褒異之典昭德顯行舍文  
字其奚以表揚芬烈傳信來襁用成長歌藉彰至行

西風蕭蕭撼林木寒鳥啞啞遶牆屋中有姑痛孤淑女獨抱遺  
經吞聲哭市兒受恩猶知報矧茲生我蒙撫鞠母兮先我委化  
去虔侍嚴君慰惻獨父物何忍復生存願隨泉壤相追逐吁嗟  
世風日澆漓蠱目豺聲類禽畜性慾邪說揚頽波悖義辜恩恣  
流毒庸中佼佼出巾幗匪獨守身潔如玉毅然祇行心所安非  
干名譽況利祿纂組文繡並能工莘莘學子宏樂育一朝舍身  
全至孝不嫌過當矯末俗我聞漢女有緹縈犯嚴救父免刑戮  
曹娥踴身赴江流至今祠祀留河曲荆關細秀蒲三姑並舍身殉  
父者百世煌煌垂簡牘彼皆至性能過人寧計悠悠訾溝瀆競  
華風讀古人書更異恒流徒碌碌落葉歸根全所天飲水思源  
別衆濁自古人禽由是分斯道廢墜國本蹙輶軒采風如有取  
靜女三章此焉續

豹園招看菊花次日奉柬

時九月初七

尊酒頻招謝未能看花轉覺興飛騰砌蟲預報將開信籬犬知  
迎不速朋佳處祇如人意淡拈來亦解佛中乘

菊中有粉紅千瓣者名  
佛見笑見羣芳譜

脩然不與羣芳競端合濂溪隱逸稱  
閱盡繁華世態多孤標勁骨自嵯峨偶從霧隱舒文采不爲霜  
寒改葉柯清賞宜追陶靖節幽姿還勝曼陀羅

茶花亦名曼陀羅滇中  
最盛然鮮豔而少風波



數叢佳色能分與好供重陽助嘯歌

承賦數盆皆佳品

重九日漁生招飲適覽報章

報名新中華作者方爾韋

有雲南之危機一文

撫時感事慨然有作

瀟瀟暗雨鳴虛廊寒雲四垂天無光幽人索居意不適有客招  
往同壺觴黃花已闌秋色晚益令秋士多感傷方今他族滋偏  
處豺虎賜睖森寒芒許行舊說拾餘唾更樹異幟紛跳梁不爲  
土崩便瓦解賈山至言非虛張建威銷萌我何有魚遊沸釜燕  
處堂況復偉長化異物鄰笛入耳增悽惶感逝憂危萬恨併逢  
辰轉覺心皇皇都人例作重九慶旌旗滿眼爭飄颺徒見眉睫  
忘肘腋恤緯嫠婦空徬徨安得日討國人勤申儆生聚教訓膽  
同嘗期以十年挽巨禍自今更始由重陽嗚呼重陽可危不可  
慶有如在莒無相忘

九月十五夜月下

萬籟沉沉獨倚闌慣逢月好感無端光輝猶似兒時朗操履須  
貞暮歲寒慰眼黃花堪作伴癡心黑海早澄瀾讀書學道休嫌  
晚免卻鮎魚再上竿

感逝

傷徐寶權也

誰分星宮犯蝎磨竟教健骨殞沉疴平生言笑分明在華屋山

邱侯忽過向秀比鄰悽吹笛所居僅隔一牛鳴地 翟公舊第感張羅  
百年人事如彈指一卷歸心向佛陀

得葆三自無錫來書卻寄

空谷跼然喜足音飛鴻一瞥悵離襟尺書珍重伸情愔直比昆明池水深

曾向梁溪訪獻文芒輟遍踏惠峯雲較量山水珂鄉麗早晚輕裝欲就君

臞仙將有平滬之遊作詩送之

舊學沈冥日茲行亦壯圖遺書收散失吾道闢榛蕪鉛槧同楊子  
睎纏似賈胡餘情在山水得句付奚奴

題癯仙窠林覓句圖

圖爲蔡哲夫寒瓊談溶溶月色新夫婦合作

鬱鬱晉城東萬香彌一谷中有澹宕人隱居寄高躅信芳行復吟  
得句工且速餘事搜叢殘討究甘於肉羅列萬牙籤滿架古芬馥  
苴蘭百里內編校就書局如數家內珍盡抒夙所蓄相期殺青後  
歸潛效京叔整董舊篇章歲華曰可讀抗志希古人爾音闕金玉  
蔡君趙管儔爲寫林間屋冰雪融毫端清迥脫塵俗嗟今遍橫流  
何地堪跼伏自唯老方千蕭然守淳樸巡檐聳肩時至味獨醲郁  
歎羨逋仙倫擅此山林福



惺甫五十九初度先一日招游庾莊期爲信宿之留余以女

疾卽夕返城月明風靜扁舟一葉卽景得詩兼以致祝十月十六

庾墅當年幾唱酬飛觥擊鉢門風流蕭騷衰鬢重游客寂寞涼  
宵一葉舟望裏亭臺紛若薺湖邊風月澹於秋莫嗟人事多遷  
改隨分逍遙到白頭

玉局與君俱丙子放翁同曰降庚寅名山事業今容及世路風  
波歲幾更暇祝難逢黃髮叟性老年八十三心期還證白鷗盟恰當

赤壁重探勝定有胎禽向客鳴

錫之之官巧家賦詩送行卽以爲勗

已往見成效

歷任西嶠彌  
渡永善等縣

艱哉復此行繭絲談吏治狙賦困民生

叔季誠多難循良不在名願君恢夙志一爲雪虛聲

嚴冬月夜

異書讀罷漏聲殘神味充然未覺寒不舍娟娟涼月影夜深兀  
自久凭欄

竹村函詢近況詩以答之

寂寂經旬戶掩荆繙書弄筆遣閒情老來歲月多荒率官退文  
章匪重輕睡犬能酣稀客過騎驢時喜傍湖行半山一壑容專  
老白眼憑他有惠卿

題許蓮芳貞女芸窗小草後

蓮芳爲豫章許古香先生之女能詩詞美容儀及笄字嶺南顏鍾遇君亦績學士也未嫁而顏卒女誓志終身守貞全節其戚邵君祖平以啟徵題并寄眎芸窗小草爲題其後

震川非禮論梁份折其角

明歸震川貞女論以女子未嫁守貞爲非禮清梁份著論非之援據甚精

禮本順人

情奚事苦迂曲繫古豪傑士志行每超卓忠臣無二心烈女共一轂要行心所安詎嫌越中鵠蓮芳巾幗賢夫也復嶽嶽飛瓊締天緣顏回遠不祿澈瑱誓終身抱璞肯再辱匪徒守慳慳實堪勵末俗嗟今最澆薄放浪恣厥欲首稱歌舞場隊魚樂逐逐滿堂人盡夫隨意成以曰古昔嚴授受今乃貼膚肉履錯髡誠歡人道等禽畜次則教學地例許同室讀有機蕩檢閑坦然而面無惡顏風况愈下有心欲痛哭我讀芸窗辭貞操歎婉淑文采竝郁郁天胡遇之酷勁草當疾風幽蘭在空谷舉世波靡中其人乃如玉是宜金鑄之拾遺彤史續聊抒喤俚言豈足資表襮

哭趙松泉同年

譔傳君在京逝世未幾君歸示之以詩君爲輟然

煙蘿鬱奇氣瑰人時挺生琴鶴久去世君爲金波觀察子箕裘復相承松泉不羈才齟齬稱聰明六法夙擅長揮毫若天成篆刻供



點染餘事能倚聲製作諸物理脫手事事精交親弱冠時瑜亮  
轟鄉城北上偕計吏春江綠波縈汀洲詠芳草旅思增淒清薊  
門同爲客侘傺盃酒傾一麾不相見相見桑海更吏治資臂助  
未寒車笠盟誰分古稀年猶作萬里行詩詞迭寄我小像神充  
盈頗冀重歸來聯牀話平生豈期噩耗至一瞬隔九京結歡四  
十載心跡終合井垂暮乃傷逝老淚紛紛縱橫汴梁舊遊地魂魄  
儻依憑爲作大招詞招招君返故塋虎豹塞荒塗勿爲久伶俜展  
卷對遺墨永懷今昔情

檢書櫝得舊鈔古文戲題其上

一冊陳編刼後遺當年況味共誰知堂堂歲月隨流水宛宛心  
光似舊時攻苦幾難詳馬足抹塗真欲罄蠶絲文章報國終何  
補別有楹書百世垂

梅花盛開月色清綺感韶年之不再喜清景之宜人遂成長

篇藉抒逸興云爾

梅花與我有舊緣其間離合五十年垂髫咿唔方就讀亭亭一  
樹植窗前嚴冬沍閉苦岑寂著花伴我偏繁妍不嫌境遇始冰  
蘖以梅自策窮益堅一朝驪首騰沓去從此遂隔藐姑仙廿年  
幸未渝守素祇今如約歸林泉荒園小築供嘯詠老梅數株園

西偏花時燦爛如被錦老懷顧之常欣然樓頭俯視炫銀海林  
下獨步循苔塲何事遠涉羅浮與鄧尉影疎香暗無不便風前  
月下尤韻絕時復索笑憐娟娟孤標冷峭亦似我形雖冲淡神  
則全迨暮景光寧把玩白駒一例隨飛遷悠悠萬事不挂眼止  
此佳卉和陳編平生所嗜無奢願對花展卷堪留連世人任談  
宙合大擾擾於我何有焉會當補種數十本有如收穫豐瑤田  
惜少逋翁好詩句摹寫能令花與人俱傳

石齋招飲以家祭辭仍柬一詩達意

老友如晨星一聚頗不易日日盼東來東來又若避太息飲啄  
微亦似難任意君家有精庖往常齎其葢花豬饜老饕下若傾  
飲器歲暮腹正枵翻同太常忌惟當向西笑大嚼望屠肆况積  
胸中惡欲吐不得遂亟亟仲素縑抒寫藉文字預料開筒看博  
得座中啞

黃仲笙寄綿竹月刊五冊內有仲笙手書近作及和其戚友  
詩均步武涪翁又附戒煙丸方法甚備不晤多年得之甚  
喜且服其用心之仁厚也答之以詩

卅載停雲覲面難迢迢天末降書翰新詩妙筆探雙井健骨精  
思接建安植品無慚三益友救人奚翅五靈丹心期不隔印徠



道願共松筠  
屬歲寒  
君已六十有八時正歲暮

登大觀樓遠眺  
乙亥上元日

地控湖山勢亦雄  
大觀如舊霸圖空  
井蛙曾笑公孫隘  
神馬猶傳阿育封  
防患何人籌未雨  
嬉春幾輩溯流風  
蒼茫目極西南徼  
默默無心說段蒙

園中海棠盛開攜書讀於花下用東坡定惠院海棠詩韻

得  
五言一首

結廬城西隅  
地僻饒花木  
紛華人競趨  
守寂我乃獨  
亭亭數株春  
條然遠塵俗  
亦如我歸潛  
遷喬出幽谷  
小園拓數弓  
間以度書屋  
讀書復賞花  
滋味勝梁肉  
臨風姿婀娜  
得雨意酣足  
年年及花時  
倍增景麗淑  
巡覽百不厭  
饜飫便便腹  
幽靚比叢蘭  
便娟倚修竹  
差堪怡性情  
匪徒寄耳目  
迴溯卅年前  
囊書來自蜀  
宴爾伴紅妝  
高騫舉黃鵠  
迢迢招隱詩  
揀撥求凰曲  
對花默無言  
舊緒紛引觸

詢星海病漸愈奉東慰藉

漫道詩人命不猶  
例應善病與工愁  
夙希宣聖曾先禱  
止似維摩得自由  
疑影杯中如可釋  
奇方海上不須搜  
關心藥裹休文叟  
翻覺腰圍減帶鉤

二月八日招季默子白崇皋子琴諸君賞海棠季默先有賜  
詠一首依韵奉酬

勝賞春韶引興長素心相印託詞章由來異卉緣佳種至竟重

櫻乏妙香

日本八重櫻即我國垂絲海棠有色無香

佚簡誰爲搜李杜名篇直欲壓蘇黃

終朝無雨驕陽亢猶自娟娟媚晚妝

寄運生綏遠包頭鎮達旗王府幕

雲中北去幾重山一日颿輪恣往還作客已經龍漢劫防倭不  
重雁門關笳吹野戍霜千里草長平沙雪一般岌岌西封誰不  
識書生亦爲損朱顏

送瑞熙弟回姚

弟在外八年去年始返滇

艱時衰鬢喜相逢情話恒過午夜鐘還念梓桑經劫屢倍憐棠  
棣比陰穠輕車瞬瞥人千里小別慙慙意萬重一事勞君須記  
取墓門添種幾株松

石齋小住西山有詩見懷感賦卻柬

落落衷情難自遣瀟瀟風雨起相思抗顏舊壘痕猶在埋首青  
山世可知翻羨承平多樂事始從遲暮見交期真須咫尺論千  
里感歎懷七字詩

纓蘅膺黔省民政之命詩以賀之



乘風駛到李朝輪竹馬紛迎見孺真叔季羣殷覩吏治要荒天  
慣著詩人未妨敬業稱前輩難得庸庵作部民會看隨車甘雨  
遍黔滇合頌兩家春

園居雜感

四首

花事粗諧號灌園等於無佛處稱尊韶光冉冉如流水世事荒  
荒合閉門也學著書覘道力時還覓句悅吟魂耄期改過知難  
盡往事追思不可論

羣狐競假虎威橫輕薄紛紛狎老成誓墓有人希逸少請纓何  
處覓終生壞方在劫成奚望恩不知酬怨總明一事德音差慊  
意詩詩惟恐四維傾

經營八表當樗蒲國體頻更了不殊苛令如毛償博進僞言服  
務號公奴許陳舊學彌天禍歐美淳風掃地無準備小朝廷往  
事翁孫叔姪任相呼

一例清齋學太常達官名士好歸藏不明理事庸何補但篤行  
持直下當少不如人嗟老耄身將終隱置文章任他翻覆多雲  
雨我祇齋心習坐忘

乙亥感事十首

冷然列子御風行不數周家八駿名省卻供張惜民力南巡北

狩漫平衡

羹沸瀾翻巨廿年揭來郊壘靖烽烟共和那識圖王會日麗光輝萬里天

迎鑾一曲不堪聽祥瑞何來效百靈惟唱太平滇海曲蠻鄉自

昔有秦青

厲鶚吳城譜迎鑾新曲有百靈效瑞一齣林畏廬曰詩人無聊善說鬼話直欲使神仙勢利矣

天馬行空紙上談破荒人物到滇南湖山金碧都生色可有雲

霓惠澤霑

中原豪傑銷沉盡坐見朱三起大梁白馬何能況無賴太原旂

幟自堂堂

項城蒙業他何論手剏艱難近世無祇惜珠崖輕棄擲應知飲

恨泥前謨

昔有人主張黨國只保本部十八省實大謬也

天險當前大渡河逍遙河上盡韜戈涓涓瞬見成溝壑挽障他

時耗已多

競長爭雄日有聞搏搏大地釀風雲漫言疥癬么麼疾禦侮終

妨張我軍

荆榛礙路盡刪除荒島扶餘聽自如政恐蛟螭難匍匐又掀波

浪出淵都

僥倖紅羊劫後身飄花甯復問茵塵也知寂寞蝸廬裏尙有胸



蟠宙台人

松岑撰寄蘧園記覆謝兼以奉懷

春草春波望渺綿撩人情緒又經年絕無盛業期身後祇益新  
霜拂鬢邊價敵連城叨作記光生陋室好安禪

原文多佛化語

倒流

自昔稱滇水定許重遊續舊緣

黔省政府成立各員皆一時妙選縲衡兼綰民政再東以詩  
挂眼瘡痍待拊循要將儒術澤邊民掄才屈顧無虛士繼美田

叟黎

培敬

匪異人洛社羣英方矯首夜郎萬象已回春柴翁聒

叟流風在聽取詩歌紀化淳

南雅吟侶屢以重興社事爲言爰偕竹村就三槐堂邀集并

首唱一律

七月初八

聯吟社侶興飛揚促我重將旗鼓張搶攘棋枰凡幾劫飄蕭鬢  
髮又新霜牘教拄腹增芒壘依舊同心接襖裳且喜豪情都未  
減快看妙筆灑雲章

南雅社集石齋因瘧疾不至以詩道意余亦適膺斯疾和韻

調之

予云痼疾我寧非五十休將百步譏疑是文園困消渴遂令沈  
約減腰圍採薪有託知非類擊鉢無他願不違秋後惺龕重會

合定聞鳩杖叩雙扉

病中枕上偶成

流光亟亟似奔梭臥疾翻嫌晷刻多世事機牙心上泯原作沸秋聲肅厲耳邊過固形煉氣非吾事急景凋年況病魔大化乘除安素分彭殤修短概由他

崇皋有詠懷詩三章賦答一首

一唱居然百友聲錦箋沓至和鳴嚶搜奇攷古都關史遣興抒懷匪市名官退翻令心解脫家貧彌見骨崢嶸爲君宦績添佳話奕世清風兩袖生

筱松以家藏小字麻姑仙壇記宋拓本見眎奉題

共和以來論法書爭誇碑版成時趨鍾王等自鄣以下甯論太師老迂儒卽由中葉溯清初趙董幾稱聖者徒南園亦祇入能品微指堪會包安吳一從猿叟盛推許平原聲價珍璠璣麻姑壇記尤夔絕大小二體峴碑如尋常傳本廊逾寸前翁松後譚安勤臨摹退谷所稱亦大字略謂大與指頂符詎知巋然越州小字本歷千百年蹟未徂藏鋒蓄勢耐玩索沉厚遒緊復清腴以校干祿夾注字結構大體了不殊謂只大字固拘墟又疑鉤刻仍姝姝筱松世守自嗇廬開函觸目驚奇觚觀齋以次列題



跋朗朗神鑑懸冰壺滇人夙宗魯公筆見此真歎靈蛇珠我慚  
管蠡窺一隅聊拾餘瀛爲之郭方今國事多搶攘大盜不操予  
與弧名書名畫落海外嗜古之士空長吁願君什襲慎函儲所  
在神物爲護扶視之當與球刀大貝等豈徒滄江虹月用自娛

題薛爾望先生像

此係明人所繪行樂圖長面修髯正襟危坐

生如褚令知何益御祭承疇亦枉然豈似薛家守門犬猶知殉  
主到重泉

諸生微名如芥土直貫長虹氣虎虎國存與存亡與亡諸生大  
名爍千古

比似孤山林處士梅花清節共馨香若論殉國綱常繫卻較逋  
仙有短長

秀才憂樂關天下廩膳金錢費大官除卻先生能不忝真心學  
到古人難

明社既屋諸生李世熊憂甚其母曰汝無官何憂爲熊曰歲費廩膳金錢焉得不憂

三百年來待士誠疾風勁草識忠貞范王府志須更正曲說先  
生避亂兵

范承勛王繼文監修之雲南府志謂先生恐亂兵搶劫而死當係清初避忌曲爲是說也

修髯長面肅容儀瞻拜中心發古悲時事儻成崇永際殉忠將  
復責阿誰

惺甫六十生日壽以詩

羅宿楊詩中劍水稱三秀卓絕君尤號白眉歲月駸駸及花甲輩  
流落落共襟期才難益爲衰時重交久寧唯進德規自有真操  
堪不朽無疆難老總卮辭

又代陳性老作一首

才名籍籍著華年占取鰲頭衆士先馳檄不輸枚叟捷籌邊還  
擬贊皇賢等身著作期遺後濟世心情老未蠲試看汾陽人繼  
起臺萊合與誦詩篇

和狷庵書湖上所見

偶行湖上得清涼湖淥波光引興長堤柳未春先作色池荷殘  
葉尙留香宋孫莘老詠荷詩  
葉香元自勝花香招提無復鐘魚響士女惟歌溱洧章隨  
事儘堪覩世變扶筇小立話斜陽

又

幾疑不是近湖人偶到湖邊色色新終覺人工過雕鑿欲憑風  
物淨翳塵臨流便有濠梁想避俗能全面目真懷抱邇來漸消  
歇因君佳什效施頤

同學柯定礎旅晉三十年盡力教育晉人趙君戴文等發起  
徵詩文紀念奉寄二首

日下一揮手蒼茫遂卅年君居汾水畔我臥彩雲邊久洽絃歌



化頻聞師友傳尺書勞問訊相望各華顛

宙合風雲擾黔黎最可傷牛毛肆誅索龍戰混玄黃入世計誠拙安民心甚長橫流嗟已遍無處問行藏

嶽嶽柯夫子當年識紫芝苦心能翼教雄腕慣臨池祇惜要荒遠難逢會合期倘憑宗聖力相見太平時

君倡宗聖社

縲蘄以九日東山寺登高詩屬和奉柬

磬鼓歡聲久寂寥賢良何日遇夔皋誅求已苦牛毛細噴薄還驚蜚氣高

日兵艦達漢口十餘隻

蠟屐逢辰猶健舉窮簷呼癸有飢號

餘年儻得覩平治端賴匡時命世豪

附原作

風雨何因被寂寥強過山寺俯林皋官清人比黃花瘦天遠樓爭白下高

謂去年鬱蒙樓登高

忍聽九州方戰伐

意亞開戰

仍愁四

野有啼號兩京歲歲題糕客誰識投荒興轉豪

袁樹五親家六十壽詩

石屏山勢鬱蒼蒼異龍湖水流湯湯喆人間世鍾靈祥異軍特起輝邊疆其時時局多搶攘詔書敦切求賢良蘭成射策登明光纚纚萬言慰羣望魁爾多士無慚惶出典學事古餘杭更膺牧伯作屏障卷懷未能盡所藏陵谷遽變還珂鄉等身著作抒

三長餘事桃李培門牆世出世間常無常澄心有定歸西方輪  
計甲子復相當願躋華堂稱兕觥風流玉雪承青箱點額牙笏  
紛滿牀南極色正森寒芒坐看世事更滄桑

題易狷庵僧衣禪座圖

宦海名場歷劫身衲衣面目自全真拈花閱默參微契照水分  
明證宿因世路回頭嗟火宅韶華轉眼慨風輪塵勞我亦從拋  
卻近局相過莫厭頻

再題薛爾望先生畫像

冠蓋如雲總愛身致身翻在草茅人一門忠義媲萊左萬右綱  
常存水濱明社已隨王氣盡大名常與日華新多君彰美兼風  
世妙筆能傳阿堵神

臘盡盼雪遣懷

歷盡三冬日日晴敲門無事倒書簾心經憂患粗能斂身少文  
章敢競名楊柳待舒偏濡滯梅花已瘦倍孤清獨憐蜂蝶多情  
甚偏向荒園逐隊行

詠史

老去伏波漫漫據鞍忌才容易愛才難青眸誰下陳蕃榻白髮羞  
彈貢禹冠冠漫許菁莪能造士須知弁髦早休官久空萬相無人



我只向縹緗覓古歡

喜雪

微霰敲窗徹夜扃曉來失喜雪凌兢偶因小病親和藥不爲嚴  
寒廢讀經謂佛經童戲頻呼若帚婦婦言試踞竈觚聽驟增竹柏  
鮮妍色便借丹青寫上屏時作小畫自遣

前因趙和璣同年病歿於青島誤傳爲松泉松泉名鶴清名頗相混曾作  
詩哀悼頃松泉歸來復作詩祝之

冠分大小名終混遠道傳聞遂異詞豈識令威非化鶴歸來猶  
是舊光儀

譚楊往事溯當年秀水汀洲訊誤傳此後應知壽無量不須更  
寫告存篇譚仲修客汀州誤傳其已死訛至秀水其友楊利叔爲詩哀之已而相見又喜而作詩見綴後瑯嶼碑傳集

社友有以歲暮喜晴詩見示者依韻奉和三首

公車曩過夜郎城旬日春陰不放晴黔諺有天無三日晴地無三里平之語曩走黔道常旬日不晴也天

爲名賢開特例人從叔世著循聲詩篇寫趁巡檐鐫英俊評來

失箸驚咫尺龍場遺蹟在事功端合繼文成沅澨傳烽達會城

捷書遠道卜陰晴官賢自爾金墉固歲暮依然爆竹聲塵扇漫

夸萬人廢登壇能使一軍驚時新攝府事兼綏靖任寇氛頓逐春雲散

聽三年報政成蕭賀入黔方深屢念族聞遠竄故及之記否高吟滿洛城春秋佳賞趁

新晴

君在白下修禊登高皆倡為詩歌

處邊

陳書帝不欲令伯山處邊或易為投荒二字

為欲紓民力感舊頻聞

應友聲三月鶯花鄉思切八公草木虜魂驚虞翻不嘆要荒地

講藝投戈雅化成

附原作

涉冬霜霰滿巖城天為徂年特地晴要使疲氓蘇喘息微從

鬧市驗春聲銀饌喜見千家醉

俗醉司命日七鬯期無四野驚

記否畫堂心似水巡檐隨分報詩成

丙子年

民國二十五年

題臞仙龍池校書圖

圖為徐澐秋所作

我生嗜書自髫童曹倉鄴架希前蹤少壯南北奔馳久所得亦  
頗稱雄封累人仕宦奚足道翻惜莫專鉛槧功頭白丹黃未及  
半牙籤萬軸將安庸老友方干有同好露鈔雪纂腰欲癯邇者  
志乘徵資料早有成竹羅心胸合盤托出恣采取更走燕秦吳  
粵搜殘叢沈編墜簡徧掛輯匪惟桑梓能敬恭歸來潛身書城  
裡澗蘋蕘圃追高風龍池柳荷擁萬綠中有兀兀讎書翁意趣  
冥然與古會比之埽葉或發矇茲樂偏與時俗迥經巢詩語真  
可宗世人解羨大官耳安知此道非窮通夙效張華志博物問  
難往復如撞鐘望洋苦難竟厥業君乃熊熊神獨充古籍鄉獻



賴收拾津逮後學無終窮徐子作圖染妙筆桐陰覲美愚谷公  
先德愚谷公有  
桐陰覲句圖永藏家乘爲世寶定有長虹貫月氣勃蓬

雜感

空虛久拚此身逃閉戶深居避豕豪南郭曹騰惟隱几東屏喟  
噓對同袍憑叢依社人誰論刻木牽絲我自嘲計已三平兼四  
滿西山豈必遜中條

清明日 三月十四

年年循例出東城恰喜晨露午放暉殘壘未銷驚却火傳烽又  
報偏橫兵稍憐士女都如醉未信人生是有情縱過百年仍此  
日不須後事問君平  
松楸猶在蜀山西遙想佳辰壺榼攜自昔分飛似勞燕祇今僑  
寄等鴻泥心知舜跖都爲幻感嘆彭殤總不齊何日烽車瞬息  
達要憑人力勝天梯

題石屏李佑侯機燈課讀圖

苦節之子什九賢皋聞儒者垂言詮茶苦藿甘理剝復況乃人  
定能勝天遠稽周末逮唐宋丸熊畫荻機聲連近代北江有圖  
詠以迄秦塚張瓜田是事恆見文物會難乎却出要荒滇石屏  
李母名族女守節撫孤四十年爲母爲師爲會督煒煒孤子終

騰騫甯啖藜藿勿廢讀我聞此語心怦然世人若皆服此語率從禮教罔或愆奈何末俗不長厚絕裾捧檄意各偏須知忠臣本孝子良吏又自女師篇儻驚虛榮昧大義家國兩負何稱焉佑侯方出治百里慈訓有素如源泉少君之子不疑母班書備載千載前萬行無如節與孝我將拭目窺其全煌煌留圖爲世寶更藉文字長流傳所在當有神物護何數米家書畫船

題昆明周燮卿廣文痛定思痛吟後

習之震川雄于文每狀忠烈多慙慙古來大節垂天壤事藉文傳文增榮祇惜滇省處邊遠往往奇蹟嗟湮淪一代清史傳忠義寥寥曾不逾數人周氏一門殉寇難史稿亦皆遺姓名睢州趙氏崇祠宇湯氏亦播斷釵吟樊家園中十三烈二十烈女任寨村均見錢儀吉碑傳集皆藉名文傳不朽我於廣文彌傷神雖無李歸如椽筆却具全邵表彰心花門猖獗躡會城齷齪腥羶一時併濂溪後裔留芳馨酖酒一壺爭相傾一十四人同捐生甦者六人天所矜昌大厥嗣揚休聲痛定思痛餘哀音全書藹落嗟僅存和章一一堪披尋淒切反覆飄忠魂太史難禁渭陽情徵文小序見惓誠珠玉滿目昭乾坤原題甚多上爲河嶽下日星烏頭綽楔何崢嶸男忠女烈千載輝丹青



右詩爲廣文外甥顧仰山太史徵題走筆應之以韻多通轉欲稍爲更易繼見阮文達兩浙輶軒錄中五七言古體通轉甚多而嘉善葉星期令史愁五古一首所用臻星文心迎深韻由真通文元轉庚青蒸侵與余韻全同是古人已有先我如是用者遂止不易

題熊淑英女史花蕙冊

全仿北宋沒骨法

崇嗣崇勳紹祖風  
荆新沒骨妙能工  
南滇崛起閨中彥  
繆素李相參法乳同

寄懷錢士青西湖

又是鶯飛宿草滋  
西湖煙柳綠絲絲  
故人早共還初服  
濟衆尤能溥惠施

屢辦賑務

二十年前袍澤誼  
三千里外樹雲思  
月斜鐘動雞初唱  
起坐披衣共此時

馬令仲良殉難楚雄令兄伯安徵題

五常才器重南疆  
節概堂堂屬最良  
授命孤城同許遠  
招魂大野遣巫陽  
聲光自足垂麟史  
恩誼那堪折雁行  
國瘁人亡天下痛  
匪徒威楚一隅傷

尊鷗因公回滇喜而有作

幾年濶別悵離羣  
每望江東極暮雲  
詩格漸隨吟鬢老  
樽醪又向故園醺  
乞靈簡策堪嗤我  
得助江山輒羨君

讀君采石修禊諸作輒深嚮往

便擬

相從賓洛社登壇擊鉢張吾軍

遊安甯溫泉村住孫氏別墅信宿留贈主人竹卿中將

自昔河東境分圻盛有唐唐高宗時王仁求為河東州刺史始奏置姚府以西二十有一州郡江山留異蹟

史乘略要荒南韶之見於史籍者實自高宗時始地以煖泉重風猶淳古良濯纓兼濯

足吾意在滄浪

佳什堪移贈名園綠水邊將軍真大隱時輩任高騫君士官畢業同學及後起

者多開府建節君二漸覺金銀氣潛移山水緣泉水附近多有華屋巨厦寒峻之士望塵却步矣經綸

徒小試花木賽平泉

濟勝非無具頻年鴻爪留未能迴末運先許入孤舟謬誤陶元

亮逍遙馬少游猶堪明鏡照霜雪未盈頭

共業寧能避吾衰值此年扶眸傷伍員昔人多作去聲用王閏切被髮歎伊川

奚必桃源洞言尋碧玉泉羨他耕鑿輩茫昧樂園田

題蔡松波將軍遺像民國二年同拍照于光復樓下時積雪未融

奕奕英姿明積雪堂堂偉績耀凌烟不禁車庫平津感一展遺

容一黯然

有贈

帶經取重牧翁詩翻為鉛山撰序遲莫作談龍競時譽千秋得

失有人知

六十書懷

四十年來事登場劇不殊沐猴冒冠服塞馬論榮枯總乏文卿



巧偏如武子愚世途幾遷變終古此頑軀  
不悔儒冠誤難禁宦海波世無君子館詩詠碩人藹早歲知天  
命冲襟養太和自饒榮啟樂帶索且行歌

季默移居有贈

舊是牆東士移居更向東一廬仍市隱五柳稱家風嗜古時趨  
異耽吟結習同前微如可挹彷彿見倪翁

謂蛇翁

答客問

一雪虛聲恥儒生壯遠猷烽煙靖銅馬刀劍易耕牛世去黃農  
遠人期呂杜侔吾寧阿夙好試與聽輿謳

題白雲山人近編游杭快覽

憶別西湖漫十年夢魂夜夜遶湖邊得來永叔歸田錄便擬宗  
文挂壁眠四面山川收卷帙一時筆墨化雲煙錢莊恰與劉莊  
並名勝名人合共傳

劉莊主人與君均任歐美外交官職

九月九日萸鷗招螺峯登高飲於螺翠山莊以唐杜牧齊山  
登高詩分韻得卮字

登高向螺峯預約各首肯所幸腰脚健款緩凌絕頂木彫山容  
瘦霜高野色迴縱目窮郊原黃雲漫漫畦町杭稻頗豐登喜如麥  
秀鋌

見周官考工記注

獨念三邊黎子遺孰存拯安得時雨師撻伐

同制挺迴步入山莊促座設清茗黃英映簾波斜日碎光炯拈  
韻鬪尖叉險易殊不等謝客方沉吟山公已銘酹皆座中實事庶  
幾二難并遮莫三日醒以茲酬嘉節龍山會堪竝

又代秋字七律一首

身世渾如不繫舟君方鐘鼎我林邱當年豪俊奏奇績

辛亥九月九日雲南

舉義反正

此日河山又暮秋白髮盈顛莫共插黃花滿院酒新芻無  
詩何以酬佳節但爲衰殘讓一籌

從弟瑞熙六十生日以詩祝之四首

日月跳丸似匆匆六十霜攤書吾送老縱酒汝猶強羣從傷魚  
肉耕雲從弟劉匪陣亡諸昆數雁行藐躬慚薄德怕誦鶴鵠章

北上風塵悴東遊瀛海深艱時一分手壯志兩同心循績稱棠  
棣保山爲予兄弟立棠棣碑比之賈氏前蹤企竹林遊一年青箱承有子千里望駸駸道

克承家學有厚望焉

送汝倦遊返離居歲再遷紅鱗書甫達青犢耗頻傳共黨入姚掠衣物而去故里多新壘吾家有舊甌秋風翠湖畔相見一欣然

甫遂歸潛願旋臻耳順時立身差共信撫髀漫相期

星命家謂第六十二後猶

有建樹云

四海猶多難千秋未可知耄年漸進德衛武是前師

弟多飲爲

戒爲



瑞堂屬作壯語戲書三首貽之

君戴姓曾率師旅轉戰粵嶺今歸老於滇

縱橫宇宙幾徘徊  
露電榮華安在哉  
碌碌敢當名世士  
紛紛誰是濟川才  
年光虛負頭顱好  
富貴都從舌本來  
讀萬卷書行萬里  
蒼茫天意費疑猜

漫道天心甚渺茫  
物非先腐詎蟲傷  
新知未向洋流啟  
舊德先隨土地亡  
自信立身關學問  
寧徒報國在文章  
不堪矯首搏桑日  
兵氣彌漫罩大荒

平生作士恥稱文  
青眼高歌自不羣  
學劍未能封萬戶  
揮毫直可掃千軍  
雄心欲問樓蘭罪  
捷足還追夸父勳  
試上崑崙山頂望  
龍拏虎擲正紛紜

題畫隱園圖

爲如皋許情荃題其子松樵並工詩畫

滄桑陵谷閱興亡  
勝地名園好退藏  
市外烟雲饒供養  
案頭筆墨自精良  
未容水繪前而美  
况有斜川足肯堂  
早誦佳章神已往  
何當尊酒細評量

和纓蘅九日登高原韻

又是重陽佳節臨  
分曹拈韻費長吟

是日尊鵬邀集螺峯登高分韻賦詩

故人尺素慙

懃甚滄海橫流感喟深  
時雨噓枯方引領  
滇中數月不雨閒雲出岫已無心  
墜驢儻見承平象  
欲訪希夷向華陰

附原作

時危幾欲廢登臨縱有勞歌似越吟  
峴沓鼓鼙知事亟蕭條  
欄楯識秋深兩京應憶題糕客  
萬里難忘叱馭心莫訝巖疆  
生意少新來種柳已成陰

壽楊木齋

夫婦並年七十三生二月一日

纔過燒燈二月天高張樺燭做瓊筵  
耆英合列建中上覽揆剛  
居亞聖先龍漢魚河談往事木公金母證良緣  
綵衣共進宜春酒唐故事二月初一釀宜春酒  
況有扶風坦腹賢

丁丑花朝晉侯招賞枕湖精舍牡丹得句

一春難得是今朝別墅蘭成適見招  
爲值花王舒爛漫雅宜詞  
客共逍遙名葩何止酬佳醞  
高詠尤拚奪錦標不乞輕陰爲蔭  
護願施雨澤遍敷澆

張說賦散如珠泉之敷澆時已半年無雨

覆柯定礎

得君尺素誦君詩雲海蒼茫繫我思  
邪說誠行嗟滿目多君宗  
尙是先師

一住汾陰三十年皋比情話故依然  
固緣德望堪依戀亦見此  
邦人士賢

贈何叙甫



登高曾寫豁蒙樓橐筆重爲汗漫遊任繪西南好山水依然萬里固金甌

贈鄭曼青

永嘉屢見謝公詩南徼欣逢老畫師寫遍六朝佳麗地更留餘墨灑滇池

題無錫高涵叔如在圖

世風曰下似江河天性純全獨不磨俎豆陳堂殷想像杯棬入手重摩挲停琴昔亦悲風木掩卷今同廢蓼莪周子嘯堂爲圖陳子石遺記孝思錫類竝堪多

錢廉青回滇述近事紀之以詩

不負凌雲八斗才鋤荒妙手著蒿萊三年報最澆風變元日成詩好雨催有元日喜雨詩白叟黃童知愛戴古屏素几見丰裁斑斑得自肥親述匪直傳聞道路來

滇亦得雨次社友喜雨詩原韻

自有天心玉女成何須占課待君平歡騰農野災應澹澤溥邊荒瘴亦輕造化曾無畦畛見暑寒胥泯怨咨聲試從叔季論民治儒術從知莫與京

續蘅寄序拙集仍依前韻賦謝

撫宋規唐百不成祇將甘苦說生平添毫足爲三都重覆瓿終  
 慚一羽輕漫謂詩歌祇餘緒肯隨流俗競浮聲十年韻事真如  
 夢記否郵筒遍兩京

社友有思退者再次前韻致勗望焉

抗希文肅與文成學問深時意氣平

成語

勿慮迷陽行有礙須

知飢溺任非輕讀書談道緣何事錯節盤根早有聲好試巨靈  
 開托手暫教擱筆賦都京

題筠連曾少梅先生義夫坊

文孫小魯屬題

不緣正叔稱君子政恐乖崖作小人

見鄭景望紀聞

半世空幃能獨

守非惟義重且情真

王駿管

甯

高風德不孤參前逋後與爲徒何圖澆習多妻日復

見當年毛義夫

毛義夫見宋龐元英談薈

孫枝文采擅風流盛事傳來爭應求傑句雄詞輝綽楔節夫嘉

話播千秋

節夫條例妻原稿夫字一死不再娶者有獎見徐珂範圍客話











